


# *KINI ANG PAGSUBANG SA ADLAW*

 Iduko nato ang atong mga ulo. Ginoo, samtang nagkatigum kami dinhi niining matahum nga buntag sa Pasko sa Pagkabanhaw, makita ang gagmay'ng mga salingsing nga nagapang-udlot, ang mga buyog nanagpanglupad ug nanagpangsiba sa ilang bahin, ang mga langgam nanag-awit nga daw sa mangbusikad ang ilang mga kasingkasing tungod sa kalipay, tungod kay aduna og usa ka Pasko sa Pagkabanhaw. Nagatoo kami nga Imong gibanhaw si Jesus gikan sa mga patay, daghang katuigan na ang milabay, niining adlaw, ug gisaulog namo kining adlaw sa paghandum.

<sup>2</sup> Ug hinaut magkaaduna og Pasko sa Pagkabanhaw kanamong tanan, karon. Hinaut nga kami, ingon nga Iyang mga alagad, makasabot sa Iyang Pulong, nga anaa na kami sa Iyang pagpakig-fellowship kaniadto pa, ug nga karon nabanhaw uban Kaniya ug nagalingkod diha sa Langitnong mga dapit.

<sup>3</sup> Panalangini ang buluhaton dinhi sa tabernakulo, ug sa tanang kayutaan kung asa maabot niini, pinaagi sa niining telepono.

<sup>4</sup> Ayoha ang tanang masakiton ug ang nanag-antus. Hinaut nga mahimo kining usa ka Pasko sa Pagkabanhaw alang kanila, usab, ug usa ka paggawas gikan sa mga sakit ngadto sa kusog. Ug niadtong mga patay sa kasal-anan ug kalapasan, hinaut nga mabuhi sila sa niining adlaw pinaagi ni Cristo. Ug kami magadayeg Kanimo, tungod kay ginapangamuyo namo kini diha sa Iyang Ngalan. Amen.

<sup>5</sup> Ginaisip ko gayud kini nga usa ka makahibulongang pribilihiyo, niining buntaga nga mahibalik dinhi sa Jeffersonville, Indiana, uban niining dakung kongregasyon, sa simbahan nga puno kaayo ug nanagtindog na, ug sa palibot ug diha sa gawas, ug diha sa mga parkingan ug bisan asa. Sa inyo nga mga anaa sa mga telepono sa tibuuk nasud, maanindot kaayo dinhi nga buntag.

<sup>6</sup> Kaganinang alas singko sa kaadlawon, ang akong gamay'ng higala nga adunay pula sa dughan mitugdon didto sa bintana ug gipukaw ako. Daw sa mobusikad ang iyang gamay'ng kasingkasing, nga nagaingon, “nabanhaw Siya.” Kanunay kong nahunahuna kining gamay'ng langgam ingon nga akong usa ka higala, tungod kay gusto ko siya.

<sup>7</sup> Sama sa ginasulti sa sugilanon bahin kaniya, “Usa ka gamay'ng kolor-tabonon nga langgam ang nakakita Kaniya nga nag-antus diha sa krus, kon diin ang sala ang nagbutang Kaniya didto.” Siyempre, walay sala ang gamay'ng langgam. Dili Niya kinahanglan mamatay alang sa maong gamay'ng

langgam. “Apan milupad siya ngadto sa krus ug naningkamot nga maibot ang mga lansang, gamit ang iyang gamay’ng sungo, ug nagkapulapula ang iyang dughan.” Ug ingon niana ang gusto kong mahitabo kanako, usab, ingon nga usa ka panalipod, diha sa pagpaningkamot nga protektahan kining mahimayaong Butang nga hinungdan sa Iyang pagkamatay.

<sup>8</sup> Sa pagkahibalo nga limitado lang ang atong oras dinhi, ilabi na sa mga higala nga nagapaminaw pinaagi sa niining telepono, gusto kong tawgon ang inyong pagtagad niining buntaga ngadto sa usa—usa ka litrato nga sa makausa nakuhaan kaniadto sa camera, mahitungod sa usa ka panan-awon nga nakita ko dinhi sa tabernakulo, mahitungod sa akong paggikan sa Indiana, padulong sa Arizona; kon diin ako pagatagboon kaniadto, diha sa pormang piramide, sa pito ka nga mga Manulonda. Wala ako nahibalo kung unsa ang mahitabo sa ulahi, miabot lang ako didto, nga naghunahuna nga mao na kadto ang katapusan sa akong kinabuhi, nga walay tawo nga mahimong mabuhi pa sa nianang pagbuto; ug sigurado ako nga nahibaloan ninyong tanan ang mahitungod sa maong estorya. Ug dayon didto sa Sabino Canyon, usa ka buntag nga sama niini, samtang anaa ako sa pag-ampo, adunay espada nga gipahimutang diha sa akong kamot, ug miingon, “Kini ang Pulong, ug ang Espada sa Pulong.”

<sup>9</sup> Sa ulahi, nagpakita ang mga Manulonda ingon sa gitagna na. Ug sa mao mismong higayon, usa ka dakung pundok sa Kahayag ang mibiya gikan sa akong gitindogan, ug misaka sa traynta ka milya didto sa kahanginan, ug naglingin, nga sama sa mga pako sa mga Anghel, ug nagdibuho ngadto sa langit og porma sa usa ka piramide diha sa mao ra mismo nga konstelasyon sa mga Manulonda nga nagpakita.

<sup>10</sup> Gilitratohan kadto sa siyensya, latas didto sa Mexico, samtang mipadulong kini gikan sa amihanang bahin sa Arizona, sa kung asa gisulti sa Balaang Espiritu nga magtindog ako, “kuwarenta ka milya sa amihanang-silangan sa Tucson.” Ug misaka kini sa kahanginan, ug namantala sa *Life* nga magazine ang maong mga litrato, “Usa ka makahibulong butang nga lagpas pa sa mga kawanangan, kon diin didto dili na mahimong magkaaduna pa og kaumog, kon diin didto dili na mahimong magkaaduna og alisngaw sa unsa mang butang; traynta ka milya ang kahabugon, ug baynte-siete ka milya ang gilapdon,” ug didto kini mismo itaas kon diin nahimutang ang mga Manulonda.

<sup>11</sup> Karon, nangutana sila, aron mahibaloan. Ang siyensya, ang usa sa ila didto sa Tucson, gustong mahibaloan ang kamahinungdanon niini, apan wala ako magsulti kanila. Nahibalo kamong tanan niini, nasulti na kini og una. Apan dili kini alang kanila; kini alang lamang kaninyo.

<sup>12</sup> Ug busa nagsulti Siya kanako didto, ug nag-ingon, “Pagaablihan na ang Pito ka mga Selyo. Ang pito ka mga

misteryo, ang pito-ka-pilo nga misteryo sa Biblia, nga gitakpan sukad pa sa pagkatukod sa kalibutan, igapadayag na.” Ug kita, bisan pa man nga usa ra ka yanong gamay’ng pundok, kung itandi sa tibuuk kalibutan, nakatagamtam kita sa niining mga panalangin, ang madungog kining mga misteryo. Ang kasal, panagbulag, binhi sa serpente, tanan niining nagkalainlaing mga pangutana, hingpit na nga napadayag nganhi kanato, dili pinaagi sa tawo, kondili pinaagi sa Dios, Mismo, nga maoy nag-abli nianang pito ka mga misteryo; kung unsa ang Iglesia kaniadto, kung unsa nga anaa na Kini kang Cristo niadto pang sinugdanan, ug kung unsa nga igapadayag Kini sa kaulahiang adlaw.

<sup>13</sup> Ug karon, sa diha nga kini misaka, aduna kita og litrato niini sa gawas nga anaa usa ka plake. Ug, dayon, aduna ako og litrato nga ania karon dinhi, kung namatikdan ninyo, sama sa namantala sa *Life* nga magazine. Apan wala ako mahibalo kung ang akong mga tigpaminaw, nga ania dinhi, nakakita na ba gyud sa maong litrato, kita n’yo, kita n’yo, sa paagi kung unsaon kini pagtan-aw.

<sup>14</sup> Kung nahinumduman n’yo, nagwali ako kaniadto sa dihang miabot kining panan-awon, sa usa ka hilisgutan diha sa Basahon sa Pinadayag, kung unsa ang mga maghuhukom kaniadto, sa dihang nakita nato si Jesus diha sa Pinadayag 1. Sa dihang gisugdan nato og abli ang Pito ka mga Selyo . . . o ang—o ang mga Kapanahonan sa Iglesia, diay, sa wala pa mahitabo ang pag-abli sa Pito ka mga Selyo. Atua didto si Cristo nga may “buhok nga daw balhibo-sa-carnero, puti.” Ug gisaysay ko kana kaninyo, nga ang kanhing mga maghuhukom nga taga-Ingglatera, ug ang mga maghuhukom sa kanhing panahon, pagmoadto na sila sa hukuman, aron manumpa, nga gihatag na kanila ang pinakataas nga awtoridad. Nanagsul-ob sila og puti nga peluka, sama sa naandan kaniadto, diha sa ilang mga ulo, aron ipakita ang ilang pinakataas nga awtoridad.

<sup>15</sup> Bueno, kung iliso n’yo ang litrato *paingon niini* ug tan-awon, siguradong makita ninyo kini gikan sa nahimutangan ninyo, nga si Cristo kini. Tan-awa ang Iyang mga mata nga nagtan-aw *dinhi*, sa ingon ka eksakto niini; nga nagasul-ob og puting peluka sa Labing-hataas nga Pagka-Dios ug Maghuhukom sa tanang langit ug yuta. Nakita ba ninyo ang Iyang mga mata, ilong, ang Iyang baba? [Nagaingon ang kongregasyon, “Amen.”—Ed.] Biyoha ang litrato pabalik nga *ingon niini*, kung giunsa nila pagkuha niini; *ingon niini* unta, ang hustong posisyon sa pagtan-aw niini. Ug inyong . . . Makita ba ninyo kini? [“Amen.”] Siya ang Labaw-hataas nga Maghuhukom. Wala na’y lain pa gawas Kaniya. Ug kana ang hingpit nga kailhan pag-usab, ang pagpanghimatuod nga kining Mensahe mao ang Kamatuoran. Kini ang Kamatuoran. Kini ang tinuud. Ug ginahimo Siya dili nga ikatulong Persona, kondili ang bugtong Persona mismo!

<sup>16</sup> Tungod sa puti, kita n'yo, makita ninyo ang mabaga nga bahin, ang Iyang nawong, ang Iyang balbas, ug ang Iyang mga mata. Ug matikdi, ginalantaw Niya...Gikan Kaniya nagsumikad ang kasanag sa niining Kahayag diha sa tuong bahin, kung diin Siya nagalantaw. Ug sa krus, didto Siya nagalantaw, sa tuo, kon diin gipasaylo Niya ang tawong makasasala. Diha sa Kahayag sa Iyang pagkabanhaw, padayon kita sa gihapon nagamartsa diha sa Iyang Ngalan.

<sup>17</sup> Gusto ko, niining buntaga, nga magkaaduna unta ko og daghang panahon pa aron—aron hisgotan kining di-kasagaran nga mga butang nga sa wala'y ni anino sa pagduhaduha, napamatud-an sulod sa miaging traynta na ka tuig, o trayntay-singko ka tuig, sa dinhi mismo niining simbahan; sukad pa man didto sa suba, sa dihang ang mao rang Kahayag mikanaug dinhi sa Jeffersonville, niadtong 1933, ug gisulti ang mga pulong, "Maingon nga si Juan Bautista gipadala aron pag-andam sa unang pag-abot ni Cristo, ang imong Mensahe mao ang magauna sa ikaduha." Ania na kita sa katapusan nga panahon, ug makita mismo nato kini. Makapangutana lang kita usahay kung nganong wala man kini mikaylap sa tibuuk kalibutan; tingali usahay magkaaduna kita og kahigayon aron ipasabot kana, kung itugot sa Dios.

<sup>18</sup> Karon gusto ko nga ablihan ninyo ang—ang inyong mga Biblia, sama sa kanunay natong gitooan nga ang Pulong ang kinahanglan gayud mauna, ang pagbasa sa Pulong. Kanunay kong ginabasa Kana, tungod kay Kini...Ang akong mga pulong maoy pulong sa usa ka tawo, mapakyas kini; apan ang Pulong sa Dios dili gayud mapakyas.

<sup>19</sup> Karon ato nga—nga pagabasahon gikan sa Balaang mga Kasulatan, ang teksto. Ug gusto namo nga ablihan ninyo, una, sa tulo ka mga bahin sa Biblia, nga napili ko nga basahon. Ang usa niini anaa sa Pinadayag, sa unang kapitulo, ug sa ika-17 ug ika-18 nga bersekulo; dinhi Siya nagpakita nga ang "buhok Niya ingon ka puti sama sa balhibo-sa-carnero; ug ang Iyang mga tiil sama sa tumbaga." Ug dayon gusto ko usab nga tanawon ninyo, sa inyong mga Biblia, ang Mga Taga-Roma 8:11. Napili ko, niining buntaga, ang tulo ka mga bahin aron basahon, gikan sa Balaang mga Kasulatan, alang sa akong Mensahe karon, nga gibutang sa Ginoo sa akong kasingkasing mahitungod sa pagkabanhaw. Ug dayon gusto ko nga ablihan ninyo, usab, ang Marcos 16:1 ug 2. Dinha ko kuhaon ang akong—akong konteksto.

<sup>20</sup> Karon sa Pinadayag 1:18, mabasa nato kini nga mga Pulong, 17 ug 18.

*Ug sa pagkakita ko kaniya, natumba ako nga daw patay diha sa iyang tiilan. Ug gitapin-an niya ako sa*

*iyang too nga kamot, nga nagaingon kanako; Ayaw kahadlok; kay ako mao ang nahauna ug ang ulahi:*

*Ako ang buhi, ug ako ang namatay; ug, tan-awa, ako karon buhi hangtud sa kahangturan, Amen; ug ania Kanako ang mga yawi sa kamatayon ug sa hades.*

<sup>21</sup> Ug sa Mga Taga-Roma sa ika-8 nga kapitulo ug ika-11 nga bersekulo, mabasa nato kini.

*Apan kung ang Espiritu niadtong nagbanhaw kang Jesus gikan sa mga patay nagapuyo diha kaninyo, siya nga nagbanhaw kang Cristo gikan sa mga patay magahatag usab ug kinabuhi sa inyong mga lawas nga may kamatayon pinaagi sa iyang Espiritu nga nagapuyo kaninyo.*

<sup>22</sup> Ug karon sa Marcos sa ika-16 nga kapitulo, ang kapitulo sa pagkabanhaw, ang ika-16 nga kapitulo, ang ika-1 ug ika-2 nga mga bersekulo.

*Ug sa miagi na ang adlaw nga igpapahulay, si Maria Magdalena, ang inahan. . .ug si Maria nga inahan ni Santiago, o si Salome, nanagpamalit og mga pahumot, aron sa ilang pag-adto ilang ikadihog kaniya.*

*Ug sa kaadlawon pa gyud sa nahaunang adlaw sa semana, miabot sila sa lubnganan nga nakasubang ang adlaw.*

<sup>23</sup> Karon, ang akong teksto niining buntaga, gusto kong kuhaon ingon nga usa ka teksto: *Kini Ang Pagsubang Sa Adlaw.* Ug alang sa usa ka hilisgotan, gusto kong gamiton, “ang makapabuhing Gahum.”

<sup>24</sup> Karon, kabalo mo, tingali dugay na kamong nakadungog diha sa radyo ug sa wali sa nagkalainlaing mga ministro. Ug ang atong hamili nga Igsoong Neville nagahisgot niining buntaga sa iyang hilisgotan ang Pasko sa Pagkabanhaw, mahitungod sa pagkabanhaw. Ug nahunahuna ko nga tingali pagahisgotan ko kini sa—sa medyo lahi nga paagi, dili aron nga mahimong lahi, kondili aron madugangan pa og gamay, tingali sa usa pa ka anggulo, alang kaninyo. Ang mga Kasulatan, sa tanang anggulo nga inyong tan-awon diha sa mga Kasulatan, kanunay Kining ginapahayag si Jesus Cristo. Dili ka makaikyas niini, bisan sa unsang paagi. Kanunay Kining ginapahayag Siya.

<sup>25</sup> Karon, samtang ang kalibutan niining adlaw anaa sa usa—usa ka panerbisyo sa paghandum, o, sa labing menos, sa Estados Unidos ug sa niining bahin sa kalibutan, niining buntaga, sa mga kaiglesihan ug sa tibuok nasud, ginasaulog ang usa ka paghandum sa—sa pinakadakung kadaugan nga nakab-ot sa tawo sukad.

<sup>26</sup> Sa hunahuna ko, ingon nga Manluluwas sa dihang Siya namatay, o ingon nga usa ka masuso sa dihang Siya natawo,

wala unta Siya dinhi karon kon wala Siya mianhi babaw sa yuta. Ug sa dihang namatay Siya, sa pagkatinuud gibayaran Niya ang atong kasal-anan. Apan, bisan pa man, adunay daghan kaayong mga gagmay'ng masuso nga nangahimugso, ug daghang mga tawo ang nag-antus ug namatay tungod sa usa ka tinuud nga katuyoan, apan wala ni usa hangtud karong panahona nga mahimo niyang buhion pag-usab ang iyang kaugalingon.

<sup>27</sup> Karon, kana ang pinakahalangdon nga semana sa kasaysayan, ang pinakadakung pagsaulog sa tanang panahon, kining Pasko sa Pagkabanhaw kon diin gipamatud-an Niya kung unsa ang Iyang gisulti. Makasulti ang tawo og mga butang, apan bisan pa man niana dili kini puedeng toohan dayon, sa bug-os, hangtud nga dili kini mapamatud-an nga mao gyud ang Kamatuoran. Ug ingon nga Dios, Nga nagsulti, “Sulayi ang tanang mga butang; kupti ninyo kung unsa ang maayo,” dili Niya isugo nga inyong buhaton ang usa ka butang nga dili Niya sarang buhaton sa Iyang kaugalingon. Busa Iyang gipamatud-an kung Kinsa kadtong namatay alang sa atong kasal-anan.

<sup>28</sup> Ug, karon, dili lamang kini usa ka adlaw sa paghandum, sa tanan niining maanindot nga mga bulak sa Pasko sa Pagkabanhaw, ug mga kalo sa Pasko sa Pagkabanhaw, ug kolor rosas nga mga rabbit, ug uban pa, nga ato ginabuhat, ug balaang pagsaulog; nga okey man kana, apan dili kini mao ang tinuud kung pagahisgotan ang maong butang.

<sup>29</sup> Sama sa ginapaningkamotan nga isulti sa mga tawo sa niining panahon, “Kinahanglan nga maghinugasay kita sa tiil kausa sa usa ka tuig, sa—sa adlaw'ng Huwebes, ug pagka-Biyernes kinahanglang magkomunyon kita,” ug tanan na nga nagkalainlaing mga doktrina sa... Nanagdibate sila mahitungod sa kung angay ba sa *niining* adlaw o sa *nianang*, o kinahanglan ba sa adlaw'ng sabbath o sa unang adlaw sa semana; o... Ang tanan na niining mga butang mga tradisyon lamang. Unsa ba'y kaayohan ang igahatag sa bisan unsa niini diha kaninyo, Magkuwaresma man kamo o dili Magkuwaresma, kung wala man pud og Kinabuhi diha kaninyo? Usa lamang kini ka paghandum. Nga, wala man ko'y supak niana, apan sa pagkatinuud sige silang pahigayon sa ilang mga tradisyon, apan nabiyaan nila ang pinakamahinungdanon nga butang.

<sup>30</sup> Dili mahinungdanon kang Satanas kung unsa ka pa ka relihiyoso, o kung unsa ka kahusto sa imong Doktrina. Kung wala kanimo kanang Kinabuhi, dili ka mabanhaw, bisan unsaon. Bisin unsa ka pa ka relihiyoso, bisin unsa ka pa ka buutan, bisin unsa pa ka daghang iglesia ang imong gipamiyembrohan o pamiyembrohan pa lang, dili kini magpulos gawas lamang nga ikaw matawo pag-usab.

<sup>31</sup> Busa, kung gibanhaw sa Dios si Jesus gikan sa mga patay, gibanhaw ba Niya Siya alang lamang sa usa ka paghandum? Ug

kini bang buntag sa pagkabanhaw usa lamang ka—usa lamang ka adlaw sulod sa usa ka tuig, o usa ra ba kini ka adlaw nga kinahanglan natong pagasaulogon? O, kita ba gyu’y mga natabangan sa Iyang pagkabanhaw? Unsa ba gyu’y kahulogan niini kanako? Unsa ba gyu’y kahulogan niini para kaninyo? Karon nagatoo kita, pinaagi sa pagtoo, nga nabanhaw Siya gikan sa mga patay, apan unsa ma’y kahilambigitan niini kanako? Duha ka libo ka tuig na man kadto ang milabay.

Karon aron makuha kini nga teksto!

<sup>32</sup> Ingon nga gikapoy ako, masakit ang akong bukton, gumikan niadtong gi-indyeksiyon sa nars kanako. Tungod kay, mogawasay man gud ko gawas sa nasud, sumala sa inyo nang nahibaloan, human niining pipila ka adlaw, ug kinahanglan kong ma-indyeksiyonan, ang akong anak ug ako. Kontra sa cholera, yellow fever, ug tanan na, mao nga gikapoy gyud ko kaayo, nga daw sa magkasakit ako. Kon diin, gikinahanglan ni Cesar nga ma-indyeksiyonan ka sa mga niini sa dili ka pa moadto sa ubang nasud. Ug miingon Siya, “Thatag kang Cesar ang iya ni Cesar, apan ihatag sa Dios ang iya sa Dios.”

<sup>33</sup> Ug samtang naglingkod ako didto, nga naghunahuna kung unsa ang iwali ko niining mga naghulat nga tigpaminaw karong buntaga; nga hilabihan kong ginapasalamat, mga kalalaken-an ug mga kababayen-an nga andam itaya ang ilang kinabuhi alang sa kung unsay imong isulti. “Unsaon ko kaha pagbuhat niini? Unsa kaha ang akong kuhaon nga teksto?”

<sup>34</sup> Ug dayon niadtong naglingkod ako didto, hapit nang makatulong, nagkagulkol ang akong pultahan, didto sa gawas atubangan sa balay. Walay laing tawo ang atua didto gawas lang kanako, sumala sa akong nahibaloan. Gipaminawan ko. Wala ko kabalo kung unsa gyud kadto. Taudtaud, ang pultahan sa akong lawak tun-anan, kon diin ako mosulod kung magtuon, nagkagulkol kini, ug daw sa may tawong ginasige uyog ang pultahan. Ug ako—miadto ako sa pultahan ug giablihan ang pultahan, ug, sa kakurat ko, usa—usa ka maanyag, gamay, kolor-mais ang buhok, kolor asul-ang-mata nga batang babaye ang nagtindog didto, daw sa usa ka gamay’ng bulak sa Pasko sa Pagkabanhaw; nga naglingkod didto ug nagatan-aw kanako niadtong higayona.

<sup>35</sup> Gitunol niya kanako ang usa ka kard. Ug kini mao ang. . . Siyempre, kasagaran sa pagpauli ko duna ko’y maabtan nga mga kard sa Pasko sa Pagkabanhaw, ug uban pa; apan nag-inusara lang kadto, sugod nga mibiya ko sa balay, nga akong nadawat. Ug miingon siya, “Igsoong Branham, kini gikan sa akong amahan ug sa ako.” Gusto niyang sigurohon nga ang “sa ako” atua gyud didto. Ug adunay arthritis ang iyang amahan, nga naglingkod sa wheelchair, ang nagpadala niadtong kard. Sa dihang gidawat ko kadto ug gipasalamat ang gamay’ng

pinangga, sa pagtalikod niya ug mibiya na didto sa pultahan, giablihan nako ang kard.

<sup>36</sup> Ug sa hulagway niadtong kard gikuha ko ang akong teksto. Tungod kay, nakasulat niadtong kard ang San Marcos 16:1 ug 2, pasubang na ang adlaw, ang adlaw misubang na. Dayon namalandong ako bahin niana, ug pagkahuman niana miabot ko sa hilisgutang “ang paghatag og kinabuhi,” mahitungod kini sa pagkabanhaw ni Jesus gikan sa mga patay, dinha ko gikuha ang akong hilisgutan.

<sup>37</sup> Karon, ang adlaw, sa pagsubang sa adlaw. Bueno, adunay usa ka panahon kon diin ang kalibutan kaniadto aduna sa bug-os nga kangitngit. Wala kini og porma, ug walay sulod. Ug bug-os kining natabunan sa tubig, ug atua kini sa kangitngit, masubo, mangiob nga kahintang. Ug ang Espiritu sa Dios naglihok sa ibabaw niadtong tubig, ug miingon, “Motungha ang kahayag.” Adunay katuyoan ang Dios aron buhaton kadto, tungod kay sa ilalum niadtong tubig atua ang mga binhi nga Iyang gitanum, ug kinahanglan nga masidlakan kadto og kahayag sa adlaw aron mabuhi.

<sup>38</sup> Ug ang nahaunang Kahayag nga gihatag ngadto sa kalibutan mao ang gilitok nga Pulong sa Dios. Ang unang Kahayag nga miigo sa yuta mao ang gilitok nga Pulong sa Dios. Miingon Siya, “Motungha ang kahayag,” ug mitungha ang kahayag. Tungod niadto giilisan sa kahayag ang kangitngit, aron mapagula ang usa ka binuhat sa kalipay ug kinabuhi ibabaw sa yuta. Dayon, ang Espiritu sa Dios, samtang namuhat Kini nga may gugma ug kalooy, niadtong dakung adlaw, ang unang adlaw sa pagsugod og paglalang ibabaw sa yuta; misubang ang adlaw ug bug-os gipasidlak, ang kasanag niini, ug gipamala ang tubig gikan sa yuta, ug naghimo og atmospera sa kahanginan. Ug, sa unang higayon niini, naghatud kadto og kalipay ug kinabuhi sa yuta, pinaagi sa usa ka binhi. Usa kadto ka halangdong takna.

<sup>39</sup> Apan, oh, bisan pa niana, ang kadto nga pagsubang sa adlaw, wala kadto kung ikumpara sa pagsubang sa adlaw nianang buntag sa Pasko sa Pagkabanhaw. Tungod sa niining higayon, pagkasaka sa adlaw ngadto sa kalangitan, naghatud kini og mas dakung pagsubang sukadsukad; tungod kay miabot kini nga may dala og mas maanindot nga balita uban niining pagsubang sa adlaw, kay sa kaniadtong pagsubang sa adlaw sa sinugdanan. Ang kini nga pagsubang sa adlaw naghatud og balita, nga, “Siya nabanhaw! Nabanhaw Siya gikan sa mga patay, sumala sa Iyang gisaad. Nabanhaw Siya gikan sa mga patay.”

<sup>40</sup> Niadtong unang higayon nga misubang ang adlaw, diha sa Genesis, naghatud kadto og mensahe nga magkaaduna og kinabuhi ibabaw sa yuta, mortal nga kinabuhi.

<sup>41</sup> Apan sa niining higayon, sa diha nga misubang ang adlaw, nagkaaduna og—og dobleng pagsubang; adunay usa pa, nga



misubang, ang Anak. Kini ang...dili lamang nga misubang ang a-d-l-a-w, misubang usab ang A-n-a-k aron maghatud og Kinabuhi Nga Walay Katapusan ngadto sa tanan nga gikasaad nga Binhi sa Dios nga pinaagi sa paghibalo-nang-daan nakita na Niya nga anaa ibabaw sa yuta.

<sup>42</sup> Kung dili puede mabuhi ang—ang mga tanum kaniadto sa sinugdanan nga walay a-d-l-a-w aron hatagan kini og kinabuhi; dili usab kini mahimo, sa karong panahona, sa dihang ang mga anak sa Dios ania sa yuta, kinahanglan niini ang Kahayag sa A-n-a-k aron mahatagan sila og Kinabuhi Nga Walay Katapusan, ang Iyang mga pinili nga mga nailhan na Niya sa wala pa ang pagkatukod sa kalibutan. Gipili na Niya sila diha sa Iyang Kaugalingon sa wala pa ang pagkatukod sa kalibutan.

<sup>43</sup> Ug sa buntag sa Pasko sa Pagkabanhaw, kaniadto, dinhi sa niining yuta napahiluna ang atong mga lawas niadtong panahona, tungod kay kita mga abog man sa yuta. Ug didto sa Langit, adunay usa ka Basahon sa handumanan, ug atua na Kaniya ang Iyang mga kinaiyahan, nga nahibalo na nga tungod nga mabanhaw man kining Anak sa Dios, banhawon usab Niini ngadto sa Kinabuhi ang matag anak nga gitagana nang daan alang niining halandong panahon. Nahibaloan Niya nga mahitabo gyud kini. Ug daw sa unsa ka mas mahimayaong pagsubang sa adlaw kana kay sa kaniadtong pagsubang sa sinugdanan, kaniadtong panahon nga una kining nagbanagbanag.

Karon, sa niining dakung pag-abli sa Selyo sa Pasko sa Pagkabanhaw!

<sup>44</sup> Karon, sa karon nagkaaduna kita og pangkontra-tuberculosis, nga selyo sa Pasko sa Pagkabanhaw. Nagapadala ang mga tawo og mensahe, sa usa'g usa, ug aron suportahan ang dakung pag-amtay o kalihokan, alang sa mga doktor ug siyensya sa medisina aron magamit sa usa ka butang, sa pagpugong o sa pagsanta sa tuberculosis. Kini mga selyo, o matawag nato nga selyo sa Pasko sa Pagkabanhaw, sa dihang nagapadala kita og mensahe sa usa'g usa. Apan sa diha nga madawat na nato ang mensahe, natangtang na kana nga selyo, tungod kay ang selyo mao man ang naglilong sa mensahe nga anaa sa sulod niini.

<sup>45</sup> Ug karon, ang tinuod nga Selyo sa Pasko sa Pagkabanhaw, sa niining pagsubang sa adlaw, natangtang na; ug ang tinago, mahitungod sa Kinabuhi pagkahuman sa kamatayon, napadayag na. Sa wala pa kana, wala pa kita nahibalo. Ang kalibutan nagsukarap sa kangitngit, nangapkap, nanalagma ang tawo. Mga teoriya ang anaa sa kasingkasing sa mga tawo, mga hinimo-himong tradisyon. Gisimba sa mga tawo ang mga diosdios. Gisimba nila ang adlaw. Gisimba nila ang tanan nang matang sa mga diosdios. Ug tanan nang matang sa mga tawo nga

nanaghimo og mga pagpang-angkon, mipaingon silang tanan sa lubnganan, ug nagpabilin sila didto sa lubnganan.

46 Apan ang tinuod nga Selyo nabadbad na, ug ang Kadtong Usa nga sa makausa nabuhi sama kanato nga buhi, namatay sama nga kita mamatay, nabanhaw gikan sa mga patay. Pagkatahum nga kabuntagon! Wala pa sukad nagkaaduna og ingon niini, sa tibuok kasaysayan sa kalibutan. Napadayag ang tinago nga Siya mao ang parehong pagkabanhaw ug ang Kinabuhi.

47 Ug miingon Siya, sa paggawas Niya niadtong buntaga, “Tungod Ako buhi, kamo usab mabuhi.” Dili lamang Siya ang nakabenepisyo sa pagkabanhaw, kondili lakip na ang tanan niadtong Binhi nga nagasalig sa dakong saad sa Dios sila makabenepisyo usab sa nianang pagkabanhaw sa Kinabuhi. Tungod kay, miingon man Siya, “Tungod Ako buhi, kamo usab mahimong mabuhi.” Kana mao ang pagtangtang sa Selyo. Tungod kay nabanhaw man Siya, busa ang matag usa nga anaa kang Cristo pagabanhawon uban Kaniya.

48 Sa niining mahimayaon nga pagsubang sa adlaw, gipamatud-an sa Dios, o gipanghimatud-an, ang Iyang Pulong. Ang tanan sa mga kadulom ug pagduhaduha nga anaa sa hunahuna sa mga tawo nahanaw na, tungod kay ania na Siya Nga sa makausa nabuhi, mikaon, miinom, ug nakig-fellowship uban sa mga tawo, nga nagaingon, “Ako adunay kagahum sa paghalad sa Akong kinabuhi; Ako adunay kagahum sa pagbuhi niini pag-usab.” Ug karon dili lamang Niya gipahayag kini, kondili gipamatud-an Niya kini Kamatuoran mismo. Oh, pagkamahimayaon nga butang kini!

49 Ako nakasiguro niining buntaga nga bisan kita, nga nagatoo niini, dili makatugkad kung unsa kadako kadto nga butang. Tungod kay nabanhaw man Siya gikan sa mga patay, nabanhaw usab kita gikan sa mga patay, tungod kay anaa na kita diha Kaniya.

50 Matikdi karon. Sa dihang gitabonan sa kadulom ang kalibutan, ug ang mga binhi dili mahimong mabuhi kung dili mosubang ang a-d-l-a-w, ug natabonan sa kadulom ang yuta. Ug karon ang A-n-a-k misubang na, ug ang tanang kadulom nahanaw na tungod niining Kahayag, samtang nagakaylap Kini latas sa mga nasud, sa mga tawo, nga, “Wala Siya dinhi, kondili nabanhaw na Siya!” Daw sa—pagkamaanindot nga pamahayag! Gipamatud-an Niya ang Iyang Pulong. Gipamatud-an Niya nga ingon niini Kini, nga tinuod gayud, tungod kay nabuntog na Niya ang kamatayon, ang hades, ug ang lubnganan.

51 Ang trinidad sa yawa; ang kamatayon, impiyerno, ug ang lubnganan; tungod kay si Satanas mao ang awtor sa kamatayon, siya ang naghawid sa impiyerno, ug lakip na ang lubnganan. Ug kana ang trinidad ni Satanas, nga nahimong resulta sa

usa ka butang, kana ang kamatayon. Tungod sa kamatayon, mopadulong ka sa lubnganan; ug ingon nga usa ka makasasala, mopadulong ka sa impiyerno. Usa ra ka ka butang ang tanan, ang trinidad ni Satanas, nga mao ang kamatayon. Nga gibihag ang tawo sa tanan na niining mga katuigan.

<sup>52</sup> Apan karon ang tinuod nga trinidad nga iya sa Dios, ingon nga Siya Usa ra napadayag diha kang Cristo, Kinsa mao ang Kinabuhi, ug mao ang nagtangtang sa mga Selyo ug nagbuntog sa kaaway, ug nabanhaw, ang usa ra ka tinuod ug buhi nga Dios. “Ako mao Siya nga namatay, ug Ako buhi hangtud sa kahangturan, ug ania Kanako ang mga yawi sa kamatayon ug sa hades.” Ang Dios, nga Usa ra, nga nagpaka-Tawo, ug nagpuyo ipon kanato, ug nagbuntog sa matag kaaway. Ug nagpamatuod nga nabuntog na ang trinidad nga iya ni Satanas, ug ang Trinidad nga iya sa Dios napadayag na, 'kay bugtong ang Dios lamang ang adunay gahum sa pagpabalik pag-usab sa Kinabuhi. Siya kadto si Emmanuel. Ang Dios nga napadayag diha sa unod.

<sup>53</sup> Dili ikatingala nga mahimong angkonon Niya diha, sa ika-27 nga kapitulo sa Mateo, “Ang tanang kagahum sa Langit ug sa yuta gikahatag na sa Akong kamot. Gipadala Ko kamo aron mahimong Akong mga saksi, sa tibuuk kalibutan.” Parehong gibuntog Niya ang kamatayon, ang impiyerno, ug ang lubnganan. Dili lamang kana ang Iyang gibuhat; ug nabanhaw, nga nagmadaugon, uban ang tanan nga kagahum sa Langit ug sa yuta. Ang tanan nga anaa sa Amahan, ang tanan nga anaa sa Balaang Espiritu, ug ang tanang uban pa nga atua kaniadto, anaa diha Kaniya. “Ang tanang kagahum sa Langit ug sa yuta gikahatag nganhi Kanako.” Ang tanang uban pa wala na’y gahum. Nabuntog na Niya kini.

<sup>54</sup> Karon! Ug dayon, dili lamang kana, nagpadala Siya og Pulong ngadto sa Iyang mga tinun-an, ang Iyang mga magtotoo. “Ayaw kahadlok, kay Ako kadto Siya nga namatay, ug nabuhi pag-usab hangtud sa kahangturan. Ug ania Kanako ang mga yawi sa kamatayon ug impiyerno; nabuntog Ko na kini. Ayaw na pagkahadlok, kay ang matag gikatakda-nang-daan, predestinadong Binhi sa Dios mabuhi gayud pagmodan-ag na kana nga Kahayag sa tibuuk kalibutan, ang mahimayaong Ebanghelyo. Sa matag kapanahonan, magpagawas Kini og ani nga maoy gisugo sa Dios Niini nga buhaton.” Nabanhaw Siya gikan sa mga patay.

<sup>55</sup> Oh, pagkahibulongang butang kana nga, “Ako buhi, o nabuhi.” Ang maong pulong nagakahulogan, ang pulong *nabuhi*, sa Griegong pulong nagkahulogan kana og usa ka butang nga “nabanhaw human sa kamatayon.”

<sup>56</sup> Sama sa—sa binhi nga gitatum ngadto sa yuta, kinahanglan niini nga mamatay, ang matag tipik sa maong binhi. Kinahanglan niini nga madugta, ang matag tipik sa maong

binhi. Ug ang matag tipik sa kinabuhi, nga anaa sulod sa binhi, kinahanglan nga mabuhi pag-usab.

<sup>57</sup> Siya “nabuhi.” Dili lamang niana. “Ug ipadala Ko ang mao mismong Kinabuhi nga nagbuhi Kanako, ang Gahum nga nagpagawas Kanako gikan sa lubnganan, Akong ipadala Kini nganha kaninyo, aron buhion kamo, aron nga diin gani Ako atua usab kamo.”

<sup>58</sup> Sa Lucas, ika-24 nga kapitulo, ika-49 nga bersekulo. Miingon Siya, “Tan-awa, igapadala Ko kaninyo ang saad sa akong Amahan; apan pabilin una kamo, o magpaabot kamo, sa siyudad sa Jerusalem, hangtud nga masul-oban na kamo og Gahum gikan sa Kahitas-an.” Aron mapakita nga dili lamang Siya ang nakabenepisyo gikan niini, kondili gipaambit Niya usab kana nga mga benepisyo.

<sup>59</sup> Mianhi Siya aron magtubos, o maghatud og Kinabuhi, niadtong predestinadong Binhi nga nakita na sa Dios sa wala pa ang pagkatukod sa kalibutan ug gibutang ang ilang mga ngalan diha sa Libro sa Kinabuhi. Ug ania na sila sa yuta, nga wala’y paglaum; Siya mianhi dili lamang aron mahimong Panalangin, kondili aron ipaambit ang mga Panalangin ngadto sa matag predestinadong Binhi. Karon, kung ang Binhi wala sa yuta, dili gyud kini mabuhi. Kinahanglan nga anaa gyud kini sa yuta, ug miturok usab. Bisan kung unsa pa kadugay Kini nga naitago diha sa kangitngit, motubo gyud Kini pagmasidlakan Kini sa A-n-a-k. Matikdi karon, mianhi Siya aron ipaambit Kini kanato.

<sup>60</sup> Dili ikahibulong nga ang Ebanhelyo maoy maayong balita. Ang mismong pulong nga *Ebanghelyo* nagkahulugan og “ang maayong balita.” Ang maayong balita, nga unsa? Kung ang usa ka tawo namatay alang kanato, kana ang maayong balita. Kung si Cristo natawo, kana ang maayong balita. Apan wala pa sukad nabalita, wala gyud nagkaaduna og balita nga sama niining balita, nga, Siya Nga naghatag og saad nagpamatuod sa maong saad, nga, “Siya gayu’y buhi hangtud sa kahangturan, ug ang mga yawi sa kamatayon ug impiyerno, anaa sa Iyang kamot.” Ang tanang kadulom nahanaw na. Wala na’y kadulom nga makita pa, kay ang Anak nabanhaw na gikan sa lubnganan. Wala na’y, “Bueno, moabot Siya, o tingali moabot Siya.” Miabot na Siya, ang Ebanghelyo, ang maayong balita!

<sup>61</sup> Matikdi, ang pinaka Mensahe sa Ebanghelyo, Mismo, maoy pamatud-an ngadto sa mga tawo nga Siya nabanhaw. “Lakaw og sultihi ang Akong mga tinun-an nga Ako nabanhaw gikan sa mga patay, ug makigtabo Ako kanila, aron sa pagpanghimatuod niini ngadto kanila.” Oh Dios, kung unsa sa niining katapusang adlaw magkaaduna og Kahayag pag-usab sa tibuok yuta! “Ug pamatud-an Ko ngadto sa Akong mga tinun-an! Lakaw og sultihi sila nga dili Ako patay, ug dili Ako usa ka tradisyon, kondili Ako usa ka buhing Cristo. Makigtabo Ako kanila.

Dalha kining Mensahe ngadto sa Akong mga tinun-an, nga Ako nabanhaw gikan sa mga patay,” ang Ebanghelyo, ang maayong balita.

Moingon kamo, “Husto ba kana?”

<sup>62</sup> Ang giingon sa Mga Hebreohanon 13:8, “Siya mao sa gihapon kagahapon, karon, ug hangtud sa kahangturan.” Kita, nga Iyang mga benepisaryo, maoy magapamatuod nga ang Iyang Kinabuhi ania na kanato karon, ingon nga mga benepisaryo sa niining Kinabuhi. Ang Kinabuhi, wala pa og kinabuhi nga gikinabuhi nga sama niini; Siya ang Anak sa Dios. Ug Siya namatay, ug kana ang nagsirado niini; apan sa dihang Siya nabanhaw pag-usab gikan sa mga patay, niadtong buntag sa Pasko sa Pagkabanhaw, kung ingon niana kita, ingon nga mga alagad Niya, gisugo Niya nga isangyaw sa tibuok kalibutan ug dalhon kining maayong balita ngadto sa matag tawo, nga Siya buhi. Ug unsaon man nato sa pagbuhat niini pinaagi ba sa Pulong lamang? Kay nahisulat na, “Ang Ebanghelyo wala moabot pinaagi sa Pulong lamang, kondili pinaagi sa gahum ug sa pagpadayag sa Espiritu Santo, aron sa pagpanghimatuod nga Siya buhi.”

<sup>63</sup> Karon, kung adunay uban pang ebanghelyo, sama sa gisulti ni Pablo sa usa sa mga grupo kaniadto, “Nasorpresa gayud ako nga mibalhin kamo ngadto sa ubang ebanghelyo.” Nga walay lain, kondili usa ra ka hinimo-himo nga ebanghelyo, sa usa ka denominasyong tinumotumo, nga misimang gikan sa maayong balita.

<sup>64</sup> “Ug tungod kay Ako buhi, kamo usab mabuhi. Ug Ako magapuyo sulod kaninyo, ug ang mga buhat nga Akong ginabuhat,” Juan 14:12, “ang mga buhat nga Akong ginabuhat ang magapaila Kanako diha kaninyo.” Grabe nga Mensahe! Dili ikatingala, nga nagkaaduna kita og usa ka mangitngit nga kalibutan sa teolohiya, apan sa panahon sa kagabhion adunay moabot nga Kahayag pag-usab. Magkaaduna og pagkabanhaw sa panahon sa kagabhion. Kini mahimong Kahayag sa panahon sa kagabhion.

<sup>65</sup> Karon, ang mismong pinaka-unod sa Mensahe nga gipadala, mao nga, “Siya nabanhaw gikan sa mga patay,” og kita nga mga benepisaryo Niya, kita nga nanagpakaambit uban Kaniya sa maong pagkabanhaw, nakabenepisyo niini, pinaagi sa pagpanghimatuod ngadto sa kalibutan nga Siya buhi. Dili nato kini mahimo pinaagi sa pulong lamang. Dili nato kini mahimo pinaagi sa tawhanong tradisyon. Ginapakita lang nato sa eksakto kung unsa ang atong ginapunto.

<sup>66</sup> Nahadlok ako nga kadaghanan kanato karon wala ginaagak ang mga tawo ngadto kang Cristo. Ginaagak nato sila ngadto sa simbahan, ngadto sa usa ka teorya. Apan kinahanglan nato nga dalhon sila ngadto kang Cristo. Siya lamang ang bugtong Usa,

ug ang bugtong Usa nga aduna og Kinabuhi. “Siya nga aduna kaniya ang Anak adunay Kinabuhi.”

<sup>67</sup> Ug pagmosidlak kanimo ang kinabuhi sa usa ka tawong namatay, magkinabuhi ka sa mao mismong kinabuhi nga iyang gikinabuhi.

<sup>68</sup> Kung ang dugo sa usa ka tawo aduna og iyahang tipo, ug gikuha mo ang tibook dugo sa maong tawo ug gipulihan og lahi, sigurado nga mamahimong lahi na nga tipo kana nga dugo.

<sup>69</sup> Ug kung ang espiritu nga anaa kanimo giisip na nga patay, ug gidihogan ka sa Kinabuhi nga atua kaniadto kang Cristo, maanaa gyud Kini kanimo! Miingon ang Mga Taga-Roma 8:11, “Kung ang Espiritu nga nagbanhaw kang Cristo gikan sa mga patay, nagapuyo sulod kanimo, pagabuhion Niini usab ang imong mortal nga lawas,” sa nianang mao rang Kinabuhi, nianang mao rang mga gahum, nianang mao rang mga benepisyo, nga atua Kaniya kaniadto sa dihang dinhi pa Siya sa yuta, nga mga gikan sa Dios. Gitubos ka Niya, usa ka Binhi nga atua na kaniadto pa sa daang-pagkahibalo sa Dios, nga ang mga ngalan nahisulat na sa Basahon sa Kinabuhi sa Cordero sa wala pa ang pagkatukod sa kalibutan.

<sup>70</sup> Ug kana ang Kahayag sa Ebanghelyo sa pagkabanhaw, ang kapanghimatuuran sa Pulong! Giunsa man nato pagkahibalo nga Siya mao ang Cristo? Tungod kay gipamatud-an Niya kung unsa ang Iyang gisulti. Unsaon ko man sa paghibalo sa Mensahe sa kapanahonan? Ginapamatud-an sa Dios kung unsa ang Iyang gisaad, ug isulti Niya kini. Ingon niana ang ilhanan, nga kita mga benepisaryo uban Kaniya diha sa pagkabanhaw. Ginapamatud-an Niya kung unsa ang Iya kaniadtong mga gisulti.

<sup>71</sup> Kung unsa ang gisaad Niya nga pagabuhaton kang Cristo, gipamatud-an Niya niadtong pagkabanhaw. Kung unsa ang gisaad Niya nga pagabuhaton sa mga adlaw ni Moises, gipamatud-an Niya kini. Kung unsa ang gisaad Niya nga pagabuhaton sa mga adlaw ni Enoc, gipamatud-an Niya kini. Sa tanang mga adlaw sa mga apostoles, gipamatud-an Niya kini.

<sup>72</sup> Karon sa niining panahon, ginapamatud-an Niya kung unsa ang Iyang gisulti, tungod kay kabahin man sila sa nianang Binhi nga girepresentar diha sa Libro sa Kinabuhi nga gianhian Niya aron tubson pabalik sa Dios pag-usab. Oh, pagkamaanindot nga Mensahe!

<sup>73</sup> Sa buntag sa Pasko sa Pagkabanhaw, dili lamang Siya ang nabanhaw, kondili ang Iyang mga benepisaryo nabanhaw uban Kaniya. Siya . . . Anaa sila kang Cristo didto sa paglansang Kaniya. Anaa sila Kaniya sa pagkabanhaw Niya. Kita ang Iyang mga benepisaryo, nga mga gibuhi human nga namatay diha sa kangitngit.

<sup>74</sup> Ang mangitngit nga kalibutan sa dili-pagtoo, kon diin ang mga simbahan ug mga denominasyon, ug uban pa, maoy nagapahisalaag kanato. Ug may sa kung unsang butang sa sulod kanato nga nagapanawag, “Oh, ang Dios ang atong gusto! Gigutom kita ug giuhaw sa Dios.” Nagpamiyembro kita sa Methodist, Baptist, mga Pentecostal, mga Presbyterian, ug unsa pa, ug aduna sa gihapon og kulang, wala lang nato Kini nakaplagan. Ug sa kalit lang, samtang nagapangapkap kita diha sa kangitngit, ang dakung pagkabanhaw miabot kanato sa dihang naipadayag ang gisaad nga Pulong sa Dios.

<sup>75</sup> Sama nga, Siya ang kapadayagan sa gisaad nga Pulong sa Dios. “Dili Ko pagabiyaan ang Iyang kalag didto sa sheol, ni motugot Ako nga ang Akong balaang Usa makakita og pagkadunot.” Gipadayag Niya Kini, ang matag Pulong sa Dios nga gisaad ngadto Kaniya. Gipamatud-an Niya kini sa dihang nabanhaw Siya niadtong buntag sa Pasko sa Pagkabanhaw.

<sup>76</sup> Karon, sila nga kaniadto nagapangapkap sa kangitngit ug nagakalibog, kung kinahanglan ba gyud sila nga maghugas og tiil sa *niining* panahona, o kung kinahanglan ba nila magsaulog og unsa man nga adlaw, o mosunod ba sa unsa mang kalagdaan, ang tanan nianang mga butang milabay na. Tungod kay, nagkaaduna na og mahimayaong pagkabanhaw nga nagpaimbalido sa tanang butang nga binuhat-sa-tawo sukad-sukad, sa tanang binuhat-sa-tawo nga mga pangatarungan.

<sup>77</sup> Wala pa sukad nagkaaduna, hangtud niadtong panahona, og usa ka tawo nga mahimo niyang ibuwis ang iyang kinabuhi ug pagkahuman banhawon kini pag-usab. Inimbalido Niya ang siyentipikong kapanghimatuuran nga aduna sila, pinaagi sa pagkabanhaw.

<sup>78</sup> Sa dihang ginasulti nila, nga, “Si Jesus Cristo dili mao sa gihapon kagahapon, karon, ug hangtud sa kahangturan,” nga, “Ang Iyang Gahum dili na sama kaniadto,” nga, “Ang Iyang Ebanghelyo dili na sama kaniadto,” samtang ginaingon sa Biblia nga mao ra gihapon Kini! Gisupak sa Dios ang matag denominasyon, matag kredo, ug mipadayon Siya pinaagi sa Iyang Iyang Balaang Espiritu, sama sa Iyang gisaad, ug gipamatud-an kini kanato, nga Siya buhi.

<sup>79</sup> Kita ang mga benepisaryo sa Iyang pagkabanhaw, gibuhi human nga namatay sa kalibutan, sa sala ug kalapasan. “Gibuhi Niya kita uban Kaniya, gibanhaw uban Kaniya, karon napahimutang na sa Langitnong mga dapit diha kang Cristo Jesus.” Ginadala Niya . . .

<sup>80</sup> Ang Iyang Espiritu mao ang naghatag sa Iyang mao rang Kinabuhi pag-usab dinhi sa yuta. “Kung ang Espiritu sa Dios, nga nagbanhaw kang Cristo,” nga nagbanhaw sa lawas, ang dinihogang lawas; kung dinihogan sa Espiritu sa Dios ang maong lawas sa ingon nianang paagi, nga sa dihang nahulog ang Binhi

dinhi sa yuta, wala Niya pasagdi nga Siya magpabilin lang didto. Wala. Iyang gibuhi Siya ug gibanhaw Siya. “Ang mao ra nga Espiritu,” pinaagi sa mao rang mga buhat, sa mao rang Gahum, sa mao rang mga ilhanan, “pagmopuyo Kini kanimo, pagabanhawaon ka Niini usab.”

<sup>81</sup> Gusto kong magbasa og mubong Kasulatan dinhi alang kaninyo. Gusto kong ablihan ninyo sa usa pa nga Kasulatan nga gisulat ko dinhi. Tingali makatabang kini og gamay kaninyo. Makita kini diha sa Basahon sa Levitico, ang ika-23 nga kapitulo, sa ika-9 hangtud sa ika-11 nga bersekulo. Paminaw og ayo. Sa balaod, sa balaod sa Levitico, ang Dios nga nakigsulti kang Moises. Paminawa. Ang tanan niini mga tipo karon, ug mohunong kita dinhi sa makadiyut aron hisgotan kining mga tipo.

*Ug misulti ang GINOO kang Moises, nga nagaingon,*

*Isulti mo sa mga anak sa Israel, ug ipamulong mo kanila, Sa dihang kamo . . . pagsulod ninyo sa yuta nga Akong ihatag kaninyo, . . .*

<sup>82</sup> “Ngadto sa lugar, sa posisyon, nga gihatag ko kaninyo. Karon isulti mo sa mga anak sa Israel, nga pag-abot ninyo sa mismong dapit nga gisaad Ko nga didto Ko kamo dad-on, pag-abot ninyo didto sa niadtong yuta.” Karon dinhi ginahisgotan sa natural, nga ginatipo sa espirituwal.

*. . . ug magaani kamo sa abut niini (nadawat na ninyo kung unsa ang akong gisulti Ko kaninyo), nan kamo magadala ngadto sa sacerdote og usa ka binangan nga inunahan sa mga unang bunga sa inyong pag-ani:*

*Ug itabyog niya ang binangan sa atubangan sa GINOO, aron kini pagadawaton alang kaninyo: sa pagkaugma sa tapus ang adlaw nga igpapahulay ang saserdote magatabyog niini.*

<sup>83</sup> Kung aduna og unsa mang balaang ritwal, kinahanglan kini nga pagabuhaton sa adlaw’ng sabbath, nga maoy ikapitong adlaw sa semana, nga mao ang Sabado. Apan namatikdan ba ninyo, sa pagsaulog niini, pagatabyogon kini sa unang adlaw sa semana?

<sup>84</sup> “Ang binangan, nga mao ang una sa inyong binhi nga inyong gitanum, pagmitubo na kini ug mahinog, anihon ninyo ang maong binangan ug dad-on kini ngadto sa saserdote. Ug ipakuha kini kaniya ug pagatabyogon kini sa atubangan sa Ginoo, alang sa pagdawat kanimo, nga nadawat ka na. Nagaadto ka didto nga dala ang imong binangan, ug iyang pagatabyogon kini sa atubangan sa Ginoo, sa . . .”

<sup>85</sup> Dili sa sabbath, nga ikapitong adlaw; kondili sa unang adlaw, nga gitawag nato nga Dominggo, S-u-n-d-a-y.



<sup>86</sup> Siyempre, kana'y usa—usa ka Romanhong pulong, nga gitawag nila nga adlaw'ng natawhan alang sa diosdios nga adlaw. Apan nausab na kini!

<sup>87</sup> Dili na kini s-u-n. Kini S-o-n d-a-y na, ang adlaw sa Anak, nga kanang lugas sa Trigo (ang pinaka Una nga iya sa Dios nga nabanhaw gikan sa mga patay) mao ang pagatabyogon ngadto sa kongregasyon, nga kita ang Iyang Binhi; ug kana mao ang unang Binhi sa niadtong mga nangatulog, nga gitabyog sa unang adlaw sa semana. Sa adlaw'ng Dominggo, nabanhaw Siya. Miwarawara sa pagpanamilit, ug misaka ngadto sa Kahitas-an, sa atubangan sa mga tawo.

<sup>88</sup> Matikdi, Kadto mao ang unang lugas sa Trigo sa Dios nga nabanhaw gikan sa mga patay, ang unang lugas sa Trigo sa Dios. Pinaagi sa Gahum sa Dios nga makapabuhi, gibuhi sa Dios ang Iyang kinabuhi, gibanhaw Siya gikan sa mga patay, ug Siya ang nahimong Inunahang-bunga niadtong mga nangatulog, ang Inunahang-bunga. Siya kadto ang Binangan.

<sup>89</sup> Mao nga kinahanglan nilang itabyog kanang binangan, tungod kay kini ang unang miabot sa pagkagulang. Ug igatabyog kini ingon nga usa ka handumanan sa pagpasalamat sa Dios, nga nagatoo nga ang uban pa niini moabot. Kini maoy usa ka ilhanan.

<sup>90</sup> Ug, sa niining adlaw, tungod kay Siya ang unang Anak sa Dios nga miabot sa hustong gulang, aron mamaanaa sa Dios, Siya gibangon gikan sa yuta ug gitabyog ibabaw sa mga tawo. Oh, daw sa unsa ka mahimayaong pagtulon-an! Pinaagi sa makapabuhing Gahum, ang Maong pinakauna! Bisan pa, Siya—Siya dugay nang naitipo; ug makadaghang higayon, ingon nga makita nato sa ulahi, nga naitipo gayud Siya. Apan kini ang mismong Inunahang-bunga niadtong mga nangatulog. Siya gitabyog ibabaw sa mga gisaad nga Binhi nga adunay saad sa Kinabuhi.

<sup>91</sup> Siya gitabyog sa Adlaw sa Pentecostes, “sa dihang adunay miabot nga dahunog gikan sa Langit sama sa usa ka nagatabyog-tabyog, nagahaguros nga makusog nga hangin,” ug gitabyog ngadto sa mga tawo, sa mga tawong Pentecostal nga atua niadtong Pentecostes, nagahulat sa pag-abot sa Panalangin.

<sup>92</sup> Ug igatabyog Siya pag-usab, sa nasabtan nato, sa kaulahiing adlaw, sumala sa Lucas 17:30, sa adlaw na usab sa Anak, “sa adlaw nga ang A-n-a-k sa tawo igapadayag,” o igatabyog pag-usab ngadto sa mga tawo.

<sup>93</sup> Karon, Kinsa ang Anak sa tawo? “Sa sinugdan mao ang Pulong, ug ang Pulong kauban sa Dios, ug ang Pulong Dios. Ug ang Pulong nahimong unod, ug nagpuyo ipon kanato.” Ug kung ang tanan nga pagtulon-an nga aduna kanato, ug ang kapanghimatuuran sa Pulong sa Dios; pinaagi sa Pulong sa Dios, pinaagi sa mga ilhanan, pinaagi sa mga katingalanan,

makita nato karon, nga sa Libro ni—ni Lucas dinhi, nga bag-ohay pa lang nato gikutlo, o ang—ang ika-17 sa Lucas ug ika-30 nga bersekulo; ug ang Malaquias 4, ug ang nagkalainlaing mga Kasulatan nga pamilyar kanato, nga ang Pulong gitabyog na usab ngadto sa mga tawo, nga ang mga tradisyon sa tawo patay, ug nga ang Anak sa Dios buhi tungod sa bautismo sa Balaang Espiritu mismo sa atong taliwala, ug nagahatag kanato og Kinabuhi.

<sup>94</sup> Maingon nga si Cristo ang pinaka Unang nabanhaw, gikan sa tanang mga propeta, ug uban pa; bisan pa gitipo sa daghang mga dapit, Siya mao ang Inunahang-bunga niadtong mga nangatulog. Diha sa Pangasaw-onon, sa pag-abot ni Cristo, sa mga nanggawas sa iglesia, magkaaduna og usa na usab ka Binangan nga igatabyog sa kaulahiing mga adlaw. Oh, grabe!

<sup>95</sup> Pagtabyog sa binangan! Unsa man kaniadto ang binangan? Ang pinakaunang miabot sa pagkagulang, kanang pinakauna nga nagpamatuod nga trigo kini, nga nagpamatuod nga kini usa ka binangan.

<sup>96</sup> Alleluyah! Sigurado ko nga nakita ninyo kung unsa ang akong ginahisgotan. Kini gitabyog ngadto sa mga tawo. Ug sa unang higayon adunay migula, alang sa usa ka kapanahonan sa Pangasaw-onon, alang sa usa ka pagkabanhaw gikan sa mangitngit nga denominasyonalismo, usa ka Mensahe, kon diin ang bug-os nga pagkagulang sa Pulong mibalik pag-usab diha sa bug-os nga Kagahum Niini, ug ginatabyog na ngadto sa mga tawo, pinaagi sa mao rang mga ilhanan ug mga katingalahan nga gibuhat Niya kaniadto.

<sup>97</sup> “Tungod kay Ako buhi, kamo usab mabuhi,” nga nagapakigsulti sa Iyang Asawa. “Tungod kay Ako buhi, kamo usab mabuhi.” Pagkamaanindot nga pagkabanhaw kadto! Ug daw sa unsa ka maanindot nga pagkabanhaw kini, nga mabuhi gikan sa mga patay, “ang mabuhi diha kang Cristo Jesus,” pinaagi sa Gahum sa Dios nga makapabuhi.

<sup>98</sup> Siya gitabyog ngadto kanila. Ang Pulong, nga Siya mao kaniadto, gitabyog kanila niadtong Adlaw sa Pentecostes, ang Pulong nga napadayag. Karon, ug sama sa gisulti ko, Kini pagatabyogon pag-usab sa kaulahiing adlaw. Karon, pananglitan. . .

<sup>99</sup> Moingon kamo, “Bueno, karon, sa kadali lang, Igsoong Branham. Adunay iglesia nga akong nahibaloan nga . . .” Bueno, ako nahibalo, usab. Kita n’yo?

<sup>100</sup> Apan karon, pananglitan, unsa kaha kung—kung mobiyahe kita pabalik sa Tucson karong hapon, karon, ug ang matag usa kanato adunay usa ka . . . mosakay sa usa—usa ka dakung Cadillac, bag-o pa gyud? Ug ang tanang lingkoranan niini gama sa—sa panit sa bayeng lagsaw, pinakahumok nga panit, humok ug hayahay lingkoran; ug haruhay’ng mga salog; ang manobela

inubog-sa-nikel ug puno kini og mga butones nga diamante; ug ang makina nasulayan na nga husto gyud nga makina; ug ang mga ligid . . . kumpleto og mga bearing ug grasado na; ug ang mga ligid dili-mabuslot ug dili-mobuto; ug ang tibuok niini siyentipikanhon nga aprobado gayud.

<sup>101</sup> Gigawas nga ang duha niini gikan sa pabrika, nga parehong, ug pareho silang puno og gasolina. Kana ang puwersa niini aron modagan, ang gasolina, tungod kay anaa kini og octane. Apan karon kung paandaron mo na sila, bisan pa nga magkapareho sila, apan ang usa kanila walay aligato, kanang butang nga magpaandar niini.

<sup>102</sup> “Bueno,” moingon mo, “ang puwersa anaa man sa gasolina, Igsoong Branham.” Apan dili ko igsapayan bisan unsa pa ka kusog nga puwersa ang anaa sa gasolina; gawas kung adunay aligato dinha aron magpaandar sa nianang puwersa, gawas kung aduna dinha og biti aron magpamatuod nga kana’y gasolina gayud, kay basin tubig ra diay kana. Hangtud . . .

<sup>103</sup> Bisan unsa pa ang ginapahayag sa mga teologo, unsa pa ka organisado ang inyong iglesia, unsa pa ka taas nga edukasyon ang anaa kaninyo, unsa pa ka susama sa Biblia; gawas nga ang tinabyog nga Binangan, gawas nga kunsaran sa Balaang Espiritu ang maong tawo aron buhion kanang Pulong! Ang gasolina nagarepresentar sa Pulong. Kini ang Kamatuoran; apan, kung wala ang Espiritu, dili gyud Kini moandar.

<sup>104</sup> Mas gihatagan nato og gibug-aton ang mga Mekanika ug wala man lang ang Dinamika. Kini nagkinahanglan og dinamikang Gahum sa Dios, ang Gahum sa pagkabanhaw ni Jesus Cristo nga maanaa sa Iglesia, aron maipadayag ug mapamatud-an nga *Kini* gayu’y gasolina. Tingali anaa kini sulod sa usa ka lata pang-gasolina; posible gihapon nga tubig ra kini, kita n’yo. Apan ang bugtong kapanghimatuoran niini, maoy, ibutang kining Kinabuhi diha niini, ug pagpapamatud-ani Niini kung kini ba gayud gasolina o dili.

<sup>105</sup> Ug kung sulayan mong ibutang ang Balaang Espiritu sa usa ka denominasyon, sama ra nga imong gisulayan . . . Makadungog ka og pagpusot-pusot; gubaon mo lang ang imong makina, tungod kay puno kini og karbon.

<sup>106</sup> Apan, oh, nalipay gayud ako nga adunay Puwersa nga napulo ka libo ang octane, ang Pulong sa Dios ug usa ka Espiritu Santo nga maoy modagkot Niini, ug buhion ang Gahum sa Dios diha sa kinabuhi sa usa ka tawo, o kinabuhi sa usa ka babaye, o usa ka iglesia. Kana ang mopadagan nianang Cadillac diha sa dalan, ilalum sa dinamikang Gahum sa Espiritu Santo nga mibalik ug gitabyog kaniadto ibabaw sa mga tawo niadtong Adlaw sa Pentecostes, nga ginahimo Siyang mao ra sa gihapon kagahapon, karon, ug hangtud sa kahangturan.

<sup>107</sup> Kadto ang unang Binangan nga mibangon gikan sa mga propeta, nga mao ang Anak sa Dios, ang Hari sa tanang mga propeta.

<sup>108</sup> Nagkaaduna na og mga iglesia, mga iglesia, mga pangasaw-onon, mga pangasaw-onon, mga iglesia, mga pangasaw-onon, mga pangasaw-onon.

<sup>109</sup> Apan aduna gyu'y Usa nga kinahanglan moabot! Alleluya! Kinahanglan adunay moabot nga usa ka tinuod nga Pangasaw-onon! Kinahanglan gayud nga adunay moabot nga Usa nga dili lamang Mekanika ang dala, kondili lakip ang Dinamika Niini, nga maoy nagahatag og kinabuhi nianang Iglesia, nga magpalihok Niini diha sa Gahum sa Iyang pagkabanhaw. Gawas lang kung moabot kita nianang punto, gawas lang kung makaplagan nato kanang dapita, unsa ma'y kaayohan ang mahatag sa pagpasinaw sa mga pusod sa ligid? Unsa ma'y pulos sa pagpaguwapo niini o sa pagpasinaw niini og ayo, kung walay Dinamika diha niini? Bisan giunsa pa pagpamatud nga husto ang Mekanika, kinahanglan gyud nga adunay Dinamika aron mapaandar Kini.

<sup>110</sup> Kana ang gipamatud-an Niya! Alleluya! Kana ang gipamatud-an sa Pasko sa Pagkabanhaw. Dili lamang Siya ang Pulong, kondili Siya gayud Mismo ang Dios, ang Dinamika, nga anaa sa Pulong. Mao kadto ang nagpahimo sa lawas ni Jesus Cristo (nga bugnaw na kaniadto, tuskig, ug patay, na sa lubnganan) nga mapukaw ngadto sa pagka-Buhi ug nabanhaw, ug giligid ang bato. "Ako mao Siya nga namatay," namatay gayud nga bisan ang adlaw nagsulti nga patay na Siya, ang bulan nagsulti nga patay na Siya, ang mga bitoon nagsulti nga patay na Siya. Ang tanang kinaiyahan nagsulti nga patay na Siya. Ug karon kinahanglan nga maamgo sa tibuok kalibutan nga nabanhaw Siya. Dili lamang Siya ang Mekanika, ang Pulong sa Dios, Siya pud ang Dinamika aron pamatud-an Kini.

<sup>111</sup> Ug maingon nga Siya, mao ang Pamanhonon, kinahanglan mabanhaw usab ang Pangasaw-onon, tungod kay Kini kabahin man Niya. Ug Kini wala na'y lain kondili ang manipestasyon sa katumanan sa tanang mga kapadayagan nga gihisgotan sa tanang uban pa mahitungod sa Pangasaw-onon; mapadayag gyud Kini. Kung magabuhat kini og usa ka buntang nga lahi sa Pamanhonon, dili kini ang Pangasaw-onon. Tungod kay, ang Pangasaw-onon unod sa Iyang unod, bukog sa Iyang bukog; Kinabuhi sa Iyang Kinabuhi, Gahum sa Iyang Gahum! Ang Pangasaw-onon maoy Siya! Maingon nga ang lalaki ug babaye usa ra, ug ang babaye gikuha gikan sa iyang kiliran; Ang Pangasaw-onon ang mikuha sa Espiritu, ang Espiritu pangbabaye, gikan Kaniya. Ang unod gikan sa Iyang kilid, nga pareho nahimong Mekanika ug Dinamika, ang Asawa. Ang Espiritu Niya ug ang unod Niya, ug giusa ra kini, ug nagmugna

og Mekanika ug Dinamika. Hangtud nga ang iglesia o ang mga tawo . . .

<sup>112</sup> Ang tanan niining mga koneho sa Pasko sa Pagkabanhaw, ug mga seremonya, ug dagkung mga simbahan, ug mga magarborg sinul-oban, mangapakyas ug mangahanaw ra.

<sup>113</sup> Hangtud nga ang Iglesia mamahimong parehong Dinamika ug Mekanika; ug anaa ang Espiritu sa Dios, nga nagapalihok Kaniya, aron buhaton ang mga butang nga Iyang gibuhat kaniadto! Kung miabot Siya og dise-sais ka silindro, mao usab ang Pangasaw-onon. Amen! Tungod kay gisulti Niya, sa Juan 14:12, “Ang nagatoo Kanako, magabuhat sa mao usab nga mga buhat nga gibuhat Ko. Pagakargahan Ko siya sa Akong Dinamika, diha sa iyang Mekanika, nga ang kalibutan dili makaadang niini; ug pagabanhawon Ko siya sa kaulahiang adlaw.” Kana ang Mensahe sa Pasko sa Pagkabanhaw, ang Dinamika ug ang Mekanika, nga giusa ra! Ang Mekanika nga wala’y Dinamika, wala’y pulos; mao usab ang Dinamika, nga wala’y Mekanika.

<sup>114</sup> Makahimo ka nga magsiyagit ug magsinggit, ug maglukso-lukso, tanang gusto mo, ug isalikway kining Pulong, dili kini makahatag og unsa man nga kaayohan. Gipasaba-saba mo lang ang—ang mga piston sa . . . Aduna ka og pangpaaligato, apan walay gasolinang pagaaligatohan niini.

<sup>115</sup> Moandar lang kini kung magkauban kining duha. Amen! Busa, ang usa mabilin, ug ang Usa pa mokayab. Ingon niana lang ang masulti bahin niini. Pero, mahimong magkapareho sila, parehong nagaangkon nga mga iglesia, parehong nagaangkon nga mao ang Pangasaw-onon. Apan Usa ra ang adunay Mekanika ug Dinamika, nga ginapahitabo niini Kini, kung unsa ang Iyang gisulti nga Kamatuoran.

<sup>116</sup> Dili gyud kini moandar, bisan unsa pa ka maayo ang Mekanika, gawas lang nga moabot ang Dinamika. Pag-moabot ang Dinamika, ang maong Aligato mokonektar sa octane nga anaa sa gasolina. Ug pagdilaab Niana, magpahinungdan kini og pagkalayo, ug ang maong pagkalayo maoy magpahinungdan sa matag paglihok, sa matag lihok, kay Siya mao ra sa gihapon kagahapon, karon, ug hangtud sa kahannguran. Mao kana ang pagkabanhaw. Mao kana ang tinuud nga Gahum sa Dios, ang Mekanika nga aduna og Dinamika. Matikdi, “Ang Espiritu ang maoy nagahatag og kinabuhi.” Kini ang—kini ang Aligato nga naghatag og kalayo. Dili gas ang naghatag og kalayo; ang Aligato ang maoy nagapakalayo sa gas. Kita n’yo?

<sup>117</sup> “Wala ka’y mahimo kung wala Ako; apan pinaagi Kanako mahimo mo ang tanang mga butang.” Maingon nga Siya mao ang Pulong, ang Amahan Kini nga maoy nagakinabuhi. “Maingon nga gipadala Ako sa Amahan, mao man usab ginapadala Ko kamo. Maingon nga ang Amahan ang nagpadilaab Kanako ug

nagtulod Kanako ngadto sa tanang butang, ginabuhat ko lamang ang makapahimuut sa Dios. Karon, maingon nga gipadala Niya Ako, mao man usab ginapadala Ko kamo uban ang mao rang Mekanika, ug magkinahanglan kini sa mao rang Dinamika aron palihokon Kini. Ug kining mga ilhanan maganunot kanila nga nanag-angkon nga aduna og Mekanika. Ang Dinamika mamaanaa usab sa puwesto Niini.”

<sup>118</sup> Nagsulti si Pablo, “Ang Maayong Balita miabot kanato og dili lamang sa Pulong,” pinaagi lamang sa gasolina, “kondili pinaagi usab sa Aligato,” aron Kini palihokon. Tan-awa. Miabot Kini kanato sa ingon nianang paagi.

<sup>119</sup> Kini ang mao rang Espiritu, nga nagbanhaw Kaniya kaniadto, ang nagahatag og kinabuhi ngadto sa tinuud nga magtotoo paingon sa Kinabuhing Eternal. Karon hinumdomi, sa potensiyal. . . Karon bantayi, maingon nga pahurot na ang atong oras. Matikdi, “ang mao rang Espiritu,” karon, Mga Taga-Roma 8:1. Karon basahon nato kana pag-usab, sa Mga Taga-Roma 8:1, ug atong tan-awon kung unsa ang gisulti. Sige. Ug dili sa Mga Taga-Roma. . . ang buot kong ipasabot, 8:11, pasayloa ko.

<sup>120</sup> Sa Mga Taga-Roma 8:11, “Apan *kung* . . .” Kana ang problema. Kana ang Iyang ginapunto.

*Apan kung ang Espiritu niya (sa Dios, ang Balaang Espiritu) nga nagbanhaw kang Jesus gikan sa mga patay nagapuyo sa sulod ninyo, . . .*

<sup>121</sup> Karon, mao kana, “Kung ang Espiritu sa Pamanhonon nagapuyo sa sulod sa Pangasaw-onon!”

<sup>122</sup> Sa dihang gilalang sa Dios ang Iyang unang pamanhonon, una Niyang gibuhath ang pamanhonon, ug pareho siyang lalaki ug babaye, sa espiritu; giuimol siya gikan sa abog sa yuta, aron mahimo siyang materyal. Ug matikdi sa dihang gibuhath Niya si Eva, gikan kang Adan, wala Siya magkuha og usa na usab ka yuta, didto na Siya mikuha sa mao ra mismong yuta; sa mao rang Pulong, tungod kay si Adan ang usa man ka gilitok nga Pulong. Kita n’yo? Didto Siya mikuha gikan kang Adan, ug dayon gikuha ang. . . Aduna siya og panglalaki ug pangbabaye nga Espiritu. Ug gikuha Niya ang pangbabaye nga espiritu gikan kang Adan, ug gibutang kini kang Eva; busa parti sa gihapon kini sa espiritu ni Adan, unod gihapon kini ni Adan. Dayon, ang espiritu kadto ni Adan, ang dinamika, nga maoy naghatag og kinabuhi sa mga mekanika diha sa iyang lawas.

<sup>123</sup> Busa ang Pangasaw-onon unod gayud sa Iyang unod, ug bukog sa Iyang bukog. Kung ingon niana giunsa man pagkahimo sa niining mortal nga lawas nga mamahimong Iyang lawas? Mopadulong kita dinha sa pipila lang ka minuto, kita n’yo. Giunsa niini pagkahimo? Giunsa? Unsa man kini nga pagbag-o? Matikdi.

*Karon kung ang Espiritu niya (sa Dios) nga nagbanhaw kang Jesus gikan sa mga patay nagapuyo sa sulod ninyo, siya nga nagbanhaw kang Cristo gikan sa mga patay magahatag usab og kinabuhi nganha sa inyong may kamatayong mga lawas pinaagi sa iyang Espiritu nga nagapuyo sa sulod ninyo.*

124 Oh, grabe! Ang Usa nga gipili-nang-daan, siyempre, sama sa Binhi nga nalubong sa yuta, Kadto lang nga adunay Kinabuhi diha kanila. Daghan kanila patay na; mga nangadunot sila nga binhi; ang tubig ug ang mga butang ang nagsunog kanila. Apan, kabalo mo, adunay Binhi nga napahiluna lang dinha nga gitagana na alang sa Kinabuhi. Nahibalo ang Dios nga anaa lang Kini dinha napahiluna.

125 Karon, Kadto lang mga gipili-nang-daan maoy unang hatagan og kinabuhi sa Balaang Espiritu, tungod kay ang Balaang Espiritu moanhi aron kuhaon kadtong mga Iyaha lang. Karon, lalum na kini karon, ug siguradoha nga bug-os n'yo kining makuha.

126 Karon, maingon nga gipadala ang adlaw sa tibuok kalibutan, dili aron dalhon ang mga bato, nga abug man pud, ngadto sa kinabuhi, dili kadto aron dalhon ang tanang abug ngadto sa kinabuhi, kondili aron dalhon kadtong mga abug lang nga nagputos sa usa ka kinabuhi.

127 Dili tanang tawo modawat kang Cristo. Oh, dili. Apan kadto lamang ang gikatagana-nang-daan sa Dios ngadto sa Kinabuhi, nga mga naputos sa abug sa yuta, kana lang Sila ang gianhi Niya aron hatagan og kinabuhi. Sila Lang.

128 Kana, karon, kanang abug pagmabulad didto sa adlaw, ug moingon, "Oh, pagkainit kaayo niining adlaw oi!" Kanang bato, moingon, "Pagkainit kaayo niining adlaw oi!" Apan kanang gamay'ng binhi, moingon, "Kana maoy akong gipangita," ug magsugod kini sa pag-udlot ngadto sa kinabuhi. Kini ang maghatag og kinabuhi sa nianang parti sa yuta. Tungod kay, ang adlaw gipadala dili aron nga hatagan og kinabuhi ang bato, dili aron nga hatagan og kinabuhi ang abug, kondili aron nga hatagan og kinabuhi ang kinabuhi sa binhi.

129 Karon, ang Balaang Espiritu nagaabot. Siyempre, wala Kini gipadala. . . Nganong dili man Kini dawaton sa tanang tawo? Wala man Kini gipadala alang kanila.

130 Usa ka tawo ang nagsulti kanako, "Dili ko motoo. Dili ko igsapayan kung unsa man ang imong isulti. Makapabuhi ka man og patay, o kung unsa man, ug makaayo sa mga masakiton; ug mapamatud-an pa Kini, sa unsa mang paagi; dili gihapon ko motoo Niini."

131 Miingon ko, "Siguradong dili gayud. Usa man ikaw ka dili-magtotoo. Dili Kini mahinungdanon alang kanimo. Wala man

kini gipadala alang kanimo. Gipadala Kini alang niadtong mga magatoo.”

<sup>132</sup> Ang Mensahe alang lamang sa magtotoo. Alang kanila nga pagalaglagon, kabuangan Kini; apan kanila nga mga anaa kang Cristo, ug kabahin nianang Binhi, Kinabuhi Kini.

<sup>133</sup> Ang akong gamay’ng ordinaryong sugilanon mahitungod sa usa ka mag-uuma nga nagpalumlum og itlog, o itlog sa agila nga gipalumluman niya sa himungaan. Kita n’yo? Kining gamay’ng agila, siguradong, siya’y—siya’y talagsaon ang hitsura, gamay’ng binuhat. Sa dihang gibuhat sa mag-uuma kining butang nga iyang gibuhat, ang pagpalumlum sa niining itlog sa agila sa niining himungaan. Ug napusa kini nga kataw-anan ang itsura nga manok, ug siya—siya usa ka salikwaut, nga makalolooy’n’g piso. Dili siya kaparehong itsura nila. Ang iyang mga balahibo dili kapareho sa uban, ug siya—siya gayu’y... Usa siya ka talagsaon, makalolooy’n’g piso. Ug naila siya sa tanang uban pa nga mga manok nga usa siya ka talagsaong binuhat. Ug milibot ang maong himungaan. . .

<sup>134</sup> Bisan ang pagkaon nga ginapakaon kaniya dili gyud niya magustohan. Dili niya gusto nga mangahig-kahig sa nataran. Siya, dili niya gustong mag-apil-apil niana. Mao nga nahibulong siya kung nganong lahi gyud siya didto, bisan unsaon. Kita n’yo? Ug wala gyud siya magtilaw og unsa mang butang nga. . . Mikanon na lang siya nga igo ra aron nga siya mabuhi, tungod kay dili niya gusto ang lami niini, kita n’yo. Tungod kay, dili man manok, sa sugod pa lang. Kita n’yo?

<sup>135</sup> Ug ang—ang himungaan magaputak-putak, ug, kabalo mo, “Ang mga adlaw sa mga milagro milabay na. Wala na’y ingon nianang butang. Magpamiyembro lang mo sa iglesia.” Dili gyud kini motukma, sa maong piso. Mao nga nagsunod-sunod nalang siya sa sa himungaan hangtud nga usa ka adlaw ang mismo niyang inahan. . .

<sup>136</sup> Nahibalo ang agila nga nangitlog siya og ingon ka daghan, ug adunay usa nga nawala. Nahibalo siya nga ang kadtong agila atua lang sa kung asang lugar, mao nga nagsugod siya og pagpangita kaniya. Ug mituyok siya sa kinatas-an sa bukid, ug ngadto sa walog, ug sa tanan nang dapit nga maadtoan niya. Niadtong panahona, siya, panahon na nga siya ipanganak. Oras na niya aron mapusa. Ang giingon, “Tingali usa ka uwak ang miabot ug nagsagmit sa akong itlog; tingali usa ka buwitre. Wala ko mahibalo. Aduna gyu’y nagsakmit sa akong itlog. Apan nahibalo ko. . . Anaa gyud kana ng itlog sa akong hunahuna. Aduna gyud Ko’y anak sa ubang lugar. Kinahanglan pangitaon ko siya.”

<sup>137</sup> Maingon man usab ang Dios. Siya ang Dakung Agila. Sa Iyang hunahuna nahibalo Siya nga aduna Siya og Iglesia. Nahibalo Siya nga aduna Siya og mga katawhan. Bisan unsa pa



man ang nag-amuma kanila, bisan asa pa sila mapailalum aron mapusa, pangitaon gyud Niya. Ginapangita Niya ang Mismong mga Iya.

<sup>138</sup> Ug usa ka adlaw, sumala sa istorya, kining agila milupad ibabaw sa nataran. Gilantaw-lantaw niya ang tibuok dapit, ug nakaplagan gyud niya siya. Oh, grabe kana nga pagkabanhaw, ang maamgo nga dili diay siya usa ka manok, dili gyud diay. Usa siya ka agila! Ug kanunay siyang ginatudloan nga magsige'g duko, mangita og nagakamang nga insekto o unsa man nga anaa sa nataran. Apan nakadungog siya og usa ka singgit, nga nag-ingon, “Humangad ka *dinhi!*” Ug mitan-aw siya sa ibabaw kaniya, ug didto ang usa ka binuhat nga adunay katorse-pye nga mga pako, mas kusgan kay sa tanang mga manok nga atua didto sa nataran, ug nagapahayag nga siya’y iyang anak.

Ang gisulti niya, “Mama, unsaon ko makaanha kanimo?”

<sup>139</sup> Miingon, “Lumukso ka lang, sugdan mo pagkapakapa sa imong mga pako, kay usa ikaw ka agila.”

<sup>140</sup> Kita n’yo, kabalo siya nga aduna siya’y anak sa kung asa man. Bisan asa pa kini gipadaku, aduna gyud siya’y anak sa kung asa man.

<sup>141</sup> Ug kabalo ang Dios! Alleluya! Aduna Siya og predistinado, gikataga-nang-daan nga Iglesia! Kabalo Siya nga aduna gyud Siya’y mga anak nga lalaki ug mga anak nga babaye, ug usa ka Pangasaw-onon, nga nagpaabot sa kung asa man; sa dihang ang Balaang Espiritu nagsugod sa paglupad sa ibabaw niini, kanang ginatabyog nga Binangan. Oh, grabe! Siya mao sa gihapon kagahapon, karon, ug hangtud sa kahangturan. Dili og unsa lang nga tinumotumo nga istorya, kondili usa mismo ka reyalidad!

<sup>142</sup> Bisan unsa pa ka daghan ang magsulay nga sultihan siya, “agila,” wala siya’y alamag kung unsa gyud ang agila. Bisan pa niana, usa gayud siya ka agila. Wala niya kini masabtan hangtud nga nakita niya ang usa ka butang nga nagreplektar kaniya, nga gireplektar niya, diay.

<sup>143</sup> Ug kung makita nato, dili usa ka denominasyon, dili usa ka Ph.D., dili usa ka LL.D., dili usa ka maayong silingan; kondili usa ka anak sa Dios nga gihulma diha sa hulagway sa Dios, uban ang dinamikang Gahum sa Dios aron matubag ang panginahanglan niining panahon, nga Siya mao ra sa gihapon kagahapon, karon, ug hangtud sa kahangturan, walay himungaan nga makapugong kaninyo. Pangitaon gyud niya ang iyang Mama. Usa siya ka agila, sa sugod pa lang. Nailhan niya. Ang tinuud nga agila nakaila sa tawag sa Pulong sa Dios. Ngano man? Usa man siya ka agila. Agila sa agila! Ang Pulong sa wala pa ang pagkatukod sa kalibutan, ang Pulong sa Pulong! Ang Pulong, predistinado, ngadto sa sinulat nga Pulong alang sa niining panahon. Maamgo mo ang imong posisyon. Ginapangita niya Kini.

144 Kini kung ingon-ana, kining yutan-ong lawas, gihatagan og kinabuhi ug ginadala sa Espiritu sa Dios ngadto sa pagkamasinugtanon sa Pulong sa Dios.

145 Sa gilayon. Sa dihang gusto niyang mahibaloan kung unsaon niya pagpakaadto didto sa iyang mama, natudloan na siya nga dili daw niya mahimo. “Dili ka molagpas nga labaw pa kay sa maabot sa imong lukso.” Usa man kono siya ka manok. Kita n’yo?

Apan ang agila nagsulti, “Dili kana tinuod.”

“Bueno, tan-awa ang mga manok!”

146 “Bisan unsa pa kanang mga manok, usa ikaw ka agila. Basta sugdan sugdi lang ipangbukhad ang imong mga pako, ug anara ang mga niini. Hinay-hinay gyud kang makalupad!”

147 Ang Pulong ngadto sa Pulong! “Ang mga buhat nga Akong ginabuhat buhaton ninyo usab. Siya nga nagatoo Kanako, ang mga buhat nga Akong ginabuhat buhaton ninyo usab.” Kita n’yo? “Tungod kay Ako buhi, mabuhi usab kamo.” “Ug kung ang Espiritu nga nagbanhaw Kaniya gikan sa mga patay nagapuyo sulod kanimo, pagahatagan Niini og kinabuhi ang imong mortal nga lawas.” Kita n’yo?

148 Unsa ma’y ginabuhat Niini? Karon paminaw, aron nga mahibaloan ninyo. Ug kining Pasko sa Pagkabanhaw, gusto ko nga magkaaduna og labaw pa nga kamahinungdanon kini alang kaninyo kaysa sa unsa mang Pasko sa Pagkabanhaw. Kita n’yo? Gusto kong makita ninyo kini. Nahibalo kita kung unsa ang gibuhat Niini alang Kaniya; apan gusto kong makita ninyo kini, dili nga buhaton pa lang, gibuhat na Niini ang maorang butang alang kaninyo. Kita n’yo? Unsa ma’y ginabuhat Niini? Ginahatagan Niini og kinabuhi ang mortal nga lawas. Kining mortal nga lawas nga atong gipuy-an, kini gihatagan og kinabuhi Niini, sa ubang pagkasulti, Gibuhi kini.

149 Karon, kamo nga kaniadto naglakaw-lakaw nga adunay dagkung mga tustos sa inyong baba, ug tanan na, o pakepaketeng mga sigarilyo; ug kamong mga babaye nga kaniadto mugbo ang buhok, pinintalan ang nawong, ug unsa na lang, ug magsul-ob og mga purol, ug mga butang nga sama niana; sa kalit, Adunay misinggit, ug gilantaw n’yo dinhi ug ang Pulong Kini. Kita n’yo, gihatagan og kinabuhi Niini ang inyong... Moingon na mo, “Sa akó wala na’y mga syorts, sa akó wala na’y alkohol, wala na’y pagpamakak, wala na’y pagpangawat, wala na og *ingon niini*, *ingon niana*.” Kita n’yo? Ang Espiritu nga nagbanhaw Kaniya gikan sa mga patay, nagapuyo na sa sulod ninyo, nga maoy maghatud usab sa inyong mortal nga mga lawas, ang abug sa yuta, ngadto sa pagpasakup. Nakita n’yo? Unsa man kini? Pagpasakup sa unsa? Kang Cristo. Kinsa man si Cristo? Ang Pulong. Dili teyolohiya, kondili ang Pulong!

150 Dayon moingon mo, nga, “Kining mga butang, oh, sa hunahuna ko okay lang sa mga babaye ang magsul-ob og pantalon.”

151 Sa dihang, ang Pulong nag-ingon, “Dili.” Kita n’yo, Nagahatag Kini og kinabuhi kanimo paingon Niana. Kita n’yo? Gipaduol kamo ngadto Niini. Kita n’yo, ingon na niana ikaw, dayon. Nahimo kini . . . Kabahin ka na sa Pulong. Gidala na Niini ang inyong lawas, dili . . .

152 Bueno, moingon ka, “Bueno, karon, sultihan ko kamo og usa ka butang. Ang akong pastor man gud . . .” Dili ko igsapayan kung unsa ang giingon sa inyong pastor; ang importante maoy kung unsa ang gisulti sa Pulong! Kung gusto ninyo nga mamahimong usa ka manok, magpadayon sa pag-uban-uban kaniya. Kung ang pastor nagawali nga lahi sa niining Pulong, kung ingon niana dili siya’y tigpakaon og mga agila; uh-huh, siya’y tigpakaon og mga manok, kita n’yo, dili sa mga agila. Kita n’yo? Ang Agila nagakaon sa Pagkaon nga pang-agila. Kita n’yo? Kini nagahatag og kinabuhi!

153 Gisulti sa Biblia nga sayup ang pagbuhat niana, ug ang tawo ug ang uban pa ug ang tanan nga inyong ginabuhat, kini sayup. Moingon, “Ang mga adlaw sa mga milagro milabay na.” Ang gisulti niining Biblia nga Siya mao ra sa gihapon kagahapon, karon, ug hangtud sa kahangturan. Kung moingon sila, “Mental telepathy lang kana. Ug usa ra kana ka matang sa pagbasa-sa-hunahuna, kanang pagpang-ila. Ug ang tanan niining mga panan-awon ug ingon nianang mga butang, wala’y pulos,” kita n’yo, mga manok gyud sila. Wala sila mahibalo kung unsa ang Pagkaon sa agila.

154 Apan, igsoon, kung madungog mo ang singgit, aduna gyu’y sa kung unsang Butang sa sulod mo! Usa ikaw ka agila, sa sugod pa lang. Ngano man? Ikaw kanang Binhi, nga nadan-agan sa pagkabanhaw sa A-n-a-k, ug sa gitabyog nga Binangan ibabaw sa yuta, aron ipaamgo sa imo nga usa ikaw ka agila ug dili usa ka dinominasyonhong manok. Nakita ba ninyo kini? Hah!

155 “Kung ang Espiritu nga nagbanhaw Kaniya gikan sa mga patay,” ang Pulong, ang Dinamika sa Pulong, “nagapuyo sulod kanimo, pagabuhion usab Niini ang imong mortal nga lawas.” Karon giunsa nato pagkahimong unod sa Iyang unod ug bukog sa Iyang bukog? Tungod kay, sa gilayon, samtang kita mga mortal pa nga mga makasasala, mortal, andam na nga mamatay, kining mga lawas, gihatagan Niini kana nga lawas og kinabuhi. Adunay pasabot nianang *paghatag-og-kinabuhi*? “Paghatud og Kinabuhi.” Ang espiritu nga kaniadto mahiligon og pag-inum-inum, paghugoyhugoy, pagpanapaw, ug niining tanan, gibuhi na kini; aba, patay na ang maong butang, ug nabanhaw ka na. Pagabuhion Niini ang imong mortal nga lawas.

<sup>156</sup> Busa, ang inyong mga lawas mao ang templo sa Dinamika, tungod kay (ngano man?) gikan sa sinugdanan pa lang kamo kabahin na sa maong Mekanika. Oh! Ania ang inyong pagkabanhaw. Ania ang Iglesia diha sa pagkabanhaw, uban Niya. Kining mga lawas karon mismo gibuhi na. Kita n'yo, nadungog mo; mitoo ka. Gibag-o ka Niini gikan sa usa ka denominasyon ngadto sa Pulong. Kita n'yo?

<sup>157</sup> Ang Dinamika, pag-maanaa Kini sa tubig, mongalngal mismo kini; “Milabay na ang mga adlaw sa mga milagro.” Pomp-pomp-pomp, “Oh, nagatoo man ko sa Biblia,” pomp-pomp-pomp, “apan wala—wala na karon og unsa mang. . .” Pomp-pomp-pomp! Kita n'yo?

<sup>158</sup> Apan kung makadlitan Niya ang usa ka libo nga octane, “Whrrrrr,” diretso siyang mosutoy palayo, nakita n'yo. Unsaon, grabe, pag-gikadlitan Kana sa Dinamika! Apan bisan moabot pa Kini sa manok, wala kini mahatag nga kaayohan. Apan kung moabot Kini sa agila, molupad dayon kini. Amen! Ang Dinamika uban sa Mekanika! Nakita n'yo ba kung unsay akong pasabot? Mao kana, kung tinuud gyud siya nga agila, “makasabot” siya.

<sup>159</sup> Gusto kong ipasabot ang usa ka gamay'ng Kasulatan dinhi alang kaninyo. Siguro napalung na kita sa linya sa telepono, apan nagpadayon pa kita dinhi. San Juan 5:24, miingon si Jesus, “Ang nagapatalinghug sa Akong Pulong, ug nagatoo Kaniya nga nagpadala Kanako, may Kinabuhi nga dayon.” Karon tan-awa, moadto ako didto sa dalan ug dawaton ko lang kana sa literal, kung unsa Kini, nga walay espirituhanong pagsabot. . . Dili Kini hatagan og unsa mang pakahulogan, kondili isulti lamang kung unsa ang ginasulti Niini, kita n'yo, ang hustong pulong dinha, sa Griyego, sa orihinal, nagaingon kini, “Siya nga nakasabot sa Akong Pulong.”

<sup>160</sup> Karon, aron pamatud-an nga husto kana. Maglakaw ako dinhi, ug aniay ang usa ka hubog nga naglakaw sa dalan, ug kauban ang asawa sa ubang lalaki nga nakagunit sa iyang mga bukton, ug nagapanunglo, ug ginagamit ang Ngalan sa Dios sa walay kapuslanan, ug tanan nang uban pa nga sama niana. “Hoy, nadungog mo ba ang gisulti sa magwawali? Nadungog mo ba?” “Oo, nadungog ko Kadto!” Wala kana nagapasabot nga aduna na siya og Eternal nga Kinabuhi. Kita n'yo? Kita n'yo?

“Siya nga nakasabot sa Akong Pulong,” siya nga usa ka agila!

<sup>161</sup> “Karon, Igsoong Branham, gusto ko og dugang pa nga Kasulatan gawas niana.”

<sup>162</sup> Sige, “Ang Akong carnero nagapatalinghug sa Akong Tingog. Sa usa ka dumuloong dili sila monunot.”

<sup>163</sup> Maingon sa hilisgutang *Kasal Ug Panagbulag*, sa miaging adlaw. Sa dihang gisulti kadto kanako sa Balaang Espiritu,

mianhi ako og gisulti kini sa mismong paagi nga gisulti Niya kanako.

164 May usa ka babaye'ng ministro ang nagsulti kanako sa diretsahan, medyo niya akong gisaway. Ingon niya, "Sa tan-aw ko ginakuha mo na ang puwesto sa Dios?"

Miingon ko, "Dili, ma'am."

165 Miingon, "Bueno, gisulti mo kanila nga ang ilang mga sala napasaylo na." Miingon pa, "Asa?" Miingon, "Ang Dios lamang ang adunay kagahum." Kita n'yo, usa na usab ka Fariseo. Kita n'yo? . . . ? . . .

166 Miingon ko, "Nakita mo, aron mahibaloan mo, nga, nagsulti si Jesus ngadto kang Pedro ug sa mga apostoles, pagkahuman niyang madawat ang kapadayagan kung Kinsa si Jesus."

Gisultihan niya Siya, "Ikaw ang Cristo, ang Anak sa Dios."

167 Miingon Siya, "Bulahan ikaw," kita n'yo, "nga anak ni Jonas; unod ug dugo wala nagpadayag Niini kanimo, kondili ang Akong Amahan nga anaa sa Langit mao ang nagpadayag Niini. Sa ibabaw niining bato pagatukoron Ko ang Akong Iglesia; ang mga ganghaan sa hades dili gayud makabuntog Niini. Ug Akong igahatag kanimo ang mga yawe; bisan unsa nga imong pagabugkuson dinhi sa yuta, kini pagabugkuson Ko sa Langit; kung unsa ang imong pagaluagan sa yuta . . ."

168 Kana ang Langitnong kapadayagan sa Pulong nga nahimong unod. Kung Kini unod kaniadto niadtong adlaw na pinaagi sa Anak, ang Pamanhonon, Kini ang unod sa karon pinaagi sa Pangasaw-onon. Kita n'yo? "Kinsa ganing mga sala ang inyong pasayloon, diha kanila kini pagapasayloon; kinsa ganing mga sala ang inyong pahawiran, diha kanila pagahawiran."

169 Karon, gikuha kana sa simbahang Katoliko ug gihatag kini ngadto sa ilang mga pari, apan karnal kana.

170 Bantayi, kini mao ang espirituhanon, napadayag nga Pulong ang nagbuhat niini!

171 Kana ang hinungdan nga gisugo Niya sila sa pag-adto og magbautismo sa "Ngalan" sa Amahan, Anak, Espiritu Santo. Nahibalo Siya nga naila nila kung Kinsa Siya.

172 Kaestorya ko ang usa ka magwawali sa miaging adlaw, ingon niya kanako, ingon niya, "Karon, Igsoong Branham, migawas na ako ug nagpasakop, nag-adto sa *usa—usa* ka iglesia, usa ka iglesia sa Pentecostal."

173 Kon diin, ang mga Pentecostal karon nagsugod na sa pagdawat og lingin nga ostya, kabalo na mo. Nadungog na ninyo kana, siguro; ang kosher, ang diosdios-nga-bulan, kabalo na mo. Ug kini gidawat nilang tanan ug nagakaon niini. Ang ginasulti niining tawo . . . Ang iyang—iyang kongregasyon pagkaduol ngadto kaniya; moingon siya, "Unsa ma'y akong

panalanginan pagapanalanginan.” Karon, dili ba kana man ang ginasulti sa mga pari, siya kono “adunay kagahum sa paghimo niini nga mamahimong lawas ni Cristo”? Kita n’yo, mismong usa sa duha ka unom o ang usa ka tunga sa usa ka dosena, mao nga pareho ra.

<sup>174</sup> Ug miingon siya, “Gusto kong mangutana kanimo og usa ka butang.” Gipaningkamotan niyang likayan ang hisgotanan mahitungod sa bautismo sa Ngalan ni Jesus, tungod kay siya mao man kadtong tawo nga nagsulti nga ang—ang anticristo maoy nagbuhat niana. Miingon siya, “Sa hunahuna mo ba nga mahinungdanon gyud nga mabautismohan ang usa ka tawo sa Ngalan ni Jesus Cristo?”

Miingon ko, “Oo, sir.”

<sup>175</sup> Miingon siya, “Bisan human na nga mabautismohan siya sa ngalan sa ‘Amahan, Anak, ug Espiritu Santo?’”

<sup>176</sup> Miingon ko, “Oo, sir. Wala pa man siya nabautismohan, kung ingon-ana. Kita n’yo? Wala pa man siya nabautismohan, kung ingon-ana; walay Ngalan. Mga titulo ra man kana.” Ang ingon ko, “Wala kana ilha.” Ingon ko, “Nganong gibuhath—nganong gibuhath man ni Pedro . . .”

<sup>177</sup> Ingon niya, “Bueno, karon, isulti ko kanimo ang usa ka butang.” Ingon pa niya, “Karon, sa Mga Buhat 10:49, ang giingon niya, ‘Samtang nagsulti pa si Pedro sa niining mga pulong, ang Espiritu Santo mikunsad sa ibabaw kanila.’”

<sup>178</sup> “Apan,” miingon ko, “milingi siya dayon ug miingon, ‘Aduna ba’y makasalanta sa tubig nga dili sila mabautismohan?’”

<sup>179</sup> Miingon siya, “Bueno, nagahisgot ka kaniadto, dili pa lang dugay, bahin sa Mga Buhat 19, kon diin sa tapos ni Pablo malatas ang kayutaan ibabaw sa Efeso, nahibalag niya ang pipila ka mga tinun-an.” Ug miingon, “Aba,” ingon pa, “wala sila mabautismohan sa ngalan sa Amahan, Anak, ug sa Espiritu Santo.”

<sup>180</sup> Miingon ko, “Dili, napangbautismohan sila ‘ngadto sa paghinulsol lang;’ dili alang sa pagpasaylo sa mga sala. ‘Ngadto sa paghinulsol,’ kay si Jesus wala pa napaila kaniadto. Ang Halad wala pa naihalad.”

Miingon siya, “Bueno, nganong kinahanglan gyud nga mabautismohan sila pag-usab?”

<sup>181</sup> Ingon ko, “Ang tawo nga nagkupot sa mga yawe, nagsulti og ingon niini, ‘Kinahanglan mahibaloan ninyo nga walay laing Ngalan nga gihatag ilalum sa Langit ngadto sa mga tawo, nga pinaagi niini ang tawo maluwas.’”

<sup>182</sup> Ang kaluwasan nagaabot lamang sa Ngalan ni Jesus Cristo. “Unsa man ang inyong pagabuhaton sa pulong o sa buhat, buhata ninyo kining tanan diha sa Ngalan ni Jesus Cristo.” Wala na’y uban pa nga ngalan, walay simbahan, walay herarkiya,

walay titulo, o walay bisan unsa pa! Bisana pa man, Siya ang Rosa sa Saron, Lirio sa Kawalogan, Bitoon sa Kabuntagon, Alfa, Omega, ang Sinugdanan ug Katapusan, ang Jehovah-jireh, -rapha, -manasseh, ang tanan na niini. Siya ang tanan-tanan niining butang, apan bisan pa man Siya'y . . . Walay kaluwasan sa unsa man nianang mga titulo; *Jehovah*, walay kaluwasan; *Rosa sa Saron*, bisan pa man nga mao Siya, walay kaluwasan; *Amahan, Anak, o Espiritu Santo*, walay kaluwasan. Ang Ngalan Lamang ni “Jesus Cristo!” Ug dayon gisulti sa Biblia, nga, “Ang paghinulsol ug pagpasaylo sa kasal-anan kinahanglan igawali diha sa Iyang Ngalan, gikan sa Jerusalem, ug hangtud sa kinatumyang mga bahin sa yuta.”

Miingon siya, “Sa hunahuna mo ba nagahatag kana og unsa mang kalainan?”

<sup>183</sup> Ingon ko, “Sir, gusto kong ipangutana kanimo ang usa ka butang.” Siya ug ako, ug ang akong asawa, nanaglingkod sa may lamesa. Bag-ohay lang siyang mibalhin. Pagkakita kanako, miduol. . . Ingon ko, “Pareho kitang taga-Arizona; dinhi kita nagpuyo. Ug ako, ug kaila nato ang atong konseho, ug ang atong distrito, ug ang tanan, ug ang atong mayor, gobernador, ang tanan na.”

Siya miingon, “Oo.”

<sup>184</sup> Ingon ko, “Karon, kung isulti ko kanimo, igsoon, nga, ‘Ari ka ug bayari og tseke ang atong gikaon, sa ngalan sa Gobernador sa Estado sa Arizona,’ moanhi ka ba aron pirmahan kini nga ingon niana? Sa hunahuna mo ba nga dawaton nila kana didto sa kasir?”

<sup>185</sup> “Aba,” ang ingon niya, “Dili gyud.” Ingon pa niya, “Nganong nasulti man kadto ni Jesus?”

<sup>186</sup> Ingon ko, “Tungod niini, kita mo. Ngano man? Kung gisulti ko sa imo nga ‘bayaran mo og tseke kining atong gikaon, sa ngalan sa Gobernador sa Estado sa Arizona,’ ug kita isip nga mga lungsoranon sa Arizona, ug nakaila mismo kung kinsa ang Gobernador, aba, nahibaloan mong kinahanglan kini pirmahan sa ngalan ni ‘Sam Goddard,’ kita mo.” Ingon ko, “Tungod kay, siya man ang Gobernador sa estado. Dili na ako mangutana pa kanimo. Kabalo ka na kung kinsa ang Gobernador. Ug, sa dihang gisulti Niya, ‘Amahan, Anak, ug Espiritu Santo,’ kabalo gyud Siya kung sa unsang paagi sila magbautismo. Nakaila usab sila kung kinsa Siya. ‘Ang Akong mga carnero nagapatalinghug sa Akong Tingog.’ Kita n’yo? Kita n’yo?”

Miingon siya, “Oh, nasabtan na nako.”

<sup>187</sup> Apan karon, ang sunod, motoo ka ba? Kita n’yo? “Ang nagapatalinghug sa Akong Pulong, ug nagatoo Kaniya nga nagpadala Kanako, may Kinabuhi nga dayon.” Ug sa diha

nga kining bag-ong Kinabuhing Walay Katapusan nagapuyo sa sulod kanimo, Kini ang potensyal.

<sup>188</sup> Sa dihang nadawat na nimo kini nga Balaang Espiritu, nga ilang nadawat kaniadto didto sa adlaw sa Pentecostes; sila mao ang mga mekanika, karon ang Dinamika kinahanglan nga moabot. Nagtoo na sila. Kabalo na mo, ginasulti kanato sa buotan natong mga higalang Baptist nga, “Pag nagatoo na kita, nadawat na nato Kini.” Apan, wala pa nila Kini nadawat, bisan pa nga nagtoo na sila.

<sup>189</sup> Mga Buhat 19, nagtoo na sila, apan wala pa Kini kanila. “Nadawat na ba ninyo ang Espiritu Santo sukad nga mitoo kamo?” Kita n’yo? Anaa na kanila ang mga Mekanika, oo, tungod kay ang mga apostoles. . . O, ang buot kong pasabot, si Apolos nagatudlo na man kanila ug ginapamatud-an pinaagi sa Biblia, ang mga Mekanika, nga si Jesus mao ang Cristo, apan wala pa sa ila ang Dinamika. Kita n’yo? Mao gyud kini. Sige.

<sup>190</sup> [Blangko nga bahin sa teyp—Ed.] . . . -chanics, mahimong aduna ka na og patinga, ang paghulat.

<sup>191</sup> Karon, kung nadawat mo na ang Dinamika, nabuhi ka na gikan sa pagka-mortal ngadto sa pagka-imortal. Ginapailalum na Niini ang tibuuk mong lawas ngadto sa Pulong. Ginapalihok ka Niini nga lahi, ginapalahi ang imong panagway, ginapalahi imong pagkinabuhi. Himoon ka Niini nga lahi gayud.

<sup>192</sup> Karon tan-awa. [Blangko nga bahin sa teyp—Ed.] . . nabuhi na. “Kamo nga mga patay kaniadto diha sa kasal-anan ug kalapasan, ug kangitngit, karon mga gibuhi na Niya.” Pinaagi sa unsa? “Sa Iyang Espiritu nga nagbanhaw kang Jesus,” niadtong buntag sa Pasko sa Pagkabanhaw, “gikan sa mga patay. Ug kung nagapuyo Kini sa sulod sa imong mortal nga lawas,” karon bantayi, “buhion usab Niini, dad-on ngadto sa Kinabuhi, ipapailalum kini ngadto sa Pulong.”

<sup>193</sup> Karon, unsaon mo man sa pag-angkon nga anaa na kanimo ang Espiritu, ug ginapahilayo mo man ang imong kaugalingon gikan sa Pulong? Gibuhi ka tingali pinaagi sa ubang butang. Tungod kay, buhion man Niini ang imong mortal nga lawas ngadto sa Pulong. Siguradong, ingon niana Kini.

<sup>194</sup> Dili ka makapadagan nga wala Kini. Magpurot-purot ka lang gyud, kung dili mo toohan ang tibuok Niini. Kung ikaw aduna og nagkasagol nga gasolina ug tubig, wala gyud ka’y mapadulngan. Kita n’yo? Kinahanglan gyud nga siyento-porsiyentong, gasolina. Kung dili, magpurot-purot ka, wala ka’y puwersa. Kita n’yo? “Apan ako—nagatoo ako *niini*, apan dili ako motoo *Niana*,” pomp-pomp-pomp-pomp. Wala gyud ka’y mapadulngan.

<sup>195</sup> Apan, oh, sa dihang dawaton mo ang bug-os kinatibukan! Puede mo nang paandaron kana, ang matag Pulong niini Kamatuoran!



196 Dayon matikdi karon, samtang taposon na nato, matikdi kini. Matikdi, sama ra kini sa usa ka gamay'ng—usa ka gamay'ng binhi nga anaa sa yuta.

197 Karon, sa potensiyal, nabanhaw ka na. Nabanhaw ka na pag nadawat mo ang Balaang Espiritu sa sulod mo. Nabanhaw ka na nianang higayona. Ang imong lawas potensiyal na nga nabanhaw.

198 Tan-awa ang usa ka gamay'ng binhi. Itanum kini sa yuta. Kinahanglan niini nga moinom gikan sa Iyang tuburan, ang tubig nga nagadagayday. Ug samtang nga nagainom kini, nagatubo kini pataas ngadto Kaniya, nagakahimong susama sa mao mismong binhi nga gitanum sa yuta. Kita n'yo?

199 Sa ingon nianang paagi miagi ang Iglesia, sa pagpamatarung, pagpabalaan, bautismo sa Espiritu Santo, nga karon nagapamulak na. Kita n'yo? Ang Espiritu sa Dios nagapamuhat sa tibuok niana.

200 Ug ang espiritu sa kalibutan nagapamuhat usab pinaagi sa anticristo, sa mao rang paagi, ug karon kini namulak na ngadto sa usa ka dakung kapunungan sa mga iglesia, kita n'yo, ang tibuok niini.

201 Ug ang indibidwal nagaagi sa ingon niana usab nga proseso. Ang tanan nagaagi sa mao ra, sa mao rang proseso sa Dios, kay Siya mao ra sa gihapon kagahapon, karon, ug hangtud sa kahangturan. Mamatikdan mo kini, sa imong pagpaingon, sa imong pagtubo padulong ngadto sa bug-os kinatibuk-an sa pagkabanhaw, nga gipangulohan sa Espiritu!

202 Samtang ang adlaw, a-d-l-a-w, ginapatubo kanang gamay'ng tanum nga nagainom gikan sa tuburan sa Dios, nagpadayon kining. . . Kita n'yo, nagainom lamang kini gikan sa usa ra ka butang. Usa ka beses bûbû-i gani og mantika ang maong binhi; mamatay gyud kini. Husto kana. Bûbû-i og malan-og nga tubig, daang tubig nga dili maayo, mahugaw na kini, mohunong kini sa pagtubo. Dili na kini mamunga. Husto ba kana? Apan pagbûbûan mo og purong limpyo ug presko nga tubig sa ulan, amen, nga walay kemikal nga hinimo'g-tawo, kanang gikan lang sa kalangitan, ug bantayi kana nga tanum. Walay tubig nga makapatubo nga susama sa tubig sa ulan. Pagbutangan mo kini og chlorine ug ingon niana nga butang, sama sa gipaningkamotan n'yong ipa-inom kanamo, ug, ang unang butang nga mahibaloan mo, ginapatay na niini ang tanum.

203 Ingon niana ang nagakahitabo sa karon. Ginasulayan nilang ipa-inom kanila ang tubig nga gikan sa denominasyonhong tuboran, ug ginapahunong niini ang pagtubo. Kita n'yo? Apan tugoti nga siya'y. . .

Kon diin nagaabot ang madan-ag nga mga  
yamog sa kalooy;  
Sidlaki ang palibot ko sa adlaw ug gabii,  
Jesus, ang Kahayag sa kalibutan.

Dayon nadawat mo na kini, kung ingon-ana.

Manglakaw kita diha sa Kahayag, sa nianang  
matahum nga Kahayag,  
Kon diin nagapangabot ang madan-ag nga  
mga yamog sa kalooy;  
Sidlaki ang tibuok kong palibot.

204 Ipahilayo kanako kining mga tuburan nga hinimo'g-tawo!  
Wala na'y laing tubod nga akong hingbaloan; wala na kondili  
ang Dugo ra ni Jesus! Kana ra ang Tuboran nga gusto kong  
mahibaloan. Tugoting magpabilin sa sulod kanako ang Pulong,  
Ginoo; bisbisi Kini pinaagi sa Imong Espiritu.

205 Matikdi, karon, kung kanang Espiritu nga nagbanhaw kang  
Jesus gikan sa lubnganan, nagapuyo sa sulod nimo, sa potensyal  
anaa na kanimo ang Kinabuhi; giniyahan sa Espiritu, aron  
mahatagan og kinabuhi ang Pulong diha kanimo, aron toohan  
Kini. Ang maong gamay'ng butang padayon nga ginatulod  
pataas samtang kini nagatubo.

206 Matikdi, niadtong Pentecostes, gibuhi ang ilang mga lawas  
ngadto sa usa ka bag-ong Kinabuhi. Tan-awa ang maong pundok  
nga kaniadto nga talawan.

207 Napalangan ko na ba kamo og ayo? [Nagaingon ang  
kongregasyon, "Wala."—Ed.] Tan-awa, karon pa lang ko nag-  
init, kanang, nagbati ka'g kagana. Oh, grabe!

208 Matikdi, kaniadto mga talawan sila. Matikdi. Apan, aduna  
na sila og mga Mekanika. Kita n'yo? Apan nanaglingkod silang  
tanang didto sa luyo, nga nagaingon, "Oh, nahadlok ako kanila.  
Oh, nahadlok ako nga mogawas ug magpahayag, tungod kay, oh,  
tanang man sila bantugan nga mga obispo ug mga ingon niana sila  
didto. Oh, nahadlok ako. Sila man gud nga mga pari ug ang mga  
ingon niana, nahadlok ako nga ipahayag kana kanila, nahadlok  
ako nga isulti kanila nga mitoo ako Kaniya. Oh, dili ko gayud  
mahimo kana, nakita n'yo."

209 Apan, sa kalit lang, miabot ang Dinamika. Oo. Ug unsay  
gibuhat Niini? Dili lamang Niini gipuno ang ilang mga espiritu,  
sa kinasuloran, kondili gibuhi Niini usab ang ilang mga  
mekanika. Nabuhi ang ilang mga lawas. Dili na sila mga  
talawan. Nanggawas na sila didto sa atubangan mismo sa mga  
tawo. Oo, sir. "Kamong mga katawhan sa Judea, ug kamo nga  
nagapuyo sa Jerusalem!" Kon diin, sa wala pa ang Dinamika,  
mga mekanika pa lang sila. Kita n'yo? "Kamong mga nagapuyo  
sa Jerusalem, ipahibalo ko kini kaninyo, ug paminaw kamo sa

akong mga pulong! Dili kini sila mga hubog, maingon sa inyong panghunahuna.”

<sup>210</sup> Usa ako kanila. *Kini* mao na Kana! Ipakita ko kaninyo kung unsa kini. Kini ang Kasulatan. *Kini* mao na Kana! Ug kanunay kong ginasulti, “Kung *kini* dili pa Kana, tugoti ko nga tipigan *kini* hangtud nga moabot na Kana.”

<sup>211</sup> “Dili, kini mao na Kana sama sa gisulti ni propetang Joel, ‘ug mamahitabo nga sa kaulahiing mga adlaw, ang ingon sa Ginoo, igabubo Ko ang Akong Espiritu sa tanang unod.’” Kita n’yo, miabot ang Dinamika ngadto sa mga mekanika. Wala na sila nangahadlok.

<sup>212</sup> Ang uban kaninyo nahadlok nga pagakataw-an kamo ni kinsa man nga babaye tungod sa tag-as ninyong buhok, o tungod nga wala na kamo nagapangmeyk-up; ang uban kaninyo nga mga kalalaken-an nangahadlok nga palagputon kamo sa inyong organisasyon kung bautismohan ninyo ang inyong kongregasyon diha sa bautismo nga sumala sa Kasulatan; kung ingon-ana kinahanglan ninyong sirad-an ang inyong kaugalingon didto sa itaas sa kwarto hangtud moabot ang Dinamika. Husto kana.

<sup>213</sup> Gipangbag-o sila Niini. Gibuhi sila Niini. Gihimo sila Niini nga lahi. Mga tawo sila nga mga gibag-o na, sukad niadto. Gibuhi sila Niini, gikan sa karaang kinabuhi ingon nga talawan pa, ngadto sa pagka-susama sa Leon sa banay ni Juda. Bug-os silang miagi sa pagka-martir, gipanglansang sa mga krus, gilansang nga pabalintong, gipangsunog, gipangtambog ngadto sa langub sa mga leon. Wala na’y pagkatalawan, kanila. Ang kamatayon wala na’y kadaugan kanila, wala na gayud. Ang Dinamika anaa na sa mekanika. Oo, sir. Gibuhi Niini ang ilang mortal nga lawas.

<sup>214</sup> Paminaw karon. Ania ang usa pa ka butang, ingon nga pagpamatuod. Hilabihan silang gibuhi Niini hangtud nga (kabalo ba mo kung unsa?) gisakgaw sila sa Langitnong mga dapit, ug ang ilang mga mortal nga lawas gibuhi og ayo hangtud nangausab ang ilang sinultihan. Kini mismo. . . Gibuhi ang ilang sinultihan. Mao kana ang giingon sa Biblia. Ug, ingon nga ang ilang mortal nga mga lawas gibuhi, ang ilang sinultihan gibuhi usab. Gibuhi ang ilang hunahuna. Gibuhi ang ilang espiritu. Gibuhi ang ilang kinabuhi. Gibuhi gayud silang, tanan! Gisulayan nilang magsulti, ug dili na sila makasulti pa sa sinultihan nga iya sa tawo. Gibuhi sila og hilabihan diha sa Presensya sa Dios hangtud nga nakasulti sila og bag-ong sinultihan, usa ka Langitnong sinultihan. Whew! Grabe nga Gahum nga nagahatag og kinabuhi!

<sup>215</sup> “Kung nagapuyo sa sulod kaninyo ang Espiritu nga maoy nagbanhaw kang Jesus,” oh, alelluya, “Buhion Niini ang inyong mortal nga lawas.” Ipabuhat Niini kanimo ang mga butang

nga wala mo ginabuhat kaniadto. Nangapuno sila kaniadto og makapabuhing Gahum. Kita n'yo?

216 Ang inyong lawas dili na napailalum sa sala; kamo, bisan ang inyong mga tinguha.

Pagmoingon siya, “Ari ka dinhi!”

Moingon ka, “Paghilum diha.”

“Oh, aduna kanamo ang pinakadakung . . .”

“Paghilum diha.” Aba, usa ikaw ka agila!

217 Nakita na ba ninyo kung unsa ka independente maglakaw ang usa ka agila? Wala siya nagasige'g tugdon nga sama sa usa ka buwitre, kita n'yo, nganha sa matag patay, ug sa tanang dubok na nga karne nga nagkatag sa yuta. Wala, sir. Mapasigarbohon siyang nagalakaw.

“Paghilum.”

“Oh, ania *dinhi* baya ang lamian nga panihapon.”

218 “Dili sa ako. Kita n'yo, ang akong mga pangandoy nausab. Lahi na ang akong mga gusto. ‘Kay ang tawo dili mabuhi sa kalibutan sa dubok na nga karne, kondili sa matag Pulong nga nagagula sa baba sa Dios.’” Ang usa ka tinuod nga gibuhi na nga agila nagakinabuhi pinaagi Niini. Amen!

219 Oh, ug Siya nga nagbanhaw kang Cristo gikan sa mga patay, nga nagapuyo sa sulod kanimo, maoy naghatag-og-kinabuhi sa imong mortal nga lawas ngadto sa Iyang Presensya. Maila mo Kini. Dili ka na usa ka mangungungad og hugaw. Usa ikaw ka agila. Dili na nimo gusto ang mga butang nga iya sa kalibutan. Mga anak na kamo nga lalaki ug mga anak nga babaye sa Dios. Dinha mo nagapiyesta sa Tuburan nga ang kalibutan wala gyu'y hibangkaagan. Ginainom ninyo Kini. Ang nakahibalo . . . Ang kalibutan wala gyu'y hibangkaagan. Tinago nga Manna ang inyong ginakaon nga ang kalibutan wala gyu'y hibangkaagan Niini, tungod kay kamo agila man. Gihatagan kamo og kinabuhi pasaka kon diin mamahimo ninyo Kining maabot. Dili ninyo Kini maabot *dinhi* sa ubos, kinahanglan ninyong maisaka *dinhi*. Kinahanglan nga buhion kamo, maisaka didto sa itaas, aron magahatag Kini og kinabuhi.

220 Unsa man ang ilang gibuhat? Nanagsulti sila og ubang pinulongan. Gisulti sa Biblia nga gibuhat nila. “Nagsulti sila sa matag pinulongan nga anaa sa silong sa Langit.”

221 Mapamalandong n'yo ba kana, sila nga mga mortal nga lawas kaniadto nga atua didto, nga nagaingon, “Bueno, wala ko kahibalo kung matoohan ko ba kini o dili?”

222 Sa kalit na lang, nangahatagan gyud sila og kinabuhi hangtud nga ang kaisog sa Leon sa banay ni Juda mikunsad sa ibabaw nila, sa ibabaw nianang ginatabyog nga Binangan. Oh, kanang Agila miabot aron tawgon na ang Mga Iyaha!

“Ug wala nila gihigugma ang ilang mga kinabuhi hangtud sa kamatayon.” Amen.

Ug adunay dugang pang mohatag sa ilang dugo sa kinabuhi

Alang niining Ebanghelyo sa Balaang Espiritu ug sa mapula kaayong dagayday Niini.

<sup>223</sup> Ug ang Anak kinahanglan—kinahanglan gayud nga igapadayag pag-usab, sa Pangasaw-onon sa kaulahiing adlaw; ang Gahum nga nagahatag-og-kinabuhi kinahanglan gayud moabot, aron hatagan sila og kinabuhi pagawas niining patay’ng mga denominasyon ug mga kredo, ngadto sa usa ka buhing Pulong nga iya sa buhi nga Dios. Oh!

<sup>224</sup> Dili, gibuhi sila Niini ngadto sa bag-ong Kinabuhi. Ingon usab ang ginabuhat Niini kanato karon. Matikdi, kaniadto, gibuhi gayud sila niadtong Gahum nga nagahatag-og-kinabuhi! Karon akong. . .

Paminaw og ayo karon. Paningkamotan kong ipakita kaninyo.

<sup>225</sup> Ang Gahum nga nagahatag-og-kinabuhi dili lamang nga anaa sa ilang kalag, kondili naglukop mismo Kini kanila. Kini. . . Dili lamang miabot ang Dinamika, aron maghatag-og-kinabuhi, kondili gihatagan Niini og kinabuhi ang mekanika. Nakita ba nimo kung unsa ang akong ipasabot? Gibuhi gayud sila og ayo hangtud nga ang ilang mga dila nanagsugod sa pagsulti sa ubang sinultihan. Gibuhi sila og ayo sa Gahum sa pagkabanhaw ni Cristo, hangtud nga kung pandongan nila sa ilang mga kamot. . . Gibuhi sila og ayo sa Gahum nga nagahatag-og-kinabuhi, hangtud, sa dihang pagapandongan nila sa ilang mga kamot ang mga masakiton, nangaayo sila. “Gibuhi Niini ang inyong mortal nga lawas.” Nangaayo sila, pinaagi sa pagpandong sa ilang mga kamot.

<sup>226</sup> Ug gibuhi sa Espiritu ang ilang pagpakig-fellowship uban sa Dios, hangtud nga sila usab gibuhi ngadto sa Presensya sa Dios hangtud, sa dihang adunay usa ka tawong namatay ug ang kalag niini mibiya na, gitawag Niini siya pabalik sa kinabuhi. Amen! Himaya! Ginabati ko karon ang pagkarelihiyoso.

<sup>227</sup> Husto kana, naghatag-og-kinabuhi! Dili lamang og pagkabanhaw alang sa Iyang Kaugalingon, kondili sa kang kinsa usab nga gusto niini, sa niining predestinadong Binhi nga napahiluna didto. Gibuhi, ginabuhang mortal nga lawas!

<sup>228</sup> Gipandongan nila sa ilang mga kamot ang mga masakiton; nangaayo sila. Nanag-ampo sila; diha sa Espiritu nakakita sila og panan-awon, tawgon ang mga patay pabalik ngadto sa kinabuhi. Husto kana. “Gibuhi ang ilang mortal nga lawas.”

<sup>229</sup> Pagmosulod Kini kanimo; kung maingon man niana. . . Karon, mahimong isulti mo nga ingon niana; apan kung ingon

gayud niana, kining mga ilhanan maganunot niana, nakita n'yo. "Ginabuhi Niini ang imong mortal nga lawas." Pagabuhion ka Niini.

<sup>230</sup> Karon, matikdi, nagahatag-og-kinabuhi diha sa Presensya sa Dios. Ngano man? Ang Espiritu sa Dios kadto ang nagbanhaw kang Jesus gikan sa lubnganan. Ug, ang Espiritu sa Dios, "Akong ginahatag kanila ang Kinabuhi nga Walay Katapusan," nga nagagikan sa Griyegong pulong, kung tan-awon ninyo, *Zoe*, nga nagapalihok Niini sa sulod ninyo ug dayon nagahatag-og-kinabuhi (kanila) bisan sa ilang mga hunahuna.

<sup>231</sup> Karon tan-awa. Unsaon man nimo pagpakaingon nga ang Espiritu nagapuyo sa sulod nimo? Bisana pa nabuhat mo na ang tanan nga imong nahunahuna nga husto, ania ang imong ebidensya kung anaa kanimo Kini o wala. Kung ang Espiritu nga anaa kang Cristo anaa sa sulod nimo, pagabuhion ka Niini usab ngadto sa Pulong, tungod kay Siya mao ang Pulong. Ug kung kini, sukwahi, nga ginabuhi ka pahilayo gikan sa Pulong, kung ingon-ana dili kini ang Espiritu ni Cristo! . . . bisan unsa pa ang imong ginabuhat, gawas kung ginapalihok ka Niini diha sa Pulong. "Ang Akong mga carnero nagapatalinghug sa Akong Tingog, ug mabuhi sila pinaagi sa matag Pulong," matag Pulong! Naghisgot na ako mahitungod niana niadtong miaging adlaw.

<sup>232</sup> Ang kaugalingon kong inahan, mipanaw na siya, ug pagkatalagsaon siya nga babaye. Ug siya, kabalo na mo, usa ka mestisang Indian, ug pagkatalagsaon gayud niya. Apan bisan pa niana usa siya ka tawong dili madamgohon. Apan wala ko maghunahuna . . . Aduna lamang siya og upat o lima ka mga damgo, sa tibuok niyang kinabuhi. Apan sa matag higayon nga magdamgo siya og usa ka damgo, nagakatinuod gyud kini. Nagdamgo siya kaniadto, og natuman gyud kini.

<sup>233</sup> Nadumdoman ko usa ka higayon sa una kong pagsugod sa pagwali, daghang katuigan na ang milabay. Nagpuyo kami mismo sa dinhi dapit nga dalan, mismo sa unahan lang dinhi. Nagawali na ako dinhi mismo nga simbahan. Ug nagdamgo siya og usa ka damgo, nga nagatindog ako kono dinhi sa kilid niining tulo ka mga ang-ang. Ug nagatindog ako kono, nagawali sa kadaghanan, nga kinahanglan nilang sak-on kining tulo ka mga ang-ang sa dili pa nila maabot ang dakung-dalan. Ug sa maong dakung-dalan aduna og gamay'ng puti nga susamagmutya nga linya, nga moabot hangtud sa—sa—sa mga ganghaan sa Langit, paingon ngadto sa perlas nga pultahan. Ug kining perlas konektado hangtud sa ibabaw niining mga ang-ang. Kon dili ba kana mao mismo ang akong Mensahe karong adlaw; pagpamatarung, pagpabalaan, ang bautismo sa Espiritu Santo! Ug giingon ko na nga kinahanglan moagi ang tawo sa niining tulo ka mga ang-ang, aron siya makalakaw sa nianang dakung-dalan. Ug miingon pa nga . . .

234 Adunay usa ka babaye ang miagi. Karon, kabalo na mo kung unsang matang sa mga sapatos ang ginasul-ob sa mga tawong trayntay-singko anyos na ang milabay. Adunay usa ka babaye ang miagi, nga nagsul-ob og dagkung pares sa sapatos nga sama sa ginasul-ob nila sa karon, mga sapatos nga aduna og mahait-nga-tikod. Ug milabay siya. Ug ingon ko, “Kadali lang, igsoong babaye. Dili baya ka makaagi nianang dakung-dalan nga sul-ob kana.” Ug ingon ko, “Ikaw—ikaw, dili mo puede gamiton kana.”

235 Ug ang ingon niya, “Ah!” Ang ingon niya, mitan-aw siya sa uban pa nga mga babaye sa palibot, miingon, “Ayaw siya toohi. Usa siya ka buang-buang nga tawo. Kita n’yo? Ayaw siya toohi. Ipakita ko kaninyo nga mahimo akong mapamatarung, mapabalaan, ug mapuno sa Espiritu Santo, ug sa gihapon maglakaw nga gamit kana.” Ug ang babaye . . . Gipasagdan ko na lang siya. Wala ka na’y mahimo pa bahin niana, dili mo na siya mapugngan. Ug midagan siya padulong sa maong dakung-dalan. Ug milingi siya ngadto sa usa ka igsoong babaye, miingon, “Kita mo, gisulti ko na kanimo!” Nagsugod siyang modagan didto, ug siya . . .

236 Kabalo na mo, sama sa giingon sa Biblia, sa Isaias, ika-5 nga kapitulo, nga magkaaduna sila og “pinatikig nga mga liog.” Sigurado gyud kini kanila; nakadungo nga, kita n’yo. “Managkiaykiay samtang nga . . .” Sila’y, mag-ikis-ikis, “Managkiaykiay samtang nanaglakaw, managpapagakpak sa ilang mga takong; kita n’yo, ang mga anak nga babaye sa Sion sa katapusang mga adlaw.”

237 Ug sugod siyang midagan paingon didto sa dakung-dalan, kutob sa iyang mahimo. Ug, sa wala magdugay, ang dalan nagkahiktin nga nagkahiktin. Nagsugod siya’g magpasarasay, magkiaykiay nga sama *niana*, ug siya midalin-as og nahulog.

238 Ug miingon si mama, “Ang pinakamakalilisang nga mga pagsinggit nga sukad kong nadungog sa akong kinabuhi, mao kadtong babaye nga nahulog paingon ngadto sa kalayo ug aso, paubos nga paubos na lang, nga sama niana.” Miingon, ako “milingi na lang ug miingon, ‘Kita mo?’”

239 Gisunod niya ang tanan gawas sa usa ra ka Pulong, kita n’yo, ang tanan gawas sa usa ra ka Pulong. Oo, ang mga kababayen-ang Pentecostal mahimong maluwas, mapabalaan, ug mapuno sa Espiritu Santo, ug dayon mapakyas. Sa walay duhaduha. “Ang tawo mabuhi dili sa tinapay lamang, kondili sa matag Pulong nga nagagula.” Kita n’yo? Kita n’yo? Ug napakyas siya Niini. Ug sama sa giingon ko, kita n’yo, makasulod na unta siya, oo, apan, kita n’yo, wala siya naminaw; gisulti na kaniya kung unsa ang aduna sa unahan. Ug gisulat na sa Dios ang Ebanghelyo pinaagi sa mga tinun-an, mga apostoles, ug Doktrina sa mga apostoles ug mga propeta, ug uban pa, ug ayaw nila manalinghug.

<sup>240</sup> Karon matikdi kining Gahum nga nagahatag og kinabuhi, Zoe, nga ginahatud ang Pulong, ang hunahuna nga atua kang Cristo anaa na sa sulod kaninyo kung ingon-ana. Gipaningkamotan kong ipakita kaninyo, nga, kamo, niadtong kamo gibanhaw. Sa dihang gibanhaw sa Dios si Jesus gikan sa mga patay, gibanhaw Niya kamo, usab. Ug gibuhi usab ngadto sa Kinabuhi, uban Kaniya, kamo niadtong tungora mga gibuhi na ngadto sa Kinabuhi, bisan kamo mga kinaiyahan pa lamang nga anaa sa Iyang hunahuna, apan nakita na sa Dios ang tanan diha Kaniya, ang katapusan, kita n'yo. Sa dihang mitan-aw ang Dios ngadto sa lawas. . .

<sup>241</sup> Mibiya Kaniya ang Espiritu, didto sa Tanaman sa Getsemani. Gikinahanglan Niya mamatay, nga usa ka tawo. Hinumdomi, mga higala, dili Niya kinahanglan nga buhaton kadto. Ang Dios kadto. Gidi Hogan sa Dios kadto nga unod, nga unod sa tawo. Ug wala Siya. . . Kung miadto Siya didto, ingon nga Dios, dili gayud Siya mamatay sa nianang matang sa kamatayon; dili mahimong mapatay ang Dios. Apan dili Niya kinahanglan nga buhaton kadto.

<sup>242</sup> Apan, hinumdomi, kauban kamo Niya sa dihang miadto Siya didto. Kita n'yo, wala gayud gihimulag sa Dios ang Pangasaw-onon gikan sa Pamanhonon, wala gayud. Busa sa dihang midungaw ang Dios ngadto sa lawas ni Cristo, parehong lalaki ug babaye ang nakita Niya. Ang tanan niini natubos diha nianang usa ra ka lawas. Kita n'yo? Usa ra sila, mao ra, mao rang Pulong. Ang mao rang Pulong, nga nagsulti mahitungod sa Pamanhonon, nagsulti usab mahitungod sa Pangasaw-onon.

<sup>243</sup> Bueno, mahimo ba diay nga moanhi ang Pangasaw-onon, ug dili madayag diha kaniya ang tanan nga Iyang gisaad; ug moanhi ang Pamanhonon, ug mahimo ba diay nga dili Siya ang mamahimong Pangasaw-onon? Apan sa dihang gibuhat Niya ang tanan, bisan pa sa pagpamatuod niini pinaagi sa pagbanhaw sa Iyang Kaugalingon gikan sa mga patay, dayon, kung ingon-ana dili ba nga kinahanglan usab buhaton sa—sa Pangasaw-onon ang mao rang butang, nga mamahimong eksakto mismo sa giingon sa Pulong nga mamahimong unsa Siya sa niining katapusang mga adlaw? Dili ba nga kinahanglan mapasig-uli Siya pinaagi sa Malaquias 4? Dili ba nga kinahanglan maipadayag Siya sama kaniadto sa mga adlaw sa Sodoma? Dili ba nga kinahanglan mamahimong eksaktong ingon niana gayud ang kalibutan? Dili ba kining mga butanga usa mismo ka hingpit nga pagpaila sa Pulong sa Dios nga gipadayag kanato?

<sup>244</sup> Bueno, mga higala, nahibalo ko nga napadugay ko na kamo sa husto, kinse minutos sa dili pa ang paniudto, apan tingali matapos na nako nianang orasa. Apan matikdi, tan-awa dinhi, daw sa unsa ka hingpit gyud kini. Wala ko mahibalo kung kanusa ko kamo makita pag-usab. Kita n'yo?



<sup>245</sup> Tan-awa, matikdi kini. Apan nakita na sa Dios kaniadto pa ang Pangasaw-onon diha sa Pamanhonon. Alleluya! Kita n'yo, aron luwason ang Iyang Asawa, sama ni Adan, kinahanglan Niya nga ubanan Siya. Nahibalo si Adan kaniadto kung unsa ang iyang ginabuhat; Wala mahibalo si Eva kaniadto kung unsa ang iyang ginabuhat, apan mikuyog si Adan sa pagbiya uban sa iyang asawa. Kita n'yo? Ug gikuha ni Jesus ang puwesto sa Iyang Asawa ug nahimong kasal-anan alang sa maong Asawa. Hinumdomi, nga nahimo Siyang kamo, gitindogan Niya ang inyong silot, aron kamo makatindog diha sa Iyang lugar. Nagtindog Siya sa inyong lugar, aron kamo makatindog diha sa Iyang lugar. Grabe nga gugma! Grabe nga pagpakig-fellowship! Unsaon pa man nato sa paglimod niana? Unsaon pa ma'y buhaton nato gawas nga higugmaon Siya, higala? Mahimo kong magpabilin dinha sa daghang mga oras, apan padayon kita.

<sup>246</sup> Sama sa kasinatiang pentecostal sa karon, ug ang pagkunsad sa Espiritu Santo sa niining katapusang mga adlaw, ingon nga gisaad na, sama kini sa kasubayan sa usa ka titulo. Kita n'yo?

<sup>247</sup> Karon, mahimo kang makakuha og titulo. Sigurado. Kita n'yo? Mahimo kang makakuha og titulo sa usa ka luna, apan sa gihapon dili kana nagapasabot nga sa imo na gyud kana. Dili, sir. Usa ka tawo gikan sa halayo ang mahimong moabot ug moangkon niini. Apan kung makuha mo ang kasubayan, nga nagapakita nga ang tanan nga mahimong magangkon niini napapas na, sugod pa sa pinakasinugdanan niini. Husto ba kana?

<sup>248</sup> Ug kung ang usa ka tawo nagsulti nga siya nagatoo sa Pulong, ug dayon sa dihang moabot ang Balaang Espiritu, Kini mao ang kasubayan sa titulo. Ug kana ang nagahatag kanimo og pahanugot, sa dihang anaa na kanimo kanang kasubayan, nga ang matag bahin niana ikaw ang tag-iya, ug ang tanan nga anaa niini ikaw ang tag-iya. Amen! Ug kana ang nagahatag kanato og kasubayan, pag-nagaabot ang Espiritu Santo sa niining titulo nga nakita na sa Dios sa wala pa ang pagkatukod sa kalibutan, ug gisulat ang ngalan niini sa Basahon sa Kinabuhì; apan gipanganak lang sa lalaki ug babaye, ug napailalum sa sala, ug nahimong sal-an. Apan sa dihang gitooan ko Kini, nadawat ko ang titulo; apan sa pag-abot sa Espiritu Santo, Kini ang kasubayan nga ang tanan nga batok kanako, bisan pa kung butang kini nga nabuhat sa akong inahan, nabuhat sa akong amahan, nabuhat man sa akong lola . . .

<sup>249</sup> Sama sa luoy'ng, batang patolon nga akong naiampo, kaganina lang, nga napanunod niya sa iyang mga apohan. Ang pagkapatolon naipasa-pasa, ug napanunod sa maong bata, ang ingon ko.

<sup>250</sup> Apan sa diha nga miabot ang kasubayan, gitangtang Niini, og gipanas ang tanan-tanan. Kung ingon niana aduna na kanako

ang kasubayan. Amen! Ug maingon ka sigurado sa Espiritu nga nagbanhaw kang Cristo gikan sa mga patay, aduna kanako ang kasubayan sa titulo nga ako kabahin nianang Lawas, uban sa kasubayan sa Espiritu Santo nga nagpahimo nianang lawas sa Pulong nga magkinabuhi nga eksaktong sama sa gibuhat Niini diha Kaniya, sama sa Iyang gisaad sa katapusang mga adlaw. Ang kasubayan! Ang tanan kong kasal-anan napanas na, ang tanan mong kasal-anan napanas na, pinaagi sa Dugo ni Jesus Cristo, ug ang Espiritu Santo miabot ingon nga usa ka kasubayan ngadto sa titulo nga gihatag sa Dios kanako pinaagi sa grasya, pinaagi sa Iyang pagkahibalo-nang-daan. Oh, grabe!

<sup>251</sup> Unsa man ang inyong gikahadlok? Dili ikatingala nga miingon Siya, “Ayaw kahadlok; Ako mao Siya nga namatay ug nabuhi pag-usab; ug Ako buhi hangtud sa kahangturan; ug ania Kanako ang mga yawe sa kamatayon ug sa hades.” Ayaw kabalaka sa unsa mang butang. Bisan ang kamatayon dili makapasakit kaninyo. Matikdan. Pagkaanindot!

Dalion nato kini karon.

<sup>252</sup> Ang kasubayang titulo! Ang utang nabay-ran na. Ang tanan nga batok niini napanas na. Ha-ha-ha! Himaya! Mahimong daw sa usa ka hangal ako, apan malipayon ako. Matikdi. Kita n’yo? Oh, usa ka kasubayang titulo, naamgo ba ninyo kung unsa ang buot ipasabot niana? Naamgo mo ba kung unsa ang buot ipasabot niana, igsoon? Walay unsa man nga ang makaagaw niini kanimo. Amen. Ako’y tag-iya na. Amen. Unsa’y . . .

<sup>253</sup> Unsa nga titulo? Ako karon naghimulos na sa akong benepisyo, sa Iyang kamatayon, paglubong, ug pagkabanhaw. Siya nahimong ako, aron nga ako mahimong Siya. Karon, Siya nahimong makasasala, aron nga ako mahimong usa ka anak, amen, ug nagkupot na sa kasubayang titulo. “Kay kini nga mga ilhanan maganunot kanila nga nagatoo,” kita n’yo, ang kasubayang titulo!

Karon dalion nato, sa dili pa . . . Aduna pa kita og mga diyes minutos.

<sup>254</sup> Himatikdan nato karon, sa kadali, ang paghatag og kinabuhi sa Espiritu. Ipakita ko kaninyo ang pipila ka mga ilhanan aron nga inyong masabtan. Tan-awa, karon bantayi kung unsa, kining “makapabuhing Gahum” mao ang akong hilisgutan. Pagkahuman sa pagkabanhaw sa Anak, tan-awa kung unsa ang gibuhat Niini ngadto kanila kaniadtong Pentecostes, kung unsa ang gibuhat Niini ngadto kanila, kung unsa ang gibuhat sa maong makapabuhing Gahum ngadto kanila. Gibuhi sila Niini.

<sup>255</sup> Karon matikdan nato kung unsa ang gibuhat Niini ngadto kang Esteban. Si Esteban puno sa maong makapabuhing Gahum. Dili ba husto kana? Kita n’yo, puno siya sa makapabuhing Gahum. Tungod niini wala siya nahadlok. Miingon siya, “Kamong mga tikig og liog ug mga walay-

sirkunsisyon sa kasingkasing ug sa mga igdulongog, kanunay ninyong ginabatokan ang Espiritu Santo; sama sa gibuhat sa inyong mga ginikanan, mao usab ang inyong ginabuhat. Hain man sa mga propeta nga nagpakita sa pag-abot sa Maong Matarung, ang wala batoha sa inyong mga ginikanan?” Oh, grabe! Aduna gyud ma’y gibuhat ngadto kaniya. Sigurado, puno siya sa makapabuhing Gahum.

Ug miingon sila, “Patyon nato kanang tawhana!”

<sup>256</sup> Ug sa dihang namatay siya, gibato nila siya; ug ang iyang luoy’ng ulo, daghang mga bato ang miigo niini nga sama niana. Mihangad siya ug miingon, “Nakita ko ang mga Langit nga naabli.” Ang Gahum kadto nga makapabuhi nga nagapamuhat. “Nakita ko ang mga Langit nga naabli, ug si Jesus nga nagatindog sa tuo nga kamot sa Dios.” Mao kadto ang gibuhat sa Gahum nga makapabuhi kang Esteban.

<sup>257</sup> Matikdi ang usa pa ka tawo, nga nagkaaduna niining makapabuhing Gahum, Felipe ang iyang ngalan. Puno kaayo siya sa makapabuhing Gahum. Aduna siya niadto og dakung panagtigum didto sa Samaria. Ang mga yawa gipanghinginlan. Ang mga tawo nangabautismohan sa Ngalan ni Jesus Cristo. Nagkaaduna sila og malampuson nga panagtigum. Ug ang Espiritu nakigsulti ngadto kaniya, oh, ang—ang Dinamika mikanaug, ug miingon Kini, “Biyaan mo kining rebaybal.” Apan unsa na lang ang isulti sa mga ministro? Dili mahinungdanon kung unsay igasulti nila. Kita n’yo? Puno siya sa makapabuhing Gahum. Aduna kaniya ang gasolina, ug ang—ang Dinamika mikunsad diha kaniya. Miingon, “Umadto ka sa kamingawan.”

<sup>258</sup> Ug nakaplagan niya ang usa ka eunuco didto, ug gibautismohan niya siya sa Ngalan ni Jesus Cristo; usa ra ka tawo, nga maoy nagdala sa Mensahe ngadto sa Etiopia. Husto ba kana? Ug gituman niya ang Dios.

<sup>259</sup> Sa pagtuman sa Dios, kung wala ka pa nabautismohan sa Ngalan ni Jesus Cristo, buhata kana, ug tan-awa ang Gahum nga nagahatag-og-kinabuhi nga ginadasig ka pagkahuman niana. Kita n’yo?

<sup>260</sup> Sa dihang gibuhat ni Esteban kining dagkung butang. . . o, dili Esteban. Kondili si Felipe ang nagbuhat sa niining dagkung butang, nga gibiyaan kadtong dakung rebaybal ug gisunod ang mga sugo sa Dios, sa dihang gituman niya, pinaagi sa . . . Pinaagi sa pagbautismo niadtong eunuco, sa pagsunod sa Dios, puno gayud siya sa Gahum nga nagahatag-og-kinabuhi hangtud nga gisakgaw siya Niini. “Buhion Niini ang imong mortal nga lawas, kung kini ang Espiritu nga nagbanhaw kang Jesus gikan sa mga patay.” Gibuhi Niini si Felipe hangtud nga dili gayud siya makita diha sa mga usa ka gatus og singkwenta ka milya, nga didto diay siya sa ubang lugar, sa ubang ilaya. Gibuhi Niini ang iyang

mortal nga lawas. Giunsa niya pagbuhat niadto? Puno man gud siya sa Gahum nga nagahatag-og-kinabuhi.

<sup>261</sup> Oh, Iglesia sa buhi nga Dios, dili kita puede magpabilin dinhi nga nagsuso pa sa gamay'ng tsupong-asukar dinhi sa karon. Kinahanglan natong mapuno ug nga maiampo, pinaagi sa makapabuhing Gahum, hangtud mahatagan kita og kinabuhi sa Balaang Espiritu! Kinahanglan natong masakgaw, sa umalabot, sa nianang umalabot nga Pagsakgaw. Oo, sir. Amen! Oh, grabe!

<sup>262</sup> Pasayloa ko nianang pamulong. Nahunahunaan ko man gud ang mahitungod sa usa ka inahan nga nagahimo og gagmay'ng mga kasusohan, nga naandan na, alang sa bata. Ang pila kaninyo nga dugay na nga mga inahan makahinumdom gyud niini. Kung ang gamay'ng masuso naghilaka; nagakuha kamo og gamay'ng asukar, putoson kini diha sa masusohan ug ipasuso siya sa niini, aron lang nga dili na siya mohilak. Walay kaayohan nga mahatag kana. Patyon siya niini. Kita n'yo? Ang caffeine nga anaa dinha, ug butang, nga pinatam-isang aron iyang matulon, makapahatag kini og caffeine kaniya.

<sup>263</sup> Napul-an na kita sa ingon nianang butang. Pamalik kamo! Mga agila kamo; pamalik kamo sa Pulong sa Dios! Magmaligon mo; wala na'y maka-apekto sa inyong mga pagbati, busa gawasnon na kamo sa tanang mga iskandalo nga iya sa tawo. Bisan unsa pa ang igasulti ni bisan kinsa batok kaninyo, magpatubo lang kana og dugang pa nga gugma. Amen. Ug, ang Gahum nga nagahatag-og-kinabuhi, magpasaka ngadto sa Kalangitan, sa usa ka agila nga nakalupad na ibabaw sa mga manok, ngadto sa pinakamataas nga Langitnong mga dapit diha kang Cristo Jesus! Oh!

Kini anaa kaniadto kang Felipe. Gibuhi siya Niana, gisakgaw siya palayo.

<sup>264</sup> Tan-awon nato ang usa pa ka lalaki. Aduna kaniadto og usa ka tawo nga ginganla'g Enoc. Karon, naglakaw siya sumala sa matag Pulong sa Dios, sulod sa lima ka gatus ka tuig. Aduna siya og pagpamatuod, nga, "Wala ako sukad ni usa ka higayon nga wala gituman ang Iyang Pulong." Puno gayud siya sa Gahum nga nagahatag-og-kinabuhi sa dihang gikunsaran siya sa Dinamika, tungod niadtong mga Mekanika, dili siya kinahanglan nga mamatay; basta na lang siya Miuli. Nagsugod lang siya paglakaw. Hilabihan siyang... Sama ni Felipe, puno kaayo siya sa Gahum nga nagahatag-og-kinabuhi, imbis nga moadto sa Gaza ug moadto sa ubang lugar, kon diin, nakaplagan nila siya didto sa mga kayutaan nga nahibabaw. Imbis sa niadtong direksyon, nagpadayon lamang siya, oh, miingon, "Tigulang na ako, bisan unsaon pa. Puno man ko og makapabuhing Gahum, magalakaw na lang ako nga pabiya niining kalibutan."

265 Kana ang mao rang Gahum nga makapabuhi nga aduna kanato karon. Kita n'yo, buhion Niini ang inyong mortal nga lawas. Dili ba husto kana? Kini mao ang Gahum nga makapabuhi.

266 Si Enoc, nga may hingpit nga pagpamatuod, nga, “Ang tanan nga gisugo sa Dios nga akong buhaton, gibuhat ko. Ang tanan nga akong nakita nga Iyang gisulti nga akong buhaton, gibuhat ko.” Ug puno gyud siya sa—sa Dinamika, o—o sa Mekanika, hangtud nga, sa dihang gikakunsaran siya sa Gahum nga makapabuhi, ang Mekanika, basta na lang siya gialsa Niini. Naglakaw siya pabiya sa kalibutan, padulong sa Langit.

267 Karon, karon matikdi, kang Elias. Human nga . . . Tan-awa, si Elias, kadtong bantugan nga propeta, bantugan nga tawo sa iyang panahon. Pasayloa ko. Igsoong lalaki, igsoong babaye, niadtong panahona gipangbadlong niya sila nga mga babayeng pinintalan ang nawong, silang mga Jezabel ug mga Achab. Ug mingbarug hangtud siya . . . Ug wala ni usa, nga medyo, nga ningbarug uban kaniya. Ug nangbadlong siya, ug nanghagit, ug ningbarug didto, ug giampingan siya sa Dios ug gitabangan siya sa tanang kahintang. Kabalo mo, gikapoy ang maong tigulang usa niana ka adlaw. Miingon siya, “Nagakatigulang na ako, busa dili na ako mahimong magpadayon pa.” Paingon na siya, siguro, sa pagka-nubenta anyos ang panuigon; tigulang na kaayo, ug naglakaw-lakaw pa didto, ug puno kaayo siya sa Gahum nga nagahatag-og-kinabuhi. Kabalo ba mo kung unsa? Naglantaw siya tabok sa Jordan.

Oh Dios! Halos makita ko na ang sa pikas nga bahin. Makita pud ba ninyo?

268 Puno kaayo siya sa Gahum nga makapabuhi, hangtud nga, nakita niya ang carro nga gihigot didto, mga kabayo nga Kalayo ug carro nga Kalayo, nga gihigot sa usa ka kahoy didto. Basta lang siya nga mitabok sa suba ug Mipauli, nga wala miagi og kamatayon. Ang Gahum nga nagahatag og kinabuhi ang nagpadala, nagpakanaug sa carro gikan sa Langit ug gikuha siya pasaka. Gipahubo pa gyud ang kupo kaniya ug giitsa kini ngadto kang Elias. Husto kana.

269 Karon, pagkahuman gipudyot ni Eliseo kadtong kupo, usa ka tipo sa Iglesia usab, kita n'yo, gipudyot niya kadtong kupo. Karon, nakapamuhat siya og dobleng mga milagro, nga maoy tipo ni Cristo ug sa Iglesia. Kita n'yo? Upat ang nabuhat ni Elias; walo ang iyang nabuhat. Kita n'yo, karon, siya—doble ang iyang gahum, tungod kay gipangayo man niya kini. “Mas dagkung mga butang kay sa niining mga ginabuhat Ko ang pagabuhaton ninyo.” Kita n'yo? Apan puno kaayo siya sa Gahum nga nagahatag og kinabuhi, ug tanan na, hangtud nga nabuhat niya kining tanan, doble pa, ang mga nabuhat ni Eliseo, kay sa mga nabuhat ni Elias. Ug matikdi, nabuhi siya hangtud sa mga

otsenta o nubenta anyos ang panuigon, natigulang na siya ug siya—namatay siya. Namatay siya, ug ilang—gikuha nila siya ug gilubong siya.

<sup>270</sup> Kabalo mo, bueno, wala siya biyai sa Gahum nga nagahatag og kinabuhi. Daghang, daghang mga tuig pagkahuman niadto, sa dihang nagkadugta na ang unod gikan sa iyang mga bukog, nga napahiluna didto sa usa ka lubnganan. Ug daladala kaniadto sa mga tawo ang patay'ng lalaki usa niana ka adlaw, ug pagkakita nila sa ilang kaaway, ug basta na lang giitsa nila kadtong patay'ng lalaki ibabaw sa mga bukog ni Eliseo. Hilabihan ka daku ang Gahum nga makapabuhi nga atua sa mga bukog niya hangtud nga mitindog pabalik ngadto sa kinabuhi ang maong lalaki. Oh!

<sup>271</sup> “Pagabuhion Niini ang inyong mortal nga lawas.” Bisan pa man nga patay ug naagnas na diha sa lubnganan, ug bisan pa niana kadto nga Gahum nga makapabuhi nagpabilin niadto nga abog. Aleluya! Uh! “Siya nga nagbanhaw kang Cristo gikan sa mga patay magahatag usab og kinabuhi sa inyong mortal lawas.” Ang Elias sa kaniadto, si Elesio ug si Elias. . .

<sup>272</sup> Hinumdomi, kadtong patay'ng lalaki, kadtong propeta, nga puno nianang Gahum nga makapabuhi, napahiluna na didto sa lubnganan ug naagnas na; aduna kadto og dakung Gahum nga makapabuhi, hangtud nga, pag-itsa nila og patay'ng lalaki didto sa ibabaw niya, nabuhi mismo kini. Mahimo pa sa gihapon niyang magpandong og mga kamot ngadto sa masakiton. Dili ba? Amen. Mao kana.

<sup>273</sup> Ug hinumdomi, kita'y unod sa Iyang unod, si Jesus Cristo. “Kita'y unod sa Iyang unod, ug bukog sa Iyang mga bukog.” Oh, wala na'y paagi nga mapugngan kini. Mangabanhaw gyud kita, ug kana lang. Mangabanhaw gyud kamo, kana lang.

<sup>274</sup> Ang Pasko sa Pagkabanhaw nagakahulogan og labaw pa sa tradisyon lamang. Kini alang usab sa karon, kay ang atong mga lawas gibuhi na uban Kaniya ug kita nagalingkod na sa Langitnong mga dapit.

<sup>275</sup> Ug kining lawas mahimong matun-as sa dagat; mahimong madunot kini diha sa yuta; mamahimo og usa na lang ka kutsara nga abo; apan siguradong mabanhaw kini. Kay, ang Espiritu nga nagbanhaw sa akong Ginoo gikan sa mga patay naghatag man og kinabuhi niining mortal nga lawas. Gibuhi Niini ang inyong mortal nga lawas. Ug kita ang mga benepisyaryo Niya sa Iyang pagkabanhaw, sa Iyang palisiya sa Kinabuhing Walay Katapusan nga kanunay kong ginahisgotan, kabalo na mo. Dili ikatingad-an nga ginasulti Niya, “Ayaw kahadlok.” Nahibalo gyud Siya.

<sup>276</sup> Tungod kay sama sa gisulti ni Pablo, “Kamatayon, hain na ang imong ikot? Lubnganan, hain na ang imong pagdaug? Puno ako sa Gahum nga makapabuhi. Salamat sa Dios, Nga naghatag

kanato og pagdaug pinaagi sa atong Ginoong Jesus Cristo.” Oo, sir! Gahum nga makapabuhi. Oh, grabe!

<sup>277</sup> Buhi Siya hangtud sa kahangturan, “ang mao ra sa gihapon kagahapon, karon, ug hangtud sa kahangturan.” Mga Hebreohanon 13:8. Matikdi, ang Mesias, ang Ang dinihogan; ingon man usab ang Iyang Pangasaw-onon, ang mga gagmay’ng-Mesias, kita n’yo, Ang dinihogan.

<sup>278</sup> Matikdi, ang kamatayon dili makapugong sa Gahum sa Dios nga makapabuhi. Dili makapugong ang kamatayon Niini. Kung Kini anaa na kanimo, Kini Walay Katapusan. Walay bisan unsa man ang makapugong Niini. Dili mo Kini makontrolar; wala—wala ka’y mahimo ngadto Niini. Matapos man ang inyong kinabuhi, dili kini makapahunong Niini; mao sa gihapon ang epekto Niini sama ra kaniadto.

<sup>279</sup> Matikdi, puno si Moises sa maong Gahum nga nagahatag-og-kinabuhi. Dili ba? Usa siya ka propeta nga kaniya ang Pulong nagaabot. Siya kabahin sa Pulong. Siya mao ang Pulong niadtong panahona. Husto ba kana? Ug pagkahuman nga namatay siya, walo ka gatus ka tuig human niadto; didto sa Bukid sa Pagkausab sa Dagway, atua siya, kauban si Elias. Husto kana? Ang Gahum nga nagahatag-og-kinabuhi, dili Kini arang matangtang sa kamatayon. Dili, dili. “Pagabangunon Ko kini pag-usab.” Miabot ang mga Anghel; gilubong siya didto sa usa ka walog. Natun-as na siya ug nawala na, nawala na ang iyang mga bukog, ug tanan nang uban pa, apan ang Gahum nga makapabuhi nagpabilin pa sa gihapon didto. Gibuhi siya Niini ug gidala siya pasaka. Ug atua siya, nga nagatindog didto. Matikdi.

<sup>280</sup> Moingon mo, “Husto ba kana, Igsoong Branham, pagkahuman sa walo ka gatus ka tuig?” Oh, grabe!

<sup>281</sup> Kung basahon ninyo sa Mateo, aduna ko og Kasulatan, Mateo 27:51. Mahimo ninyong isulat, ilista kini. Ang tanang mga tawo kaniadto, nga nagatoo nga Siya moabot. . . Ang gisulti sa Biblia dinhi, pagkahuman nga Siya moabot, nangatulog sila diha sa yuta. Ang Gahum nga makapabuhi anaa na kanila, ug sila’y kabahin Niya, silang mga balaan. Kabahin Niya sila, tungod kay sila nanagtoo man Kaniya.

<sup>282</sup> Sa potensiyal aduna na kanila kana nga Kinabuhi, pinaagi sa mga carnero nga halad, usa ka halad pagpasig-uli, nga ang espiritu sa carnero dili man gani mahimong moadto sa tawo. Unsa pa kaha sa karon nga ang Espiritu sa maong Tawo, sa Dios Mismo, anaa kaninyo, kita n’yo, siguradong mas grabeng Gahum nga makapabuhi ang aduna kanato! Apan pinaagi kaniadto sa halad pagpasig-uli alang sa kasal-anan mao nga ginahalad ang usa ka carnero, usa ra kadto ka tipo. Ang aduna kanato sa karon dili na usa ka tipo; ang realidad na kini. Unsa pa man ang gikahadlok nato? Ug kadtong mga tawo nga aduna lamang og

usa ka tipo, nga nagapahinugod ngadto sa Iyang pagkabanhaw, ug gilubong uban niini.

<sup>283</sup> Sama kaniadto kang Job diha sa iyang dakung panghingutas, grabe, ang tanan gikuha gikan kaniya! Giingon sa yawa, “Itugyan siya kanako. Himoon kong magapasipala siya Kanimo sa Imong atubangan.” Ug dayon gipahanugotan siya.

<sup>284</sup> Giingnan lang, “Ayaw gayud kuhaa ang iyang kinabuhi.” Ug gibuhat niya (sa yawa) ang tanan gawas lamang sa pagkuha sa iyang kinabuhi.

<sup>285</sup> Ug bisan ang iyang asawa nahimo nang batok kaniya. Miingon nga ang gininhawa ni Job lahi na gyud kono. Sa ubang pagkasulti, siya—ayaw na niyang may kahilambigitan pa kay Job. Daw sa wala na siya’y gugma sa iyang bana, ayaw na niya kaniya. “Job, makaloolooy ka! Nganong dili mo na lang tunglohon ang Dios, ug mamatay na?”

Miingon, “Ikaw nagasulti sama sa usa ka babayeng buang.” Oh, grabe!

<sup>286</sup> Kita n’yo, nagpabilin siya sa kung unsa ang anaa kaniya. Karon, usa siya ka propeta. Miingon siya, “Dili ako makasasala. Naihalad ko na ang inandam nga halad.” Amen. Nasayod siya kung asa siya nagabarug. Nagabarug siya sa Pulong. Bisan unsa pa ang isulti sa uban, nagpabilin mismo siya sa Pulong. Dayon sa niadtong makuyaw nga takna . . . Miingon, “Ikaw nagasulti sama sa usa ka babayeng buang.” Ingon pa niya, “Ang Ginoo ang mihatag, ug ang Ginoo ang mikuha; aba, dalaygon ang Ngalan sa Ginoo!” Ingon pa, “Mianhi ako sa kalibutan nga wala ni bisan unsa. Miabot ako, nga hubo, magabiya ako sa mao rang paagi. Dalayegon ang Ngalan sa Ginoo!” Naglingkod siya didto, nga gituboan og mga hubag, nangamatay ang iyang mga anak, nangahurot ang iyang mga kabtangan, ug tanan niyang mga higala nahimo nang batok kaniya, ang iyang mga miyembro sa iglesia, ang tanang uban pa, nga ginakagis niya ang iyang lawas gamit ang . . . Ug daw sa unsa ka makaloolooy’ng talamayon! Wala pa ni usa kaninyo ang nakasinati og ingon niana. Apan bisan pa niana, nagpabilin siya nianang Pulong.

<sup>287</sup> Usa siya ka agila. Oh, grabe! Dili mo puede nga padayon natabilan ang iyang mga mata sa tanang panahon. Dili, dili gyud. Sa kalit lang, sa pagpabilin niya niadtong Pulong, unsay nahitabo? Ang mga panganud nangawahing, misugod dahunog ang mga dalugdug, misugod pagkidlap ang kilat, ug mihangad si Job ug nakakita siya og panan-awon, miingon, “Nasayod ako nga ang akong Manunubos buhi. Sa kaulahi ang mga adlaw Siya motindog sa ibabaw sa yuta. Ug bisan nga hurot nang gikaon sa mga ulod kining lawas, ang mga bukog ug tanan na, mamaatua kanang Gahum nga makapabuhi. Makita ko mismo ang Dios, Kinsa’y ako mismo makakita. Ang akong mga mata mismo ang makakita ug dili ang uban.” Husto ba kana? “Bisan pa nga giut-



ut na ang akong rinyon sa sulod nako, bisan pa nga tapos na gikaon sa mga ulod diha sa akong panit, ang akong lawas.”

<sup>288</sup> Kabalo mo, ang mga ulod sa panit wala nagaanha kaninyo. Anaa na sa sulod ninyo kanang ulod, ang inyo mismong mga ulod sa panit. Namatikdan ba ninyo kana? Ibutang man kamo sa lungon, ug ipaselyado kini aron dili gyud moalisngaw; Pagakaanon ka sa mga ulod, sa gihapon, tungod kay anaa na ang mga niini sa sulod ninyo. Kamo’y usa lang ka hugpong sa mga ulod, sa sugod pa lang, sa sulod ninyo.

<sup>289</sup> “Bisan pa ang mga ulod sa panit, laglagon ako sa mga ulod sa akong panit, ang akong lawas, bisan pa niana diha sa akong unod makita ko ang Dios.”

<sup>290</sup> Ug sa buntag nianang pagkabanhaw! Himaya! Aleluya! Si Mateo, kining bantugan nga magsusulat, diha sa 27:51, nagsulti, “Human nga Siya nabanhaw gikan sa mga patay, ang mga balaan sa Daang Tugon, daghan kanila nga mga nangatulog diha sa abog sa yuta, namangon gikan sa lubnganan, ug misulod sa Siyudad, ug nagpakita ngadto sa kadaghanan.” Kanang Gahum nga makapabuhi, atua pa sa gihapon sa mga bukog ni Elias sa dihang halos wala na’y mga bukog, atua pa sa gihapon kang Job nga halos wala na gani og bisan usa na lang ka kutsara nga abog ang nahabilin sa iyang lawas. Apan ang Gahum nga makapabuhi atua pa sa gihapon didto.

<sup>291</sup> “Kung kining Espiritu nga nagbanhaw kang Jesus gikan sa mga patay nagapuyo sulod kaninyo, pagabuhion usab Niya ang inyong mortal nga lawas.”

<sup>292</sup> Moingon kamo, “Oh, unta kaniadto nabuhi ako didto. . .” Nagkinabuhi kamo karon sa mas maanindot nga panahon. Karon kung kamong tanan. . .

<sup>293</sup> Nakita ko nga naglista kamo sa pipila ka mga Kasulatan. Sige, ilita ang Unang Mga Taga-Tesalonica 4:16. Matikdi kung unsa ka maanindot, kita n’yo. Sa. . . “Ang mga balaan, silang mga nangatulog diha kang Cristo, pagadad-on sa Dios nga uban Kaniya,” kita n’yo, mga balaan diha sa lubnganan, nga nanagpahulay. Sama ni Elias kaniadto; ang uban usab mahisama ni Eliseo kaniadto; kita n’yo, ang uban pagabangonon, ang uban diretsong pagasakgawon, ang uban anaa sa lubnganan. Pareho silang mahiuban Kaniya. “Ang trumpeta sa Dios magatingog, ug ang mga nangamatay diha kang Cristo mouna sa pagpamangon. Ug kita nga buhi ug nanghibilin pagasakgawon pagdungan uban kanila, aron sa pagsugat sa Ginoo diha sa kahanginan.” Ang makapabuhi nga Gahum ngadto sa mga buhi; ang makapabuhing Gahum ngadto sa mga patay. Kita n’yo?

<sup>294</sup> Ang mao rang Gahum sa Dios nga makapabuhi parehong nai-representar sa niining mga propeta. Tan-awa ang ilang mga ngalan, halos magkapareho, Eliseo, Elias. Tan-awa ang

Pangasaw-onon ug Pamanhonon? Ang usa kanila mao si G. Jesus; ug ang usa mao si Gng. Jesus. Nakita n'yo, halos magkapareho, nga—nga tali mismo sa—sa Lalaki ug Babaye. Kita n'yo?

<sup>295</sup> Si Elias, ug tan-awa kung giunsa kini pagrepresentar dinhi. Karon, si Eliseo . . . Gisakgaw pasaka, nga nagrepresentar sa Iglesia, husto, si Elias; ug si Eliseo nagpahulay hangtud sa pagkabanhaw. Kita n'yo? Sama lamang kini sa usa ka langgam, nga nagkinahanglan og duha ka mga pako aron mabalanse ang kaugalingon niini. Kita n'yo? Ang Iglesia girepresentar mismo niining duha ka mga propeta. “Kay kita nga mga buhi pa nga mahablin hangtud sa pag -abot sa Ginoo, dili magapugong kanila nga nangatulog; kay ang Trumpeta sa Dios pagapatingogon,” ang maong duha ka pako ang dungan nga magkuyog, ug manglupad kita, aleluya, manglupad paitaas. Tungod kay, (unsa?) diha sa mga buhi, o diha sa mga patay, kanang makapabuhi nga Gahum buhi sa gihapon.

<sup>296</sup> Matikdi. Hinumdumi, hinumdumi karon, gihatagan kita og kinabuhi aron makita kung unsa kining mga butanga. Tan-awa ang Gahum nga makapabuhi sa niining panahona. Hinumdumi, gibuhi na kita. Dili pa lang dugay, aron makatabang. . .

<sup>297</sup> Ug ako—sa hunahuna ko gisulti sa atong Ginoo, ug gisulti usab ni Pablo, “Kung unsay gipakita kanako sa Amahan, wala gyud nako gitago. Ginasulti ko mismo kaninyo.” Ug sa niining katapusan nga mga adlaw sa dihang nakita nato sa atong taliwala ang Iyang Gahum nga makapabuhi, gihatag sa gani Niya kanato ang maong Gahum, aron makitang nangaayo ang mga masakiton. Nakita nato nga ang Gahum nga Makapabuhi nagapanglihok sa atong taliwala, sama kanila kaniadto nga Kini anaa kanila niadtong unang mga adlaw, kita n'yo, makita nato Kini nga gibalik pinaagi sa panan-awon ug gibanhaw ang mga patay, makita nato Kini nga gipang-ayo ang mga masakiton.

<sup>298</sup> Niadtong usa ka adlaw aduna ko'y kaestorya. Si Donovan Weeks dinhi, siguro nakaila na kamong tanan kaniya. Nangayam ako kaniadto uban kaniya. Makalolooy ang maong tawo . . . Usa siya ka buutan nga tawo. Nagatambong siya dinhi sa pagsimba. Siya . . . Usa ka buutan suod kong higala. Ug siya'y . . . Miingon Siya, “Dili ko unta gustong samokon ka.”

<sup>299</sup> Mitan-aw ako, ug nakita ko ang iyang dalunggan, nabaliskad, nakagawas ang anaa sa sulod. Ug miingon ko, “Kumusta ka, Donavon?” Gigunitan ko lang ang kamot niya, nga sama *niana*, ug usa diay ka kanser. Miingon ko, “Donavon, unsa man ang nahitabo sa imong dalunggan?”

<sup>300</sup> Ang sulti niya, “Wala ko mahibalo, Igsoong Branham. Mga unom, pito na ka bulan, ug pasamot nga pasamot og . . .”

Ingon ko, “Nganong wala man ka magsulti bahin niini?”

301 Miingon, “Ako—dili ko gustong samokon ka pa, Igsoong Branham.”

Ingon ko, “Kabalo ka ba kung unsa kini?”

Miingon, “Aduna na ko’y suspitsa.”

302 Gipandong ko lamang ang akong kamot kaniya, wala ko’y ni usa ka pulong nga gisulti. Duha ka adlaw human niadto, wala na’y bisan usa ka ulat. Unsa man kadto? Ang Gahum nga makapabuhi, kita n’yo, buhion Niini ang inyong mortal nga lawas. Kung padayon nga naut-ut ang iyang dalunggan, ang iyang utok mahimong giut-ut na usab unta, kita n’yo, tingali namatay na siya. Apan, tungod sa Gahum nga makapabuhi! Kita n’yo?

303 Ug usa niana ka adlaw sa dihang nahago gyud ko og ayo, ako mismo, bahin sa . . . Miingon ako, “Kung inyong . . . Dong, mas maayo nga ipadayon mo na, singkwenta anyos ka na. Ikaw, kung aduna ka’y pagabuhaton alang sa Ginoo, mas maayo pa nga dalion mo ug buhaton mo na sa gilayon. Nagakatigulang ka na.” Kita n’yo? Ug didto niadtong buntaga, miabot ang Gahum nga makapabuhi, ug gipatan-aw Niya kanako didto sa pikas tabel, ug nakita ko kamong tanan didto. Uh-huh. Kita n’yo? Siya miingon, “Ang tanan nga imong gihigugma, ug ang tanan nga nagmahal kanimo, sila gikahatag kanimo.” Kita n’yo? Nakita ko silang tanan didto nga sama niana. Unsa man kadto? Ang Gahum nga makapabuhi.

304 Si Juan nga tigpadayag puno sa Gahum nga makapabuhi, nga nagtindog didto ug nakita ang katapusan gikan sa sinugdanan.

305 Si Isaias puno sa Gahum nga makapabuhi, ug nagtindog ug nakita ang Milenyum ug tanan na.

306 Gahum nga makapabuhi! “Ug kung ang Espiritu nga nagbanhaw kang Cristo gikan sa mga patay, nagapuyo sulod kaninyo, pagahatagan Niini og kinabuhi ang inyong mortal nga lawas . . . mortal nga lawas.” Hinumdumi, ang Gahum nga makapabuhi!

307 Tan-awa kung unsay nakita nato niining panahona. Ang Gahum nga Makapabuhi miabot kanato, aron ablihan ang Pito ka mga Selyo. Unsa man kana, kaalam ba kana sa usa ka tawo? Dili, ang Gahum kana sa Dios nga makapabuhi. Kita n’yo, ang Gahum sa Dios nga makapabuhi gitagna na nga mahitabo kini. Kita n’yo, ang Gahum sa Dios nga makapabuhi ang naghimo sa kalibutan nga ipamatuod Kini, nga kini mao’y Kamatuoran. Ang Manulonda sa Ginoo, nga gisulti ko na kaninyo, anaa ra sa palibot, diha sa usa ka Haliging Kalayo; ang Gahum nga makapabuhi ang nagpahimo sa kalibutan nga ipamatuod nga Kini mao’y Kamatuoran. Ug, kana, wala nila hingbalo-i kung unsa gyud Kana; pero nahibalo kita, tan-awa n’yo lang sa

ingon *niini*, ug Kini ang atong Ginoo nga atua didto sa itaas, nakita n'yo.

<sup>308</sup> Siya Mismo Ang nag-abli niadtong mga Selyo. Siya mao kadtong mga Selyo, tungod kay ang tibuuk Pulong sa Dios mao si Cristo, ug si Cristo mao ang mga Selyo nga giablihan. Unsa man kung ingon-ana ang pag-abli sa mga Selyo? Ang Cristo nga ginapadayag.

<sup>309</sup> Ug ang mismong pito ka mga Manulonda, nga girepresentar ang kumpletong Pito ka mga Iglesia, ug wala gani nato makita Kini. Sila ang nakakita, sila ang nakakuha og litrato, dili kita. Ug atua Siya, didto, ang Labing-hataas nga Maghuhukom; ginapakita nga Siya mao ang Alpha ug ang Omega, ang sinugdanan ug ang katapusan. Grabe nga pagpaila! Ang Gahum nga makapabuhi ang naghimo niana kanato.

<sup>310</sup> Ang Gahum nga makapabuhi ang nagpakita kanato sa Iyang Pag-abot. Ang Gahum nga makapabuhi ang nagsakmit kanato gikan sa kamatayon ngadto sa Kinabuhi. Ang Gahum nga makapabuhi ang maoy nagahimo og spirituwal nga mga pag-ila; aron hibaloan kung unsa ang problema ninyo, ug unsa ang buhaton; kung unsa ang gibuhat ninyo, ug kung unsa ang wala unta ninyo gibuhat; ug kung unsa unta ang angay ninyong gibuhat, ug kung unsa ang mahitabo kaninyo. Ang Gahum ra gyud nga makapabuhi, sa tanan sa niining mga butang!

<sup>311</sup> Ang atong Ginoong Jesus puno kaayo sa Gahum nga makapabuhi, Siya mao ang tanan Niini, ang tanan-tanan. Puno kaayo Siya sa Gahum nga makapabuhi, nga ingon niini ang gisulti Niya, “Gub-on man ninyo kini nga lawas, ug pagabangonon Ko kini sulod sa tulo ka adlaw.” Grabe nga pagsalig sa Gahum nga makapabuhi, “Gub-on man ninyo kini nga lawas ug Akong . . . ang kining templo, ug patindogon Ko kini sulod sa tulo ka adlaw.”

<sup>312</sup> Aba, nganong gisulti man Niya kana? Nahibalo man Siya nga nahisulat na kini pahinungod Kaniya, kita n'yo, nga nahisulat kini pahinungod Kaniya, pinaagi sa Pulong sa Dios nga dili gayud mapakyas. Ang Pulong miingon, “Dili Ko motugot nga Ang Akong Balaan makakita og pagkadunot, ni pagabiyaan Ko ang Iyang kalag didto sa hades.” Ug nahibalo Siya nga pagabanhawon Siya nianang Gahum nga makapabuhi, nga wala ni usa nga selula niini ang madunot.

<sup>313</sup> Siya miingon, “Gub-on man ninyo kining templo, ug igapatindog Ko kini pag-usab sulod sa tulo ka adlaw.”

<sup>314</sup> Ngano man? Propesiya kadto, Pulong sa Dios. Ug ang propesiya, kung Kini tinuod nga Pulong sa Dios, dili gyud mapakyas. Ang mao rang propesiya ug Pulong sa Dios nga nagsulti nga Iyang pagabanhawon Siya, ang nagsulti usab nga kita nabanhaw na uban Kaniya. Dili ikatingala nga gisulti Niya, “Ayaw kahadlok.” Ug nahisulat na, nga, “Ang Espiritu sa karon,

nga atua Kaniya kaniadto, nga karon ania na kanato, ginabuhì Niini usab ang atong mortal nga lawas.” Ayaw kahadlok, higala, ang A—n—a—k misubang na. Ang Anak nabanhaw na. Ayaw’g. . .

<sup>315</sup> Karon tan-awa niadtong pagkausab sa Iyang dagway. Kita kaniadto, tanan kita, girepresentar didto. Atua didto ang buhi nga mga balaan nga gisakgaw, atua didto si Elias nga nagatindog; ug atua usab si Moises nga nagatindog, ang nangamatay nga mga balaan girepre- . . . Didto, pareho silang adunay Gahum nga makapabuhì. Namatay man ang usa kanila, ug ang usa pa wala mamatay, pero pareho silang atua didto.

<sup>316</sup> Matikdi, oh, tan-awa kung unsa na ang makita nato sa niining katapusan nga mga adlaw. Ang mao rang butang nga Iyang gisaad, Juan 14:12. Karon tan-awa. [Blankong bahin sa teyp—Ed.] Mao gyud.

Ang mga tawo moingon, “Ginaangkon mo bang aduna ka og gahum?” Dili, dili, dili.

<sup>317</sup> Sama ra kita nila didto sa Bukid sa Pagkausab Sa Dagway, kita n’yo. Sigurado, wala kita mag-angkon og gahum. Apan, kita, sama—sama kanila kaniadto. . . Didto sa Bukid sa Pagkausab, wala nila gisulti nga, si Moises, wala nagsulti, “Kita n’yo na kung kinsa, kung kinsa ako,” ang mga tinun-an wala nagsulti, “kita n’yo na kung kinsa ako, kita n’yo na kung kinsa ako.” Kabalo ba mo kung unsa ang nahitabo? Matikdi, nakita nila nga gihimaya si Jesus. Kana lamang ang gusto nilang makita nga maipresentar, si Jesus nga gihimaya.

<sup>318</sup> Ug busa maingon man kini sa karon, wala kita gapaningkamot aron mamahimong usa ka bantugan nga tawo. Dili nato igsapayan kung unsa man ang ginasulti sa mga tawo bahin kanato. Ang atong ngalan wala og unsa mang bili; ang Iyahang Ngalan lamang. Ang atong kinabuhì, wali kini kapuslanan; ang Iyahang Kinabuhì lamang. Ang Iyahang Gahum lamang, dili ang atong gahum. Ug aduna lamang og usa ra ka butang nga gimahal natong buhaton, mao’y makita Siyang gihimaya. Ug unsaon man niini pagkahimo? Sa dihang gihimaya Siya sa ato, pinaagi sa pagkabanhaw Niya nga anaa kanato. Makita nato Siya nga girepresentar pag-usab kung unsa Siya kaniadto, sa karon.

<sup>319</sup> Nakuha ba ninyo kana? Kita n’yo, ang atong tinguha dili aron kita pagahimayaon. Ang atong tinguha dili sa kung unsang dakung ngalan. Ang atong tinguha dili ang pagtuboy sa kung unsa man nga iglesia, o padakuon pa ang Sunday school, o paningkamotan nga mapasulod, hiktan, aron mapugos, tanyagan og mga kumbira, o dalhan og artista, tanyagan og mga tsapa, o unsa mang butang nga sama niana. Dili kana ang atong tinguha. Ang atong tinguha mao’y aron makita Siyang gihimaya. Gihimaya, (sa unsa?) dili sa pagkamapahitas-on sa kaugalingon;

kondili diha sa sulod nato, diha sa atong mga kinabuhi, mapamatud-an nga Siya buhi ug nagapuyo sa sulod nato.

<sup>320</sup> Kung mapadaplin ko lamang ang akong kaugalingon, nga si William Branham dili man lang makasulod sa hunahuna, ug bisan kamo dili man lang makasulod sa hunahuna, hangtud nga makita nato nga si Jesus nahimaya gayud sa atong taliwala. Ang makita Siya, mao kana ang atong tinguha. Kana mao ang makapabu-. . .nagahatag kanato og Gahum nga makapabuhi. Ug nagahatag kanato og kalipay, ang pagpanghibalo nga kita anaa uban Kaniya, parehong unod ug bukog Niya, ingon nga Pangasaw-onon Niya; ug makita ang Iyang kaniadto pa nga mga gipanghimatud-an nga pamaagi, nga ginapamatud-an nga Siya nabanhaw na gikan sa mga patay. Kita n'yo?

<sup>321</sup> Dili ikatingala nga gisulti Niya, “Ayaw kahadlok”, tungod kay karon, matikdi, mga tinubos Niya kita, ug karon nangabanhaw na uban Kaniya. Mao kana kung unsa ang buut ipasabot sa Pasko sa Pagkabanhaw ngadto sa mga tawo, “nabanhaw na uban Kaniya”! Matikdi. Karon ania na kanato ang Iyang Espiritu, ang titulong abstract nga bayad na.

<sup>322</sup> Dili, wala kamo nagaingon, “Bueno, nagalaum ko nga mahimo ko unta kini.” Nahimo mo na kini. Dili nga, “*Mamahimo* ko kini.” Nahimo ko na kini. Dili ako ang naghimo niini; Gihimo Niya kini alang kanako. Kita n'yo? Dili ako; Siya! “Bueno, Igsoong Branham, ang ingon nila. . .” Dili ko igsapayan kung unsa man ang ilang ginasulti. Gibuhat na Niya kini didto, alang kanako. Kana lang ang gusto ko, ang akong gihunahuna.

<sup>323</sup> Gusto ko—gusto ko lang nga makita Siyang napadayag. Unsa mo man paghimo niini, pakanaugon ba Siya? Dili. Anaa Siya sulod kanimo. Kita n'yo, anaa Siya kanimo. “Bueno, kung ingon niana, Ginoo, kung mapadaplin ko lamang ang akong kaugalingon, Ikaw mapadayag. Ang akong kaugalingon. . . Unsaon Mo man sa paghimo niini? Tungod kay pagbulot-an kini Nimo nga mamaingon niini kini. ‘Magaduol ang tanan nga gihatag na sa Amahan kanako.’” Matikdi. Himaya!

<sup>324</sup> Tungod sa tanan nianang natigum nga ebidensya, ingon nga ania kita karon niining buntaga, oh, nahunahuna ko ang awit:

Sa buntag nianang pagkabanhaw,  
Sa dihang ang higot sa kamatayon naputol na,  
Mamangon kita, (Aleluya) Mamangon kita!

<sup>325</sup> Nagatoo ba kamo niana? [Nagaingon ang kongregasyon, “Amen.”—Ed.] Mamangon kita! Diha Kaniya nangahimo kitang kabahin Niya, ang Pasko sa Pagkabanhaw, ang gipadayag nga tinago sa Dios sama kini kaniadto, mahitungod sa Kinabuhi pagkahuman sa kamatayon. Mga buhi na kita karon, nga kaniadto mga patay sa sala ug mga kalapasan. Gitangtang sa matuod nga Selyo sa Pasko sa Pagkabanhaw ang kamatayon sa akong palibot, ug buhi ako karon. Ang Selyo sa Pasko sa

Pagkabanhaw, didto sa sinugdanan, gitangtang ang selyo sa selyong Romano, nga maoy nagselyo Kaniya kaniadto, pinaagi sa Selyo sa Pasko sa Pagkabanhaw. Ug ang mga tawo kaniadto, sa dihang mamatay sila, wala na; apan gitangtang Niya ang selyo ug gipadayag ang tinago. Ug karon ang Dios, pinaagi sa Iyang Balaang Espiritu, gitangtang ang maong selyo nga milukop sa atong mga kinabuhi, ug si Cristo ginapadayag si Cristo ingon nga Siya nagapuyo na kanato, kay karon gibuhi na kita uban Kaniya. Oh, panid sa panid!

Mamangon kita, (Aleluya!)

Mamangon kita! (Amen!)

Sa buntag nianang pagkabanhaw

Sa dihang ang higot sa kamatayon naputol na,

Mamangon kita, (Aleluya!) mamangon kita!

<sup>326</sup> Oh, dili ba mo malipay! Hilabihan gayud ang akong kalipay! Sukad pa kaniadto, sa usa ka gamay'ng kamalig sa ulingan usa niana ka buntag, gitangtang na ang mga selyo, ug gibanhaw ako uban Kaniya, usa na ka bag-ong linalang. Ang Iyang Gahum nga makapabuhi; nabanhaw na ang Anak.

<sup>327</sup> Dili pa lang dugay, giestoryahan ako bahin sa usa ka gamay'ng sugilanon mahitungod sa usa—usa ka mananagat. Adunay usa ka lalaki nga miadto didto ug gisuholan ang usa ka tigulang nga mananagat aron ubanan siya sa pagpangisda didto sa West Coast. Minggikan sila niadtong buntaga.

<sup>328</sup> Kung aduna man kaninyo ang nakapangisda na og salmon didto, aba, kabalo na mo kung unsa ang mahitabo, grabe ka magabon gayud didto. Nakita ko ang akong igsoon, si Eddie Byskal, didto, usa siya ka misyonaryo ngadto sa mga Indian nga atua didto. Ug namingwit kami kaniadto, kami mismo, didto niadtong mga baybayon.

<sup>329</sup> Mao nga kining mangingisda wala pa kaayo og kasinatian, kabalo na mo. Miadto sila sa lawud, ug gianud sila palayo. Naghulat na lang sila nga magkaadlawon, kabalo na namo. Ug sila—ug wala na gyud sila'y madungog nga siren sa barko, ug nabalaka na gyud kining mangingisda, nag-ingon, “Hala, ginaanud na gyud kita palayo sa baybayon! Agoy!” Ginerbiyos na gyud og ayo.

<sup>330</sup> Miingon siya, “Paglingkod, iho. Lingkod.” Ang tigulang nga mananagat, kalmado lang, kabalo na mo. Nahibalo siya kung unsay iyang ginasulti. Miingon, “Maghulat lang hangtud nga mosubang ang adlaw, dayon makita nato kung asa na kita.”

Moingon mo, “Kinahanglan ko bang mamahimong Metodista? Baptist? Pentecostal?”

<sup>331</sup> Maghulat lang. Pagsubang sa Anak, makita nato kung asa na kita. Siya ang Pulong. Maghulat lang hangtud nga makita ninyo ang Pulong nga napadayag, nagadan-ag ngadto

sa Binhi, sa ginatabyog nga Binangan, makita nato kung asa na kita. Gihigugma ba ninyo Siya? [Nagaingon ang kongregasyon, “Amen.”—Ed.]

<sup>332</sup> Pasayloa ko nga napalangan ko kamo og ayo. Pila kaninyo ang magpabilin karong gabii? Oh, balik na lang kung ingon niana, karong gabhiona, kita n’yo. Sa mga alas siete? May uban pa ba kamong gidapit? [Nagaingon si Igsoong Neville, “Wala na.”—Ed.]

Iduko nato ang atong mga ulo.

<sup>333</sup> Aduna ba’y usa dinhi, o daghan kaha, nga wala pa niining Gahum nga makapabuhi sa sulod ninyo? Ang Anak midan-ag na, ug naglingkod kamo niining tabernakulo, naminaw kamo sa mga teyp, ug bisan pa niana wala gihapon kamo nabuhi sa Espiritu gawas lang kung mahimo n’yong sundon ang Pulong sa Dios, nga makasunod kamong mga kababayen-an ug mga lalaken-an sa matag Pulong nga Iyang nasulat! Oh, usa kana ka delikadong butang. Unsa kaha kung kamo’y patay nga binhi, nga wala’y Kinabuhi sa sulod ninyo? Apan adunay usa ka butang sa sulod ninyo, nga nagasulti kaninyo, “Ako—gusto kong makabangon, niining buntaga. Gusto kong mobangon gikan niining kahimtang nga akong nahimutangan. Dili ko gustong mahimong usa lamang ka patay’ng binhi, nga mahabilin sa yuta ug mamahimong gidagsa nga kahoy. Gusto kong mobangon.”

<sup>334</sup> Mahimo bang ipataas mo ang imong kamot, ingnon, “Iampo ako, igsoon”? Panalanginan ka sa Dios. Panalanginan ka sa Dios. Grabe, tan-awa ang mga kamot; dili na mahimo nga ipaduol pa sila sa altar. Ang ginatawag natong pagpaduol sa altar, nga ginapaduol ang mga tawo palibot sa altar, dili ko mahilig kaayo magbuhat niini, bisan pa man. Gidugang lang kana sa iglesia niadtong panahon sa Methodist nga rebaybal. Kita n’yo?

<sup>335</sup> Ang gisulti sa Biblia, “Ang tanan nga nagtoo, kita n’yo, gibautismohan.” Adunay bautismohan dinhi, nga puno og tubig, nagahulat alang kang kinsa man nga andam mamatay sa ilang kaugalingon.

<sup>336</sup> Karon, mahimong nailusbog ka na, sa daghang higayon, sa Ngalan ni Ginoong Jesus; apan gawas nga kanang binhi mao’y Kinabuhi, kita n’yo, dili kini mahimong buhion Niini. Dili, dili, dili. Ang bautismo sa tubig sama ra sa yamog nga nahulog gikan sa langit; mahimong mahulog kini sa binhi, apan, kung kung kini walay Kinabuhi sa sulod, dili kini mabuhi.

<sup>337</sup> Apan kung tinuod kana nga bautismo sa tubig, nga kini kamatayon gayud sa imong kaugalingon, ug andam ka nga mamatay sa tanang gikatudlo kanimo tungod sa mga kredo ug denominasyon, nga sukwahi sa Pulong, ug magalakaw na ingon nga usa ka anak nga lalaki o anak nga babaye sa Dios, ug tinuod gyud kini sulod sa imong kasingkasing, matikdi kung unsa ang mahimo sa bautismo sa tubig kanimo karong buntaga.



“Maghinulsol, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sayup, sa inyong mga sala, ug madawat n’yo ang Binangan, ang tinabyog nga halad. Madawat n’yo ang Dinamika, ang Espiritu Santo. Kay ang saad alang kaninyo, ug kanilang tanan. Alang sa tanang mga henerasyon, kini mamahimong ingon niana.”

<sup>338</sup> Amahang Dios, ako—napataas ko ang wali, ug dakung oras ang nakuha ko sa mga tawo, apan, Ginoong Dios, wala na kini og kaundangan. Daw sa mora na og kinahanglan mong mohunong ug mohawa na, ug magpahulay usà, ug mobalik. Nagpuyo kami sa usa ka himalatyong kalibutan, taliwala sa naghimalatyong usab nga mga tawo; nga dala ang Mensahe sa Kinabuhi, ug dala ang kapanghimatuuran mahitungod sa pagkabanhaw. Minahal nga Dios, kausa ra kami nga mamahimong mortal, ug unsa na lang kaha ang mahitabo kung pasagdan lang namo nga molabay kini nga kahigayonan kanamo?

<sup>339</sup> Ang among mga kasingkasing nagdilaab; ang among mga kalag nagkulbahinam; alang niining mga midawat. Ug daghan ang ania nagpalinghug niining Mensahe niining buntaga. Oo, duha o tulo ka gatus ang mingpataas sa ilang mga kamot. Gusto nilang motoo, Ginoo. Oh, sigurado kana nga binhi dili patay, Ginoo. Giunsa man nila pagpataas sa ilang kamot nga sama niana? Aduna gayu’y usa ka butang. Oh Dios, tungod niining daang kaugalong, tungod niining asawa ni Job nga anaa dinha, nagasulti, “Oh!” Apan, Ginoo, tugoti si Job, kana nga magtotoo, nga mosulod, karong buntaga, hingpit nga mamatay, ug mailubong dinhi sa bautismo sa tubig.

<sup>340</sup> Ang mga yamog nga nagagikan sa Langit, ang Pulong sa Dios nga nagasulti nga ginahugasan Niini ang matag kasal-anan ug ginapasaylo kini! Ginabautismohan kamo sa Ngalan ni Jesus Cristo, para man sa unsa? Para sa kapasayloan sa inyong mga sala, mga sala nga gipasaylo na sa Ngalan ni Jesus Cristo.

<sup>341</sup> Hinaut, pagkahuman unya, Amahan, hinaut nga . . . Kung sila adunay sakit, hinaut nga sila manghawa dinhi nga giayo na. Hinaut nga, kung sila baldado man, hinaut nga manggawas sila nga napaialum na sa Gahum sa Balaang Espiritu. Kung sila man mga makasasala, hinaut nga mogawas sila nga nahugasan ug hinlo na. Ug ang mga mekanika, tungod sa ilang pagsunod; mokunsad ang Dinamika gikan sa Itaas, ang Balaang Espiritu, ug sakgawon sila, Ginoo. Buhia ang ilang mortal nga lawas, nga human niana madungog namo ang tinuod og bag-ong mga sinultihan, mga gahum sa Dios, di-matugkad nga gugma, grasya nga andam mamatay ug grasya nga andam mabuhi; ug usa ka Cristo nga nabanhaw na, usa ka Lawas, usa ka Pangasaw-onon nga nagrepresentar Kaniya ibabaw sa yuta.

<sup>342</sup> Amahan, Imoha sila. Gipataas nila ang ilang mga kamot. Nawali ko na ang Pulong. Karon, Amahan, dawata sila,

nagaampo ako. Sa Ngalan ni Jesus Cristo, ginapangamuyo ko kini. Amen.

<sup>343</sup> Gihigugma ba ninyo Siya? [Nagaingon ang kongregasyon, “Amen.”—Ed.] Dili ba Siya kahibulongan? [“Amen.”] Nalipay ba kamo nga kabahin kamo sa pagkabanhaw nianang Pasko sa Pagkabanhaw, nga kamo gibanhaw na uban Kaniya? [“Amen.”] Ipataas ang inyong kamot. Gilakip ka na.

<sup>344</sup> “Mga anak ko,” maingon sa gisulti ni Paul kaniadto. Dili sa pagpaningkamot nga sundog-sundogon siya, kondili, ang gugma, gihigugma ko kamo. Ginalatas ko ang mga kadalanan ug ang tanang uban pa, aron makaabot dinhi, aron makapakigsulti kaninyo. Gikan pa sa disyerto, latas sa mga pinadpad nga niyebe, ug uban pa, aron makaabot dinhi. Nagasakay kami og mga eroplano. Nanagmaneho pud kamo latas sa nasud, aron lang magkatipon kita. Gihigugma mismo nato ang usa’g usa.

<sup>345</sup> Kabahin nato ang usa’g usa. Ayaw ninyo tugoti si Satanas nga sultihan kamo og lahi niana. Ingon nga kabahin kita sa usa’g usa, kabahin kita Kaniya. Ug pareho kitang mga lungsuranon sa Ginghamarian, nga magkauban nga nagakalipay, sa niining mga panalangin, sa pagkabanhaw.

<sup>346</sup> Ug karon, kita n’yo, karon kamo nangabanhaw na. Sa dihang gibanhaw Siya sa Dios, gibanhaw Niya usab kamo. Ang Anak anaa na kaninyo karon, ug kamo nagatubo na ngadto sa mapamulakon nga Kinabuhi sama Kaniya kaniadto, aron sigurado nga mabanhaw sa katapusang adlaw. Ang inyong mga potensyal, anaa na kaninyo karon. Giunsa man nimo sa paghibalo? Nabag-o ang inyong kalag, dili ba? Ang inyong lawas nagmatinumanon na ngadto Niini, dili ba? Nagmatinumanon ngadto sa (unsa, sa iglesia?) sa Pulong, nga mao ang Kinabuhi, kung ingon-ana nabanhaw na kamo karon gikan sa mga patay. Kini ang Pasko sa Pagkabanhaw, uban kang Jesus ug kanako. Kini ang Pasko sa Pagkabanhaw, uban kaninyo ug ni Jesus. Ug kini ang Pasko sa Pagkabanhaw, uban kaninyo, kanako, ug kang Jesus. Kitang tanan . . . O, si Jesus, kamo, ug ako, kitang tanan magkauban nga nabanhaw na.

<sup>347</sup> Ug kita mamangon sa katapusang adlaw, bisan pa kung ang atong mga espiritu magabiya sa atong mga lawas, bisan pa kung madunot ang mga lawas, mopadulong man ang mga niini ngadto sa pagka-abog, mopadulong man ang mga niini sa pagkasunog, mopadulong man ang mga niini ngadto sa kahiladman sa dagat. Ang Biblia nagsulti, “Gibubo sa Manulonda ang sa iyaha ngadto sa dagat, ug ang tanan nga didto nangamatay nangabanhaw.” Wala’y bisan unsa ang makapugong kanato, o makapahimulag kanato, gikan nianang Dios nga gihigugma nato pag-ayo, nga nagbanhaw kanatong tanan.

<sup>348</sup> Panalanginan kamo sa Dios. Napalangan ko na kamo og ayo dinhi. Kung silang mga tawo anaa pa diha sa telepono,

sigurado sila'y . . . Sa singkwenta sentimos matag minuto, daku-daku gyud ang nabayran nila, niining buntaga. Apan, dili gyud ako tukmang makahunong nianang orasa, kinahanglan ko nga magpadayon pa.

<sup>349</sup> Karon, kung itugot sa Ginoo, mobalik ako karong gabhiona, aron makigsulti kaninyo pag-usab. Ug kung dili ko mahimo, ug kung ingon-ana kamong tanan nahibalo na . . . Sa hunahuna ko dili na kita . . . o wala . . . Dili na ba kita konektado sa telepono? Wala na kita sa telepono.

<sup>350</sup> Kabalo na mo kung asa ako moadto, dili ba? Sa Africa! Dugay na ako nga nagpanawag; daghang mga tuig na ako naningkamot nga makabalik. Karon sa usa ka panan-awon, ang Espiritu sa Ginoo nag-andam og paagi. Ang ingon nila, nga pagkadungog kono sa niadtong mga makalolooy'ng lumad, nga wala ako magdalikyat sa miaging panahon nga atua ako didto, nanaghapa sila didto sa yuta adlaw ug gabii, ug nanagbakho ug nanaghilak, ug nanagsulti, "Ginoo, unsa man diay ang nabuhat namo?" linibo kanila. Mga tawong wala gani nagatoo nga aduna sila og kalag. Kita n'yo? Ug nanaghilak sila ug nanagbakho sila, ug nanaghilak sila.

<sup>351</sup> Ayaw gyud ipahibalo daan. Palihog ayaw gayud. Kita n'yo, pag mahitabo nga nga mahibaloan didto nga aduna na'y visa ug makaabot kini sa mga ministro, pugngan na nila ako didto pa lang. Kinahanglan kong moadto ingon nga usa ka mangangayam. Bisitahon ko kadtong rayna nga nagdala kaniadto og dise-siete ka tren nga puno og mga tawo nga mitabong sa panagtigum. Aduna ko'y pahanugot nga moadto didto ug mangayam sa iyang teritoryo. Ug ang pag-adto ko didto, ang pasaporte ko ug tanan na nga magapakita nga ako usa ka mangangayam, dili para sa usa ka pang-relihiyon nga buluhaton.

<sup>352</sup> Dayon adunay usa ka igsoon nga makigtagbo kanako, moingon, "Nganong dili man ka magpahigayon og usa ka gamay'ng panagtigum alang kanamo?" Naabangan na diay ang mga estadyum. Wala man nila kini nahibaloan. Kita n'yo? Oh, himaya!

<sup>353</sup> Iampo ninyo nga ang kabubut-on sa Dios dili mababagan. Ingon nga, ang akong kalag nagatuaw alang sa Africa sukad sa akong pagbiya didto, hinaut nga makabalik pa ako pag-usab, dayon makapaghatud kaninyo og balita mahitungod sa usa ka dakung panagtigum. Tingali dili ko na kamo makita, sugod niining adlawa, hangtud nga makabalik ako. Manggikan kami, sa pipila na lang ka adlaw karon, sa ika-napulo sa Mayo. Mahimo ba ninyo ako iampo? [Nagaingon ang kongregasyon, "Amen."—Ed.]

<sup>354</sup> Hinumdumi, wala ka mahibalo kung unsa ang mahimong mga problema, hangtud nga moabot ka didto; mga abat-

mananambal sa magkakalid, ug ang yawa, ug ayaw paghunahuna nga wala sila mahibalo kung unsa ang pagabuhaton. Kita n'yo? Ug kinahanglan nga mas nahibalo ka kung unsay imong ginahisgotan, pag-atubang mo na sila. "Apan nahibalo ko kung kang Kinsa ako nagtoo, ug masaligon gyud ako nga mahimo Niya kung unsa ang akong gikatugyan ngadto Kaniya niadtong adlaw.

Karon, adunay pipila ka mga panyo nga napahiluna dinhi.

<sup>355</sup> Minahal nga Dios, sama sa niining Mensahe karong buntaga, mahitungod sa pagkabanhaw, ug sa pagtindog ko dinhi, Ginoo, ug ginapamatud-an pinaagi sa Pulong nga ang Gahum nga makapabuhi anaa sa anak nga nagatoo. Tungod niana, nga nagatoo ako, tungod sa pagtoo, kanang Gahum nga makapabuhi ang nagbag-o sa akong kinabuhi. Ug kini nga mga tawo nagatoo, Ginoo, ug gibag-o Niini ang ilang mga kinabuhi. Ug nagaampo kami alang sa usa'g usa.

<sup>356</sup> Ginapandong ko ang akong mga kamot sa niining mga panyo, nga. . . Hinaut nga ang Dios, Kinsa nagbanhaw kang Jesus Cristo ug nagbanhaw Kaniya gikan sa mga patay, ug ang Espiritu nga nagbanhaw Kaniya gikan sa mga patay, magapuyo sa sulod sa among lawas.

<sup>357</sup> Ang Espiritu nga anaa kaniadto sa lawas ni Eliseo, nga, human nga mamatay ug wala na gyud gawas sa mga bukog na lang, aduna sa gihapon kadto og Gahum nga makapabuhi. Ang mga kamot sa mga apostoles aduna kadto og Gahum nga makapabuhi. Ang mga hunahuna sa mga apostoles, ang mata sa mga apostoles, ang—ang mga dila sa mga magtotoo, aduna tanan og Gahum nga makapabuhi.

<sup>358</sup> Karon hinaut nga ang maong Gahum nga makapabuhi, samtang ginapandong ko kining Pulong sa ibabaw kanila, ug ang akong mga kamot nga nagarepresentar nga ako nagpanag-iya, tungod sa grasya, og nianang Gahum nga makapabuhi, hinaut nga buhion Niini ang matag usa sa niining mga masakiton nga lawas, ug sila mangaayo, Dios, pinaagi sa Ngalan ni Jesus Cristo.


<sup>359</sup> Hinaut nga dili lamang sa niining mga panyo, kondili alang usab sa nianang mga tawo nga anaa dinha nga nagpanalinghug, sa matag usa nga nanag-antus. Alang nianang makaloolooy nga mga bata, tigulang nga mga tawo, bisan unsa man sila, hinaut nga ang Gahum nga makapabuhi buhion sila mismo karon, sa Ngalan ni Jesus. Amen.

<sup>360</sup> Karon, pila man kaninyo ang aduna og Gahum nga makapabuhi? [Nagaingon ang kongregasyon, "Amen."—Ed.] Karon ipandong ang inyong mga kamot diha sa usa'g usa, kung anaa kaninyo kanang Gahum nga makapabuhi.

<sup>361</sup> Karon, adunay usa lamang ka butang ang makapugong Niini, makababag, ang inyong dili-pagtoo. Usa ka babaye ang

mihikap kaniadto sa Iyang bisti, nga naayo; usa ka sundalong Romano ang nagluwa sa Iyang nawong, ug nahiadto sa impiyerno. Kita n'yo? Busa kinahanglan kining . . . nagadependi kini kung asa mo. Nagatoo ba kamo Niini? [Nagaingon ang kongregasyon, "Amen."—Ed.] Nagatoo ba kamo Niinii?

<sup>362</sup> Karon gusto kong iduko ninyo ang inyong ulo ug mag-ampo alang sa usa'g usa. Basta—mag-ampo gayud, ang isulti lang. "Ginoo, kining tawo" . . . Kita n'yo, mag-ampo alang sa usa'g usa.

<sup>363</sup> Minahal nga Dios, ginabuhat namo kini sa Ngalan ni Jesus Cristo, ang bugtong Ngalan nga gihatag sa tawo nga pinaagi Niini mahimo kaming maluwas o mamaayo. Kining mga tawo, nga parehong mga lungsuranon sa Ginghamian, nga nagpanag-iya og Gahum nga makapabuhi, buhia Kini ngadto kanila, Ginoo, karon mismo. Ug hinaut nga ang Espiritu moadto gikan sa usa ka agila ngadto sa usa pa, gikan sa Pulong ngadto sa Pulong, hangtud nga ang kahupnganan ni Jesus Cristo mapadayag sa matag lawas, alang sa pisikal, sa espirituwal, o unsa mang panginahanglanon nga aduna sila, samtang ginapandong namo ang among mga kamot diha sa usa'g usa. Sa Ngalan ni Jesus Cristo. 

*KINI ANG PAGSUBANG SA ADLAW* CEB65-0418M  
(It Is The Rising Of The Sun)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Abril 18, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)